

官穩身應泰。春風信馬行。縱忙無苦事。雖病有心情。厚祿兒孫飽。前驅道路榮。花時八入直。無暇賀元兄。

朝回和元少尹絕句

朝客朝回回望好。盡紆朱紫佩金銀。此時獨與君為伴。馬上青袍唯兩人。

重和元少尹

鳳閣舍人京亞尹。白題俱未著緋衫。南宮起請無消息。朝散何時得入衙。

中書夜直夢忠州

閣下燈前夢。巴南城裏遊。覓花來渡口。尋寺到山頭。江色分明綠。猿聲依舊愁。禁鐘驚睡覺。唯不上東樓。

醉後

酒後高歌且放狂。門前閒事莫思量。猶嫌小戶長先醒。不得多時住醉郎。

待漏入閣書事奉贈元九學士閣老

衙排宣政仗。門啓紫宸闕。彩筆停書命。花輒趣立班。稀星點銀燭。殘月墮金環。闈漏猶傳水。明河漸下山。從東分地色。向北仰天顏。碧縷爐煙直。紅垂珮尾閒。綸闈暫竝入。翰苑忝先攀。笑我青袍故。饒君茜綬殷。詩仙歸洞裏。酒病滯人閒。

好去鴛鴦侶。冲天便不還。

晚春重到集賢院

官曹清切非人境。風日鮮明是洞天。滿砌荆花鋪紫毯。隔牆榆莢撒青錢。前時謫去三千里。此地辭來十四年。虛薄至今慙舊職。院名擡舉號為賢。

紫薇花

絲綸閣下文書靜。鐘鼓樓中刻漏長。獨坐黃昏誰是伴。紫薇花對紫薇郎。

卜居

遊宦京都二十春。貧中無處可安貧。長羨蝸牛猶有舍。不如碩鼠解藏身。且求容立錐頭地。免似漂流木偶人。但道吾廬心便足。敢辭湫隘與鶩塵。

題新居寄元八

青龍岡北近西邊。移入新居便泰然。冷巷閉門無客到。煖簷移榻向陽眠。階墀寬窄纔容足。墻壁高低粗及肩。莫羨昇平元八宅。自思買用幾多錢。

登龍尾道南望憶廬山舊隱

龍尾道邊來一望。香爐峯下去無因。青山舉眼三千里。白髮平頭五十人。自笑形骸紆組綬。將何言語掌絲綸。君恩壯健猶難報。況被年年老逼身。

馮閣老處見與嚴郎中酬和詩因戲贈絕句

乍來天上宜清淨。不用回頭望故山。縱有舊遊君莫憶。塵心起即墮人間。

見于給事暇日上直寄南省諸郎官詩因以戲贈

倚作天仙弄地仙。誇張一日抵千年。黃麻敕勝長生籙。白紵詞嫌內景篇。

雲彩誤居青瑣地。風流合在紫微天。東曹漸去西垣近。鶴駕無妨更著鞭。

題新昌所居

宅小人煩悶。泥深馬鈍頑。街東閒處住。日午熱時還。院窄難栽竹。墻高不見山。

唯應方寸內。此地覓寬閒。

西省北院新構小亭種竹開窗東通騎省與李常侍隔窗小飲因題四韻

結託白鬚伴。因依青竹叢。題詩新壁上。過酒小窗中。深院晚無日。虛簷涼有風。

金貂醉看好。回面紫垣東。

酬元郎中同制加朝散大夫書懷見贈

命服雖同黃紙上。官班不共紫垣前。青衫脫早差三日。白髮生遲校九年。

曩者定交非勢利。老來同病是詩篇。終身擬作臥雲伴。逐月須收燒藥錢。

五品足爲婚嫁主。袈裟著了好歸田。

初著緋戲贈元九

晚遇緣才拙。先衰被病牽。那知垂白日。始是著緋年。身外名徒爾。人閒事偶然。

我朱君紫綬。猶未得差肩。

和韓侍郎苦雨

潤氣凝柱礎。繁聲注瓦溝。閨窗不曉。涼引簟先秋。葉濕蠶應病。泥稀燕亦愁。

仍聞放朝夜。誤出到街頭。

連雨

風雨闌蕭蕭。雞鳴暮復朝。碎聲籠苦竹。冷翠落芭蕉。水鳥投簷宿。泥蛙入戶跳。

仍聞蕃客見。明日欲追朝。

初加朝散大夫又轉上柱國

紫微今日煙霄地。赤嶺前年泥土身。得水魚還動鱗鬣。乘軒鶴亦長精神。

且慙身忝官階貴。未敢家嫌活計貧。柱國勳成私自問。有何功德及生人。

行簡初授拾遺同早朝入閣因示十二韻

夜色尙蒼蒼。槐陰夾道長。聽鐘出長樂。傳鼓到新昌。宿雨沙隄潤。秋風樺燭香。

馬驕欺地軟。人健得天涼。待漏排闥闔。停珂擁建章。爾隨黃閣老。吾次紫微郎。

竝入連稱籍。齊趨對折方。鬪班花接萼。綽立鴈分行。近職誠爲美。微才豈合當。綸言難下筆。諫紙易盈箱。老去何僥倖。時來不料量。唯求致身地。相誓答恩光。

立秋日登樂遊園

獨行獨語曲江頭。回馬遲遲上樂遊。蕭颯涼風與衰鬢。誰教計會一時秋。

新秋早起有懷元少尹

秋來轉覺此身衰。晨起臨階盥漱時。漆匣鏡明頭盡白。銅餅水冷齒先知。光陰縱惜難畱住。官職雖榮得已遲。老去相逢無別計。強開笑口展愁眉。

夜筭

紫袖紅絃明月中。自彈自感閨低容。絃凝指咽聲停處。別有深情一萬重。

妻初授邑號告身

弘農舊縣授新封。鈿軸金泥誥一通。我轉官階常自愧。君加邑號有何功。花牋印了排窠濕。錦標裝來耀手紅。倚得身名便慵墮。日高猶睡綠窗中。

送客南遷

我說南中事。君應不願聽。曾經身困苦。不覺語丁寧。燒處愁雲夢。波時憶洞庭。春畚煙勃勃。秋瘴露冥冥。蛟蚺經冬活。魚龍欲雨腥。水蟲能射影。山鬼解藏形。

穴掉巴蛇尾。林飄鵝鳥翎。颶風千里黑。蕪草四時青。客似驚弦鴈。舟如委浪萍。誰人勸言笑。何計慰漂零。慎勿琴離膝。長須酒滿瓶。大都從此去。宜醉不宜醒。

暮歸

不覺百年半。何曾一日閒。朝隨燭影出。暮趁鼓聲還。甕裏非無酒。牆頭亦有山。歸來常困臥。早晚得開顏。

寄遠

欲忘忘未得。欲去去無由。兩腋不生翅。二毛空滿頭。坐看新落葉。行上最高樓。暝色無邊際。茫茫盡眼愁。

舊房

遠壁秋聲蟲絡絲。入簷新影月低眉。牀帷半故簾旌斷。仍是初寒欲夜時。

錢侍郎使君以題廬山草堂詩見寄因酬之

殷勤江郡守。悵望掖垣郎。慙見新瓊什。思歸舊草堂。事隨心未得。名與道相妨。若不休官去。人閒到老忙。

寄山僧

時年五十

眼看過半百。早晚掃巖扉。白首誰畱住。青山自不歸。百千萬劫障。四十九年非。

會擬抽身去。當風抖擻衣。

慈恩寺有感

時初直初逝。居敬方病。

自問有何惆悵事。寺門臨入卻遲迴。

李家哭泣元家病。

柿葉紅時獨自來。

酬嚴十八郎中見示

口厭含香握厭蘭。紫微青瑣舉頭看。

忽驚鬢後蒼浪髮。

未得心中本分官。

夜酌滿容花色暖。秋吟切骨玉聲寒。

承明長短君應入。

莫憶家江七里灘。

寄王祕書

霜菊花萎日。風梧葉碎時。怪來秋思苦。

緣詠祕書詩。

中書寓直

繚繞宮牆圍禁林。半開閭闔曉沈沈。

天晴更覺南山近。

月出方知西掖深。

病對詞頭慙彩筆。

老看鏡面愧華簪。

土木形骸麋鹿心。

自問

黑花滿眼絲滿頭。早衰因病病因愁。

途氣味已諳盡。

五十不休何日休。

曲江獨行招張十八

曲江新歲後。冰與水相和。南岸猶殘雪。東風未有波。偶遊身獨自。相憶意如何。

莫待春深去。花時鞍馬多。

新居早春二首

靜巷無來客。深居不出門。鋪沙蓋苔面。掃雪擁松根。漸暖宜閒步。初晴愛小園。

覓花都未有。唯覺樹枝繁。

【二】

池潤東風暖。閒行蹋草芽。呼童遣移竹。畱客伴嘗茶。雷滴簷冰盡。塵浮隙日斜。

新居未曾到。鄰里是誰家。

新昌新居書事四十韻。因寄元郎中張博士

冒寵已三遷。歸朝始二。囊中貯餘俸。郭外買閒田。狐兔同三遷。蒿萊共一壠。新園聊剗穢。舊屋且扶顛。簷漏移傾瓦。梁鼓換蠹椽。平治遠臺路。整頓近階甃。巷狹開容駕。牆低壘過肩。門閭堪駐蓋。堂室可鋪筵。丹鳳樓當後。青龍寺在前。市街塵不到。宮樹影相連。省吏嫌坊遠。豪家笑地偏。敢勞賓客訪。或望子孫傳。不覓他人愛。唯將自性便。等閒栽樹木。隨分占風煙。逸致因心得。幽期遇境牽。松聲疑澗底。草色勝河邊。虛潤冰銷地。晴和日出天。苔行滑如簞。莎坐軟於綿。簾每當山卷。帷多待月褰。籬東花掩映。窗北竹嬋娟。迹慕青門隱。名慙紫禁仙。

假歸思晚沐。朝去戀春眠。拙薄才無取。疎慵職不專。題牆書命筆。沾酒率分錢。
 柏杵春靈藥。銅瓶漱暖泉。爐香穿蓋散。籠燭隔紗然。陳室何曾掃。陶琴不要絃。
 屏除俗事盡。養活道情全。尚有妻孥累。猶爲紅綬纏。終須拋爵祿。漸擬斷腥羶。
 大抵宗莊叟。私心事竺乾。浮榮水割字。真諦火生蓮。梵部經十二。玄書字五千。
 是非都付夢。語默不妨禪。博士官猶冷。郎中病已痊。多同僻處住。久結靜中緣。
 緩步攜筇杖。徐吟展蜀箋。老宜閒語話。悶憶好詩篇。蠻榼來方瀉。蒙茶到始煎。
 無辭數相見。鬢髮各蒼然。

喜敏中及第偶示所懷

自知羣從爲儒少。豈料詞場中第頻。桂折一枝先許我。楊穿三葉盡驚人。
 轉於文墨須留意。貴向煙霄早致身。莫學爾兄年五十。蹉陀始得掌絲綸。

久不見韓侍郎戲題四韻以寄之

近來韓閣老。疎我我心知。戶大嫌甜酒。才高笑小詩。靜吟乖月夜。閒醉曠花時。
 還有愁同處。春風滿鬢絲。

寄白頭陀

近見頭陀伴。云師老更慵。性靈閒似鶴。顏狀古於松。山裏猶難覓。人間豈易逢。

仍聞移住處。太白最高峯。

和韓侍郎題楊舍人林池見寄

渠水闌流春凍解。風吹日炙不成凝。鳳池冷暖君諳在。二月因何更有冰。

勤政樓西老柳

半朽臨風樹。多情立馬人。開元一株柳。長慶二年春。

偶題閣下廳

靜愛青苔院。深宜白髮翁。貌將松共瘦。心與竹俱空。暖有低簷日。春多颺幕風。
 平生閒境界。盡在五言中。

予與故刑部李侍郎早結道友以藥術爲事與故京兆元尹晚爲詩侶有林泉之期周歲之間二君長逝李住曲江北元居昇平西追感舊遊因貽同志

從哭李來傷道氣。自亡元後減詩情。金丹同學都無益。水竹鄰居竟不成。

月夜若爲遊曲水。花時那忍到昇平。如年七十身猶在。但恐傷心無處行。

送馮舍人閣老往襄陽

紫微閣底送君回。第二廳簾下不開。莫戀漢南風景好。峴山花盡早歸來。

莫走柳條詞送別

南陌傷心別。東風滿把春。莫欺楊柳弱。勸酒勝於人。

酬韓侍郎張博士雨後遊曲江見寄

小園新種紅櫻樹。閒遶花行便當遊。何必更隨鞍馬隊。衝泥蹋雨曲江頭。

元家花

今日元家宅。櫻桃發幾枝。稀稠與顏色。一似去年時。失卻東園主。春風可得知。

代人贈王員外

好在王員外。平生記得不。共賒黃叟酒。同上莫愁樓。靜接殷勤語。狂隨爛熳遊。那知今日眼。相見冷於秋。

惜小園花

曉來紅夢凋零盡。但見空枝四五株。前日狂風昨夜雨。殘芳更合得存無。

蕭相公宅遇自遠禪師有感而贈

宦途堪笑不勝悲。昨日榮華今日衰。轉似秋蓬無定處。長於春夢幾多時。

半頭白髮慙蕭相。滿面紅塵問遠師。應是世閒緣未盡。欲拋官去尙遲疑。

草詞畢遇芍藥初開因詠小謝紅藥當階翻詩以爲一句未盡其狀偶成十六韻

罷草紫泥詔。起吟紅藥詩。詞頭封送後。花口拆開時。坐對鉤簾久。行觀步履遲。

兩三叢爛熳。十二葉參差。背日房微斂。當階朶旋鼓。釵葶抽碧股。粉蘂撲黃絲。

動蕩情無限。低斜力不支。周廻看未足。比喻語難爲。勾漏丹砂裏。樵僂火焰旗。

彤雲賸根蒂。絳幘欠纓綉。況有晴風度。仍兼宿露垂。疑香熏菴畫。似淚著胭脂。

有意畱連我。無言怨思誰。應愁明日落。如恨隔年期。茵苴泥連萼。玫瑰刺繞枝。

等量無勝者。唯眼與心知。

喜張十八博士除水部員外郎

老何歿後吟聲絕。雖有郎官不愛詩。無復篇章傳道路。空畱風月在曹司。

長嗟博士官猶屈。亦恐騷人道漸衰。今日聞君除水部。喜於身得省郎時。

與沈楊二舍人閣老同食敕賜櫻桃翫物感恩因成十四韻

清曉趨丹禁。紅櫻降紫宸。驅禽養得熟。和葉摘來新。圓轉盤傾玉。鮮明籠透銀。

內園題兩字。西掖賜三臣。熒惑晶華赤。醍醐氣味真。如珠未穿孔。似火不燒人。

杏俗難爲對。桃頑詎可倫。肉嫌盧橘厚。皮笑荔枝皴。瓊液酸甜足。金丸大小勻。

偷須防曼倩。惜莫擲安仁。手擘纔離核。匙抄半是津。甘爲舌上露。煖作腹中春。

已懼長尸祿。仍驚數食珍。最慙恩未報。飽餒不才身。

送嚴大夫赴桂州

地壓坤方重。官兼憲府雄。桂林無瘴氣。柏署有清風。山水衙門外。旌旗樓殿中。大夫應絕席。詩酒與誰同。

春夜宿直

三月十四夜。西垣東北廊。碧梧葉重疊。紅藥樹低昂。月砌漏幽影。風簾飄闇香。禁中無宿客。誰伴紫微郎。

夏夜宿直

人少庭宇曠。夜涼風露清。槐花滿院氣。松子落階聲。寂寞挑燈坐。沈吟蹋月行。年衰自無趣。不是厭承明。

七言十二句贈駕部吳郎中七兄

四月天氣和且清。綠槐陰合沙堤平。獨騎善馬銜鐙穩。初著單衣肢體輕。退朝下直少徒侶。歸舍閉門無送迎。風生竹夜窗閒臥。月照松時臺上行。春酒冷嘗三數盞。曉琴閒弄十餘聲。幽懷靜境何人別。唯有南宮老駕兄。

玉真張觀主下小女冠阿容

綽約小天仙。生來十六年。姑山半峯雪。瑤水一枝蓮。晚院花畱立。春窗月伴眠。迴眸雖欲語。阿母在傍邊。

龍花寺主家小尼

郭代公愛姬薛氏。幼嘗爲尼。小名仙人子。

頭青眉眼細。十四女沙彌。夜靜雙林怕。春深一食飢。步慵行道困。起晚誦經遲。應似仙人子。花宮未嫁時。

訪陳二

曉垂朱綬帶。晚著白綸巾。出去爲朝客。歸來是野人。兩餐聊過日。一榻足容身。此外皆閒事。時時訪老陳。

晚庭逐涼

送客出門後。移牀下砌初。趁涼行繞竹。引睡臥看書。老更爲官拙。慵多向事疎。松窗倚藤杖。人道似僧居。

曲江憶李十一

李君歿後共誰遊。柳岸荷亭兩度秋。獨遶曲江行一匝。依前還立水邊愁。

江亭翫春

江亭乘曉閱衆芳。春妍景麗草樹光。日消石桂綠嵐氣。風墜木蘭紅露漿。水蒲漸展書帶葉。山榴半含琴軫房。何物春風吹不變。愁人依舊鬢蒼蒼。

聞夜砧

誰家思婦秋擣帛。月苦風凄砧杵悲。八月九月正長夜。千聲萬聲無了時。

板橋路

梁苑城西二十里。一渠春水柳千條。若爲此路今重過。十五年前舊板橋。

曾共玉顏橋上別。不知消息到今朝。

青門柳

青青一樹傷心色。曾入幾人離恨中。爲近都門多送別。長條折盡減春風。

梨園弟子

白頭垂淚話梨園。五十年前雨露恩。莫問華清今日事。滿山紅葉鎖宮門。

暮江吟

一道殘陽鋪水中。半江瑟瑟半江紅。可憐九月初三夜。露似真珠月似弓。

思婦眉

春風搖蕩自東來。折盡櫻桃綻盡梅。惟餘思婦愁眉結。無限春風吹不開。

怨詞

奪寵心那慣。尋思倚殿門。不知移舊愛。何處作新恩。

寒閨怨

寒月沈沈洞房靜。真珠簾外梧桐影。秋霜欲下手先知。燈底裁縫剪刀冷。

秋房夜

雲露青天月漏光。中庭立久卻歸房。水窗席冷未能臥。挑盡殘燈秋夜長。

採蓮曲

菱葉縈波荷颭風。荷花深處小船通。逢郎欲語低頭笑。碧玉搔頭落水中。

鄰女

娉婷十五勝天仙。白日姮娥旱地蓮。何處閒教鸚鵡語。碧紗窗下繡牀前。

閨婦

斜凭繡牀愁不動。紅銷帶緩綠鬟低。遼陽春盡無消息。夜合花前日又西。

移牡丹栽

金錢買得牡丹栽。何處辭叢別主來。紅芳堪惜還堪恨。百處移將百處開。

聽夜箏有感

江州去日聽箏夜。白髮新生不願聞。如今格是頭成雪。彈到天明亦任君。

琵琶

絃清撥刺語錚錚。

背卻殘燈就月明。

賴是心無惆悵事。

不然爭奈子絃聲。

和殷協律琴思

秋水蓮冠春草裙。

依稀風調似文君。

煩君玉指分明語。

知是琴心伴不聞。

後宮詞

雨露由來一點恩。

爭能遍布及千門。

三千宮女胭脂面。

幾箇春來無淚痕。

聽彈湘妃怨

玉軫朱絃瑟瑟微。

吳娃徵調奏湘妃。

分明曲裏愁雲雨。

似道蕭蕭郎不歸。

閒坐

煖擁紅爐火。

閒搔白髮頭。

百年慵裏過。

萬事醉中休。

莫論身在日。

身後亦無憂。

不睡

焰短寒缸盡。

聲長曉漏遲。

年衰自無睡。

不是守三尸。

白樂天詩集卷二十

律詩

七言五言
凡四十首

初罷中書舍人

自慙拙宦叨清貴。

還有癡心怕素餐。

或望君臣相獻替。

可圖妻子免飢寒。

性疎豈合承恩久。

命薄元知濟事難。

分寸寵光酬未得。

不休更擬覓何官。

宿陽城驛對月

自此後詩。赴
杭州路中作。

親故尋回駕。

妻孥未出關。

鳳凰池上月。

送我過商山。

商山路有感并序

前年夏予自忠州刺史除書歸闕。時刑部李十一侍郎戶部崔二十員外亦自禮泉二郡

守徵還。相次入關。皆同此路。今年予自中書舍人授杭州刺史。又由此途出。二君已逝。予

獨南行。追歎興懷。慨然成詠。後來有與予杓直虞平游者。見此短什。能無惻惻乎。儻未忘

情。請為繼和。長慶二年七月三十日。題於內鄉縣南亭云爾。

憶昨徵還日。三人歸同路。此生都是夢。前事旋成空。杓直泉埋玉。虞平燭過風。

唯殘樂天在。頭白向江東。

重感

停驂歇路隅。重感一長吁。擾擾生還死。紛紛榮又枯。困支青竹杖。閒捋白髭鬚。

莫歎身衰老。交游半已無。

逢張十八員外籍

旅思正茫茫。相逢此道傍。曉嵐林葉闇。秋露草花香。白髮江城守。青衫水部郎。客亭同宿處。忽似夜歸鄉。

赴杭州重宿棣華驛。見楊八舊詩。感題一絕。

往恨今愁應不殊。題詩梁下又踟躕。羨君猶夢見兄弟。我到天明睡亦無。

寓言題僧

劫風火起燒荒宅。苦海波生蕩破船。力小無因救焚溺。清涼山下且安禪。

內鄉縣郵路作

日下風高野路涼。緩驅疲馬鬧思鄉。渭邨秋物應如此。棗赤梨紅稻穗黃。

路上寄銀匙與阿龜

謫宦心都慣。辭鄉去不難。緣留龜子住。涕淚一闌干。小子須嬌養。鄒婆爲好看。銀匙封寄汝。憶我卽加餐。

山泉煎茶有懷

坐酌泠泠水。看煎瑟瑟塵。無由持一盃。寄與愛茶人。

郢州贈別王八使君

昔是詩狂客。今爲酒病夫。強吟翻悵望。縱醉不歡娛。鬢髮三分白。交親一半無。

郢城君莫厭。猶校近京都。

吉祥寺見錢侍郎題名

雲雨三年別。風波萬里行。愁來正蕭索。況見故人名。

重到江州感舊遊題郡樓十一韻

掌綸知是忝。剖竹信爲榮。才薄官仍重。恩深責尙輕。昔徵從典午。今出自承明。

鳳詔休揮翰。漁歌欲濯纓。還乘小艘。卻到古湓城。醉客臨江待。禪僧出郭迎。

青山滿眼在。白髮半頭生。又校三年老。何曾一事成。重過蕭寺宿。再上庾樓行。

雲水新秋思。閭閻舊日情。郡民猶認得。司馬詠詩聲。

贈江州李十使君員外十二韻

我本江湖上。悠悠任運身。朝隨賣藥客。暮伴釣魚人。迹爲燒丹隱。家緣嗜酒貧。

經過剡溪雪。尋覓武陵春。豈有疎狂性。堪爲侍從臣。仰頭驚鳳闕。下口觸龍鱗。

劍珮辭天上。風波向海濱。非賢虛偶聖。無屈敢求伸。昔去曾同日。今來卽後塵。

中年俱白髮。左宦各朱輪。長短才雖異。榮枯事略均。殷勤李員外。不合不相親。

題別遺愛草堂兼呈李十使君

李亦廬山人。常隱白鹿洞。

曾住爐峯下。書堂對藥臺。斬新蘿徑合。依舊竹窗開。砌水親開決。池荷手自栽。五年方暫至。一宿又須回。縱未長歸得。猶勝不到來。君家白鹿洞。聞道亦生苔。

重題

泉石尚依依。林疎僧亦稀。何年辭水閣。今夜宿雲扉。謾獻長楊賦。虛拋薜荔衣。不能成一事。贏得白頭歸。

夜泊旅望

少事多愁客。中宵起望鄉。沙明連浦月。帆白滿船霜。近海江彌濶。迎秋夜更長。煙波三十宿。猶未到錢塘。

九江北岸遇風雨

黃梅縣邊梅黃雨。白頭浪裏白頭翁。九江闊處不見岸。五月盡時多惡風。

人閒穩路應無限。何事拋身在此中。

舟中晚起

日高猶掩水窗眠。枕簟清涼八月天。泊處或依沽酒店。宿時多伴釣魚船。退身江海應無用。憂國朝廷自有賢。且向錢塘湖上去。冷吟閒醉二三年。

秋寒

雪鬢年顏老。霜庭景氣秋。病看妻檢藥。寒遣婢梳頭。身外名何有。人閒事且休。

澹然方寸內。唯擬學虛舟。

初到郡齋寄錢湖州李蘇州

聊取二郡一晒。故用落句之戲。

俱來滄海郡。半作白頭翁。謾道風煙接。何曾笑語同。吏稀秋稅畢。客散晚亭空。霽後當樓月。潮來滿座風。雪溪殊冷僻。茂苑太繁雄。唯此錢塘郡。閒忙恰得中。

對酒自勉

五十江城守。停杯一自思。頭仍未盡白。官亦不全卑。榮寵尋過分。歡娛已校遲。肺傷雖怕酒。心健尚誇詩。醉舞吳娘袖。春歌蠻子詔。猶堪三五歲。相伴醉花時。

郡樓夜宴留客

北客勞相訪。東樓爲一開。寒簾待月出。把火看潮來。豔聽竹枝曲。香傳蓮子杯。寒天殊未曉。歸騎且遲迴。

醉題候仙亭

蹇步垂朱綬。華纓映白鬚。何因駐衰老。只有且歡娛。酒興還應在。詩情可便無。登山與臨水。猶未要人扶。

東院

松下軒廊竹下房。

暖簷晴日滿繩牀。

淨名居士經三卷。

榮啓先生琴一張。

老去齒衰嫌橘醋。

病來肺渴覺茶香。

有時閒酌無人伴。

獨自騰騰入醉鄉。

虛白堂

虛白堂前衙退後。

更無一事到中心。

移牀就日檐閒臥。

臥詠閒詩側枕琴。

閒夜詠懷因招周協律劉薛二秀才

世名檢束爲朝士。

心性疎慵是野夫。

高置寒燈如客店。

深藏夜火似僧爐。

香濃酒熟能嘗否。

冷澹詩成肯和無。

若厭雅嗔須俗飲。

妓筵勉力爲君鋪。

晚興

極浦收殘雨。

高城駐落暉。

山明虹半出。

松閣鶴雙歸。

閒吟倚新竹。

筠粉汙朱衣。

衰病

老與病相仍。

華簪髮不勝。

行多朝散藥。

睡少夜停燈。

性多移不得。

郡政謾如繩。

祿食分供鶴。

朝衣減施僧。

病中對病鶴

同病病夫憐病鶴。

精神不損翅翎傷。

未堪再舉摩霄漢。

只合相隨覓稻梁。

但作悲吟和喉嚨。

難將俗貌對昂藏。

唯應一事宜爲伴。

我髮君毛俱似霜。

夜歸

半醉閒行湖岸東。

馬鞭敲鐙響瓏玲。

萬株松樹青山上。

十里沙堤明月中。

樓角漸移當路影。

潮頭欲過滿江風。

歸來未放笙歌散。

畫戟門開蠟燭紅。

臘後歲前遇景詠意

海梅半白柳微黃。

凍水初融日欲長。

度臘都無苦霜霰。

迎春先有好風光。

郡中起晚聽衙鼓。

城上行慵倚女牆。

公事漸閒身且健。

使君殊未厭餘杭。

白髮

雪髮隨梳落。

霜毛繞鬢垂。

加添老氣味。

改變舊容儀。

最憎明鏡裏。

黑白半頭時。

錢湖州以箸下酒李蘇州以五酸酒相次寄到無因同飲聊詠所懷

勞將箸下忘憂物。

寄與江城愛酒翁。

鐺脚三州何處會。

甕頭一盞幾時同。

傾如竹葉盈樽綠。

飲作桃花上面紅。

莫怪殷勤最相憶。

曾陪西省與南宮。

花樓望雪命宴賦詩

連天際海白皚皚。

好上高樓望一回。

何處更能分道路。

此時兼不認池臺。

萬重雲樹山頭翠。

百尺花樓江畔開。

素壁聯題分韻句。

紅爐巡飲暖寒杯。

冰鋪湖水銀爲面。

風卷汀沙玉作堆。

絳惹舞人春艷曳。

勾留醉客夜徘徊。

偷將虛白堂前鶴

失卻樟亭驛後梅

別有故情偏憶得

曾經窮苦照書來

晚歲

壯歲忽已去

浮榮何足論

身為百口長

官是一州樽

病難施郡政

老未答君恩

歲暮別兄弟

年衰無子孫

擘帶知腰瘦

看燈覺眼昏

不緣衣食繫

尋合返丘園

宿竹閣

晚坐松檐下

宵眠竹閣閒

清虛當服藥

幽獨抵歸山

無勞別修道

即此是玄關

歲暮枉衢州張使君書并詩因以長句報之

西州彼此意何如

官職蹉跎歲欲除

浮石潭邊停五馬

望濤樓上得雙魚

萬言舊手才難敵

言張會應萬言登科五字新題思有餘

貧薄詩家無好物

反投桃李報瓊琚

和薛秀才尋梅花同飲見贈

忽驚林下發寒梅

便試花前飲冷杯

白馬走迎詩客去

紅筵鋪待舞人來

歌聲怨處微微落

酒氣醺時旋旋開

若到歲寒無雨雪

猶應醉得兩三回

與諸客空腹飲

隔宿書招客

平明飲暖寒

麴神寅日合

酒聖卯時歡

促膝纔飛白

醜顏已渥丹

碧籌攢米椀

紅袖拂毬盤

醉後歌尤異

狂來舞可難

拋杯語同坐

莫作老人看

白樂天詩後集卷一

格詩

凡八十
九首

郡齋暇日辱常州陳郎中使君早晚坐水西館書事詩十六韻見寄亦以

十六韻酬之

新年多暇日

晏起褰簾坐

睡足心更慵

日高頭未裹

徐傾下藥酒

誰伴寂寥身

無絃琴在左

遙思毘陵館

春深物嫋娜

波拂黃柳梢

衙門排曉戟

鈴閣開朝鎖

太守水西來

朱衣乘素舸

良辰不易得

五馬正相望

雙魚忽前墮

魚中獲瑰寶

持翫何磊砢

一百六十言

上申心款曲

下敘時輻輳

才富不如君

道孤還似我

敢辭官遠慢

勿復問榮枯

冥心無不可

官舍

高樹換新葉

陰陰覆地隅

何言太守宅

有似幽人居

太守臥其下

起嘗一甌茗

行讀一卷書

早梅結青實

殘櫻落紅珠

稚女弄庭果

嬉戲牽人裾

是日晚彌靜。巢禽下相呼。嘖嘖護兒鵲。啞啞母子烏。豈唯云鳥爾。吾亦引吾雛。

吾雛

吾雛字阿羅。阿羅纔七齡。嗟吾不才子。憐爾無弟兄。撫養雖驕騃。性識頗聰明。學母畫眉樣。效吾詠詩聲。我齒今欲墮。汝齒昨始生。我頭髮盡落。汝頂髻初成。老幼不相待。父衰汝孩嬰。緬想古人心。慈愛亦不輕。蔡邕念文姬。于公歎緹縈。敢求得汝力。但未忘父精。

題小橋前新竹招客

鴈齒小虹橋。垂簷低白屋。橋前何所有。冉冉新生竹。皮開坼褐錦。節露抽青玉。筠翠如可餐。粉霜不忍觸。閒吟聲未已。幽翫心難足。管領好風煙。輕欺凡草木。誰能有月夜。伴我林中宿。為君傾一杯。狂歌竹枝曲。

病中逢秋招客夜酌

不見詩酒客。臥來半月餘。合和新藥草。尋檢舊方書。晚霽煙景度。早涼牕戶虛。雪生衰鬢久。秋入病心初。臥簟斲竹冷。風襟邛葛疎。夜來身校健。小飲復何如。

醉歌

示妓人商玲瓏

罷胡琴。掩秦瑟。玲瓏再拜歌初畢。誰道使君不解歌。聽唱黃雞與白日。

黃雞催曉丑時鳴。

白日催年酉時沒。

腰閒紅綬繫未穩。

鏡裏朱顏看已失。

玲瓏玲瓏奈老何。

使君歌了汝更歌。

席上答微之

我住浙江西。君去浙江東。勿言一水隔。便與千里同。富貴無人勸君酒。今宵為我盡杯中。

蘇州李中丞以元日郡齋感懷詩寄微之及予。輒依來篇七言八韻。走筆

奉答兼呈微之

白首餘杭白太守。落魄拋名來已久。一辭渭北故園春。再把江南新歲酒。杯前笑歌徒勉強。鏡裏形容漸衰朽。領郡慙當潦倒年。鄰州喜得平生友。長洲草接松江岸。曲水花連鏡湖口。老去還能痛飲無。春來曾作閒遊否。憑鶯傳語報李六。倩雁將書與元九。莫嗟一日日催人。且貴一年年入手。

食飽

食飽拂枕臥。睡足起閒吟。淺酌一杯酒。緩彈數聲琴。既可暢情性。亦足傲光陰。誰知利盡無。無復長安心。

十八郎中在郡日。改制東南樓。因名清輝。未立標榜。微歸郎署。予既到郡。

性愛樓居。宴遊其閒。頗有幽致。聊成十韻。兼戲寄嚴

嚴郎制茲樓。立名曰清輝。未及署花榜。遽徵還粉闈。去來三四年。塵土登者稀。今春新太守。洒掃施簾幃。院柳煙婀娜。簷花雪霏微。看山倚前戶。待月闌東扉。碧窗夏瑤瑟。朱欄飄舞衣。燒香捲幕坐。風燕雙雙飛。君作不得住。我來幸因依。始知天地閒。靈境有所歸。

南亭對酒送春

含桃實已落。紅薰花尚薰。冉冉三月盡。晚鶯城上聞。獨持一杯酒。南亭送殘春。半酣忽長歌。歌中何所云。云我五十餘。未是苦老人。刺史二千石。亦不為賤貧。天下三品官。多老於我身。同年登第者。零落無一分。親故半為鬼。僮僕多見孫。念此聊自解。逢酒且歡欣。

翫新庭樹因詠所懷

靄靄四月初。新樹葉成陰。動搖風景麗。蓋覆庭院深。下有無事人。竟日此幽尋。豈唯翫時物。亦可開煩襟。時與道人語。或聽詩客吟。度春足芳色。入夜多鳴禽。偶得幽閑境。遂忘塵俗心。始知真隱者。不必在山林。

仲夏齋戒月

仲夏齋戒月。三旬斷腥羶。自覺心骨爽。行起身翩翩。始知絕粒人。四體更輕便。初能脫病患。久必成神仙。禦寇馭冷風。赤松游紫煙。常疑此說謬。今乃知其然。我年過半百。氣衰神不全。已垂兩鬢絲。難補三丹田。但減蕙血味。稍結清淨緣。脫巾且修養。聊以終天年。

除官去未閒

除官去未閒。半月恣遊討。朝尋霞外寺。暮宿波上島。新樹少於松。平湖半連草。躋攀有次第。賞翫無昏早。有時騎馬醉。兀兀冥天造。窮通與生死。其奈吾懷抱。江山信為美。齒髮行將老。在郡誠未厭。歸鄉去亦好。

三年為刺史二首

三年為刺史。無政在人口。唯向郡城中。題詩十餘首。慙非甘棠詠。豈有思人否。

【二】

三年為刺史。飲冰復食蘘。唯向天竺山。取得兩片石。此抵有千金。無乃傷清白。

別萱桂

使君竟不住。萱桂徒栽種。桂有畱人名。萱無忘憂用。不如江畔月。步步來相送。

自餘杭歸宿淮口作

爲郡已多暇。猶少勤吏職。罷郡更安閑。無所勞心力。舟行明月下。夜泊清淮北。豈止吾一身。舉家同燕息。三年請祿俸。頗有餘衣食。乃至僮僕閒。皆無凍餒色。行行弄雲水。步步近鄉國。妻子在我前。琴書在我側。此外吾不知。於焉心自得。

舟中李山人訪宿

日暮舟悄悄。煙生水沈沈。何以延宿客。夜酒與秋琴。來客道門子。來自嵩高岑。軒軒舉雲貌。豁豁開清襟。得意言語斷。入玄滋味深。默然相顧哂。心適而忘心。

洛下卜居

三年典郡歸。所得非金帛。天竺石兩片。華亭鶴一隻。飲啄供稻粱。包裹用茵席。誠知是勞費。其奈心愛惜。遠從餘杭郭。同到洛陽陌。下擔拂雲根。開籠展霜翮。貞姿不可雜。高性宜其適。遂就無塵坊。仍求有水宅。東南得幽境。樹老寒泉碧。池畔多竹陰。門前少人跡。未請中庶祿。且脫雙驂易。豈獨爲身謀。安吾鶴與石。

洛中偶作

自此後在東都作

五年職翰林。四年涖潯陽。一年巴郡守。半年南宮郎。二年直綸閣。三年刺史堂。凡此十五載。有詩千餘章。境興周萬象。土風備四方。獨無洛中作。能不心悵悵。今爲春宮長。始來遊此鄉。徘徊伊澗上。睥睨嵩年傍。遇物輒一詠。一詠傾一觴。

筆下成釋憾。卷中同補亡。往往顧自哂。眠昏遷蒼蒼。不知老將至。猶自放詩狂。

贈蘇少府

籍甚二十年。今日方款顏。相送嵩洛下。論心杯酒閒。何爲懶出入。府寮多閉關。蒼髮彼此老。白日尋常閑。朝欲攜手出。暮思聯騎還。何當挈一榼。同宿龍門山。

移家入新宅

移家入新宅。罷郡有餘資。既可避燥濕。復免憂寒飢。疾平未還假。官閒得分司。幸有俸祿在。而無職役羈。清且盪漱畢。開軒卷簾幃。家人及雞犬。隨我亦熙熙。取興不過酒。放情或作詩。何必苦修道。此卽是無爲。外累信已遣。中懷時有思。有思一何遠。默坐低雙眉。十載囚竄客。萬里征戍兒。春朝鑲籠鳥。冬夜支牀龜。驛馬走四蹄。痛酸無歇期。磴牛封兩目。昏閉何人知。誰能脫放去。四散任所之。各得適其性。如吾今日時。

琴

置琴曲几上。慵坐但含情。何煩故揮弄。風絃自有聲。

鶴

人各有所好。物固無常宜。誰謂爾能舞。不如閑立時。

自詠

夜鏡隱白髮。朝酒發紅顏。可憐假年少。自笑須臾閒。朱砂賤如土。不解燒爲丹。玄鬢化爲雪。未聞休得官。咄哉箇丈夫。心性何墮頑。但遇詩與酒。便忘寢與餐。高聲發一吟。似得詩中仙。引滿飲一瓊。盡忘身外緣。昔有醉先生。席地而幕天。于今居處在。許我當中眠。眠罷又一酌。酌罷又一篇。回面顧妻子。生計方落然。誠知此事非。又過知非年。豈不欲自改。改卽心不安。且向安處去。其餘皆老閑。

林下閒步寄皇甫庶子

扶杖起病初。策馬力未任。既懶出門去。亦無客來尋。以此遂成閒。閒步遶園林。天曉煙景淡。樹寒鳥雀深。一酌池上酒。數聲竹間吟。寄言東曹長。當知幽獨心。

晏起

鳥鳴庭樹上。日照屋簷時。老去慵轉極。寒來起尤遲。厚薄被適性。高低枕得宜。神安體穩暖。此味何人知。睡足仰頭坐。兀然無所思。如未鑿七竅。若都遺四肢。緬想長安客。早朝霜滿衣。彼此各自適。不知誰是非。

池畔二首

結構池西廊。疏理池東樹。此意人不知。欲爲待月處。

〔一〕

持刀剝密竹。竹少風來多。此意人不曾。欲令池有波。

春葺新居

江州司馬日。忠州刺史時。栽松滿後院。種柳蔭前墀。彼皆非吾土。栽種尙忘疲。況茲是我宅。葺藝固其宜。平旦領僕使。乘春親指揮。移花夾暖室。徙竹覆寒池。池水變綠色。池芳動清輝。尋芳弄水坐。盡日心熙熙。一物苟可適。萬緣都若遺。設如宅門外。有事吾不知。

贈言

捧籛獻千金。彼金何足道。繼觴贈一言。此言真可寶。流光我已晚。適意君不早。況君春風面。柔促如芳草。二十方長成。三十向衰老。鏡中桃李色。不得十年好。胡爲坐脈脈。不肯傾懷抱。

泛春池

白蘋湘渚曲。綠篠剡溪口。各在天一涯。信美非吾有。如何此庭內。水竹交左右。霜竹百千竿。煙波六七畝。泓澄動堦砌。淡泞映戶牖。蛇皮細有紋。鏡面清無垢。主人過橋來。雙童扶一叟。恐汗清冷波。塵纓先抖擻。波上一葉舟。舟中一樽酒。

酒開舟不繫。去去隨所偶。或遠蒲浦前。或泊桃島後。未撥落杯花。低衝拂面柳。半酣迷所在。倚榜兀回首。不知此何處。復是人寰否。誰知始疏鑿。幾主相傳受。楊家去云遠。田氏將非久。天與愛水人。終焉落吾手。

郡齋旬假命宴呈座客示郡寮

自後在蘇州作

公門日兩衙。公假月三旬。衙用決簿領。旬以會親賓。公多及私少。勞逸常不均。況爲劇郡長。安得閒宴頻。下車已二月。開筵始今晨。初黔軍厨突。一拂郡榻塵。既備獻酬禮。亦具水陸珍。萍醅若溪醕。水鱸松江鱗。侑食樂懸動。佐權妓席陳。風流吳中客。佳麗江南人。歌節點隨袂。舞香遺在茵。清奏凝未闋。醜顏氣已春。衆賓勿遽起。羣寮且逡巡。無輕一日醉。用犒九日勤。微彼九日勤。何以治吾民。微此一日醉。何以樂吾身。

題西亭

朝亦視簿書。暮亦視簿書。簿書視未竟。蟋蟀鳴座隅。始覺芳歲晚。復嗟塵務拘。西園景多暇。可以少躊躇。池鳥澹容與。橋柳高扶疎。煙蔓嫋青蘚。水花披白蕖。何人造茲亭。華敞綽有餘。四檐軒鳥翅。複屋羅蜘蛛。直廊抵曲房。竚深且虛。修竹夾左右。清風來徐徐。此宜宴佳賓。鼓瑟吹笙竽。荒淫卽不可。廢曠將何如。

幸有酒與樂。及時歡且娛。忽其解郡印。他人來此居。

郡中西園

閒園多芳草。春夏香靡靡。深樹足佳禽。旦暮鳴不已。院門閉松竹。庭徑穿蘭芷。愛彼池上橋。獨來聊徙倚。魚依藻長樂。鷗見人暫起。有時舟隨風。盡日蓮照水。誰知郡府內。景物閒如此。始悟諠靜緣。何嘗繫遠邇。

北亭臥

樹綠晚陰合。池涼朝氣清。蓮開有佳色。鶴唳無凡聲。唯此閒寂境。愜我幽獨情。病假十五日。十日臥茲亭。明朝吏呼起。還復視黎甿。

一葉落

煩暑鬱未退。涼飈潛已起。寒溫與盛衰。遞相爲表裏。蕭蕭秋林下。一葉忽先萎。勿言一葉微。搖落從此始。

崔湖州贈紅石琴薦煥如錦文無以答之以詩酬謝

頽錦支綠綺。韻同相感深。千年古澗石。八月秋堂琴。引出山水思。助成金玉音。人閒無可比。比我與君心。

九日宴集醉題郡樓兼呈周殷二判官

前年九日在餘杭。呼賓命宴虛白堂。去年九日到東洛。今年九日來吳鄉。
 兩邊蓬鬢一時白。三處菊花同色黃。一日日知添老病。一年年覺惜重陽。
 江南九月未搖落。柳青蒲綠稻穠香。姑蘇臺榭倚蒼靄。太湖山水含清光。
 可憐假日好天色。公門吏靜風景涼。榜舟鞭馬取賓客。掃樓拂席排壺觴。
 胡琴錚鏦指撥刺。吳娃美麗眉眼長。笙歌一曲思凝絕。金鈿再拜光低昂。
 日脚欲落備燈燭。風頭漸高加酒漿。觥盞灑飛茵茗葉。舞鬢擺落茱萸房。
 半酣憑檻起四顧。七堰八門六十坊。遠近高低寺閒出。東西南北橋相望。
 水道脈分棹鱗次。里閭碁布城冊方。人煙樹色無隙罅。十里一片青茫茫。
 自問有何才與政。高廳大館居中央。銅魚今乃澤國節。刺史自古吳都王。
 郊無戎馬郡無事。門有檠戟腰有章。盡時儻來合慚愧。壯歲忽去還感傷。
 從事醒歸應不可。使君醉倒亦何妨。請君停杯聽我語。此語真實非虛狂。
 五旬已過不爲天。七十爲期蓋是常。須知菊酒登高會。從此多無二十場。

同微之贈別郭虛舟鍊師五十韻

我爲江司馬。君爲荆判司。俱當愁悴日。始識虛舟師。師年三十餘。白哲好容儀。
 專心在鉛汞。餘力工琴棋。靜彈絃數聲。閒飲酒一卮。因指塵土下。蜉蝣良可悲。

不聞姑射上。千歲冰雪肌。不見遼城外。古今塚纍纍。嗟我天地間。有術人莫知。
 得可逃死籍。不唯走三尸。授我參同契。其辭妙且微。六一闕扁鑄。子午守雄雌。
 我讀隨日悟。心中了無疑。黃芽與紫車。謂其坐致之。自負因自歎。人生號男兒。
 若不佩金印。卽合翳玉芝。高謝入閒世。深結山中期。泥壇方合矩。鑄鼎圓中規。
 鑪橐一以動。瑞氣紅輝輝。齊心獨歎拜。中夜偷一窺。二物正訢合。厥狀何怪奇。
 綢繆夫婦體。狎獵魚龍姿。簡寂館鐘後。紫霄峰曉時。心塵未淨潔。火候遂參差。
 萬壽覬刀圭。千功失毫釐。先生彈指起。蛇女隨煙飛。始知緣會閒。陰隲不可移。
 藥竈今夕罷。詔書明日追。追我復追君。次第承恩私。官雖小大殊。同立白玉墀。
 我直紫微闈。手進賞罰詞。君侍玉皇座。口含生殺機。直躬易媒孽。浮俗多瑕疵。
 轉徙今安在。越嶠吳江湄。一提支郡印。一建連帥旗。何言四百里。不見如天涯。
 秋風旦夕來。白日西南馳。雪霜各滿鬢。朱紫徒爲衣。師從廬山洞。訪舊來於斯。
 尋君又覓我。風馭紛逶迤。帔裾曳黃絹。鬚髮垂青絲。逢人但斂手。問道亦頷頤。
 孤雲難久留。十日告將歸。款曲話平昔。殷勤勉衰羸。後會杳何許。前心日磷緇。
 俗家無異物。何以充別資。素牋一百句。題附元家詩。朱頂鶴一隻。與師雲閒騎。
 雲閒鶴背上。故情若相思。時時摘一句。唱作步虛辭。

霓裳羽衣舞歌

和微之。○按今本無舞字。

我昔元和侍憲皇。曾陪內宴宴昭陽。千歌萬舞不可數。就中最愛霓裳舞。
 舞時寒食春風天。玉鉤欄下香案前。案前舞者顏如玉。不著人家俗衣服。
 虹裳霞帔走搖冠。鈿瓔纍纍珮珊珊。娉婷似不任羅綺。顧聽樂懸行復止。
 磬簫箏笛遞相攙。擊擗彈吹聲遞迤。散序六奏未動衣。陽臺宿雲慵不飛。
 中序擘騷初入拍。秋竹竿裂春冰拆。飄然轉旋迴雪輕。嫋然縱送游龍驚。
 小垂手後柳無力。斜曳裾時雲欲生。煙蛾斂略不勝態。風袖低昂如有情。
 上元點鬢招蓂緣。王母揮袂別飛瓊。繁音急節十二遍。當時乍見驚心目。
 翔鸞舞了卻收翅。喉鶴曲終長引聲。耳冷不曾聞此曲。溢城但聽山舳語。
 一落人閒八九年。始有心情問絲竹。玲瓏篳篥謝好箏。巴峽唯聞杜鵑哭。
 移領錢塘第二年。始有心情問絲竹。教得霓裳一曲成。虛白亭前胡水畔。
 清絃脆管纖纖手。聞道如今各星散。今年五月至蘇州。前後祇應三度按。
 便除庶子拋卻來。不聽笙歌直到秋。秋來無事多閒悶。朝鐘暮角催白頭。
 貪看案牘常侵夜。聞有霓裳舞者無。答云七縣十萬戶。無人知有霓裳舞。
 聞君部內多樂徒。

唯寄長歌與我來。

題作霓裳羽衣譜。

四幅花牋碧閒紅。

霓裳實錄在其中。

千姿萬狀分明見。

恰與昭陽舞者同。

眼前髣髴觀形質。

昔日今朝想如一。

疑從魂夢呼召來。

似著丹青圖寫出。

我愛霓裳君合知。

發於歌詠形於詩。

君不見我歌云驚破霓裳羽衣曲。

又不見我詩云曲愛霓裳未拍時。

由來能事皆有主。

楊氏創聲君造譜。

君言此舞難得人。

須是傾城可憐女。

吳妖小玉飛作煙。

越豔西施化爲土。

嬌花巧笑久寂寥。

娃館苧蘿空處所。

如君所言誠有是。

君試從容聽我語。

若求國色始翻傳。

但恐人閒廢此舞。

妍媸優劣寧相遠。

大都只在人擡舉。

亦擬隨宜且教取。

小童薛陽陶吹簫栗歌

和浙西李大夫作

剪削乾蘆插寒竹。九孔漏聲五音足。近來吹者誰得名。關隴老死李袁生。
 衰今又老誰其嗣。薛氏樂童年十二。指點之下師授聲。含嚙之閉天與氣。
 潤州城高霜月明。吟霜思月欲發聲。山頭江底何悄悄。猿聲不喘魚龍聽。
 翕然聲作疑管裂。訕然聲盡疑刀截。有時婉軟無筋骨。有時頓挫生稜節。
 急聲圓轉促不斷。轢轢麟麟似珠貫。緩聲展引長有條。有條直直如筆描。
 下聲乍墜石沈重。高聲忽舉雲飄蕭。明旦公堂陳宴席。主人命樂娛賓客。

碎絲細竹徒紛紛。宮調一聲雄出羣。衆音颯縷不落道。有如部伍隨將軍。嗟爾陽陶方穉齒。下手發聲已如此。若教頭白吹不休。但恐聲名壓關李。

喙木曲

按才調集·文苑英華並作四不如酒

莫買寶剪刀。虛費千金直。我有心中愁。知君剪不得。莫磨解結錐。虛勞入氣力。我有腸中結。知君解不得。莫染紅絲線。徒誇好顏色。我有雙淚珠。知君穿不得。莫近紅爐火。炎氣徒相逼。我有兩鬢霜。知君消不得。刀不能剪。心愁。雖不能解腸結。線不能穿淚珠。火不能銷鬢雪。不如飲此神聖杯。萬念千憂一時歇。

題靈巖寺

寺即吳館娃宮。鳴屨廊。硯池。採香徑遺跡在焉。

娃宮屨廊尋已傾。硯池香徑又欲平。二三月時但草綠。幾百年來空月明。使君雖老頗多思。攜觴領妓處處行。今愁古恨入絲竹。一曲涼州無限情。直自當時到今日。中間歌吹更無聲。

雙石

蒼然兩片石。厥狀怪且醜。俗用無所堪。時人嫌不取。結從胚渾始。得自洞庭口。萬古遺水濱。一朝入吾手。擔舁來郡內。洗刷云泥垢。孔黑煙痕深。罅青苔色厚。

老蛟蟠作足。古劍插爲首。忽疑天上落。不似人間有。一可支吾琴。一可貯吾酒。峭絕高數尺。坳泓容一斗。五絃倚其左。一杯置其右。窪樽酌未空。玉山頽已久。人皆有所好。物各求其偶。漸恐少年場。不容垂白叟。迴頭問雙石。能伴老夫否。石雖不能言。許我爲三友。

宿東亭曉興

溫溫土爐火。耿耿紗籠燭。獨抱一張琴。夜入東齋宿。窗聲渡殘漏。簾影浮初旭。頭癢曉梳多。眼昏春睡足。負暄檐宇下。散步池塘曲。南鴈去未迴。東風來何速。雪依瓦溝白。草遶牆根綠。何言萬戶州。太守常幽獨。

日漸長贈周殷二判官

日漸長。春尙早。墻頭半露紅萼枝。池岸新鋪綠芽草。蹋草攀枝仰頭歎。何人知此春懷抱。年顏盛壯名未成。官職欲高身已老。萬莖白髮真堪恨。一片緋衫何足道。賴得君來勸一杯。愁開悶破心頭好。

花前歎

前歲花前五十二。今年花前五十五。歲課年功頭髮知。從霜成雪君看取。幾人得老莫自嫌。樊李吳韋盡成土。南州桃李北州梅。且喜年年作花主。

花前置酒誰相勸。容坐唱歌滿起舞。欲散重拈花細看。爭知明日無風雨。

自詠五首

朝亦隨羣動。暮亦隨羣動。榮華舜息閒。求得將何用。形骸與冠蓋。假合相戲弄。何異睡著人。不知夢是夢。

【一】

一家五十口。一郡十萬戶。出爲差科頭。入爲衣食主。水旱合心憂。飢寒須手撫。何界食蓼蟲。不知苦是苦。

【三】

公私頻多事。衰憊殊少歡。迎送賓客懶。鞭笞黎庶難。老耳倦聲樂。病口厭杯盤。既無可戀者。何以不休官。

【四】

一日復一日。自問何畱滯。爲貪逐日俸。擬作歸田計。亦須隨豐約。可得無限劑。若待足始休。休官在何歲。

【五】

官舍非我廬。官園非我樹。洛中有小宅。渭上有別墅。既無娘嫁累。幸有歸休處。

歸去誠已遲。猶勝不歸去。

和微之聽妻彈別鶴操因爲解釋其義依韻加四句

義重莫若妻。生離不如死。誓將死同穴。其奈生無子。商陵迫禮教。婦出不能止。舅姑明且辭。夫妻中夜起。起聞雙鶴別。若與人相似。聽其悲唳聲。亦如不得已。青田八九月。遼城一萬里。徘徊去住雲。嗚咽東西水。寫之在琴曲。聽者酸心髓。況當秋月彈。先入憂人耳。怨抑掩朱絃。沈吟停玉指。一聞無兒歎。相念兩如此。無兒雖薄命。有妻偕老矣。幸免生別離。猶勝商陵氏。

題故元少尹集後二首

黃壤詎知我。白頭徒憶君。唯將老年淚。一灑故人文。

【二】

遺文三十軸。軸軸金玉聲。龍門原上土。埋骨不埋名。

和微之四月一日作

四月一日天。花稀葉陰薄。泥新燕影忙。蜜熟蜂聲樂。麥風低冉冉。稻水平漠漠。芳節或蹉跎。遊心稍牢落。春華信爲美。夏景亦未惡。鮎浪嫩青荷。重欄晚紅藥。吳宮好風月。越郡多樓閣。兩地誠可憐。其奈久離索。

吳中好風景二首

吳中好風景。八月如三月。水荇葉仍香。木蓮花未歇。海天微雨散。江郭纖埃滅。暑退衣服乾。潮生船舫活。兩衙漸多暇。亭午初無熱。騎吏語使君。正是遊時節。

【二】

吳中好風景。風景無朝暮。曉色萬家煙。秋聲八月樹。舟移管絃動。橋擁旌旗駐。改號齊雲樓。重開武丘路。況當豐歲熟。好是歡遊處。州民勸使君。且莫拋官去。

答劉禹錫白太守行

吏滿六百石。昔賢輒去之。秩登二千石。今我方罷歸。我秩訝已多。我歸慙已遲。猶勝塵土下。終老無休期。臥乞百日告。起吟五篇詩。朝與府吏別。暮與州民辭。去年到郡時。麥穗黃離離。今年去郡日。稻花白霏霏。為郡已周歲。半歲罹旱飢。襦袴無一片。甘棠無一枝。何乃老與幼。泣別盡霑衣。下慙蘇人淚。上愧劉君辭。

別蘇州

浩浩姑蘇民。鬱鬱長洲城。來慙荷寵命。去愧無能名。青紫行將吏。班白列黎氓。一時臨水拜。十里隨舟行。饑筵猶未收。征棹不可停。稍隔煙樹色。尙聞絲竹聲。悵望武丘路。沈吟滸水亭。還鄉信有與。去郡能無情。

卯時酒

佛法讚醍醐。仙方誇沆瀣。未如卯時酒。神速功力倍。一杯置掌上。三嚙入腹內。煦若春貫腸。暄如日炙背。豈獨肢體暢。仍加志氣大。當時遺形骸。竟日忘冠帶。似遊華胥國。疑反混元代。一性既完全。萬機皆破碎。半醒思往來。往來吁可怪。寵辱憂喜閒。惶惶二十載。前年辭紫闥。今歲拋皂蓋。去矣魚返泉。超然蟬離蛻。是非莫分別。行止無疑礙。浩氣貯胸中。青雲委身外。捫心私自語。自語誰能會。五十年來心。未如今日泰。況茲杯中物。行坐長相對。

自問行何遲

前月發京口。今辰次淮涯。二旬四百里。自問行何遲。還鄉無他計。罷郡有餘資。進不慕富貴。退未憂寒飢。以此易過日。騰騰何所為。逢山輒倚棹。遇寺多題詩。酒醒夜深後。睡足日高時。眼底一無事。心中百不知。想到京國日。懶放亦如斯。何必冒風水。促促赴程歸。

除日答夢得同發楚州

共作千里伴。俱為一郡廻。歲陰中路盡。鄉思先春來。山雪晚猶在。淮冰晴欲開。歸歎吟可作。休戀主人杯。

問楊瓊

古人唱歌兼唱情。今人唱歌唯唱聲。欲說向君君不會。試將此語問楊瓊。

有感三首

鬢毛已斑白。衣綬方朱紫。窮賤當壯年。富榮臨暮齒。車輿紅塵合。第宅青煙起。彼來此須去。品物之常理。第宅非吾廬。逆旅暫畱止。子孫非我有。委蛻而已矣。有如蠶造繭。又似花生子。子結花暗凋。繭成蠶老死。悲哉可奈何。舉世皆如此。

【二】

莫養瘦馬駒。莫教小妓女。後事在目前。不信君看取。馬肥快行走。妓長能歌舞。三年五歲間。已聞換一主。借問新舊主。誰樂誰辛苦。請君大帶上。把筆書此語。

【三】

往事勿追思。追思多悲愴。來事勿相迎。相迎亦惆悵。不如兀然坐。不如塌然臥。食來即開口。睡來即合眼。二事最關身。安寢加餐飯。忘懷任行止。委命隨修短。更若有與來。狂歌酒一盞。

宿滎陽

生長在滎陽。少小辭鄉曲。迢迢四十載。復到滎陽宿。去時十一二。今年五十六。

追思兒戲時。宛然猶在目。舊居失處所。故里無宗族。豈唯變市朝。兼亦遷陵谷。

獨有溱洧水。無情依舊綠。

經溱洧

落日駐行騎。沈吟懷古情。鄭風變已盡。溱洧至今清。不見士與女。亦無芍藥名。

就花枝

就花枝。移酒海。今朝不醉明朝悔。且算歡娛逐日來。任他容鬢隨年改。

醉翻衫袖拋小令。笑擲骰盤呼大采。自量氣力與心情。三五年閒猶得在。

喜雨

圃旱憂葵堇。農早憂禾菽。人各有所私。我早憂松竹。松乾竹焦死。眷眷在心目。灑葉溉其根。汲水勞僮僕。油雲忽東起。涼雨淒相續。似面洗垢塵。如頭得膏沐。千柯習習潤。萬葉欣欣綠。千日澆灌功。不如一霖霖。方知宰生靈。何異活草木。所以聖與賢。同心調玉燭。

題道宗上人十韻并序

普濟寺律大德宗上人法堂中。有故相國鄭司徒。歸尚書陸刑部元少尹。及今吏部鄭相。中書韋相。錢左丞詩。覽其題皆與上人唱酬。閱其人皆朝賢。省其文皆義語。予始知上人

之文爲義作爲法作爲方便智作爲解脫性作不爲詩而作也知上人者云爾恐不知上人者謂爲護國法振靈一皎然之徒與故予題二十句以解之

如來說偈讚。菩薩著論議。是故宗律師。以詩爲佛事。一音無差別。四句有詮次。欲使第一流。皆知不二義。精潔露戒體。閒澹藏禪味。從容恣語言。縹緲離文字。旁延邦國彥。上達王公貴。先以詩句牽。後令入佛智。人多愛師句。我獨知師意。不似休上人。空多碧雲思。

寄星甫賓客

名利既兩忘。形體方自遂。臥掩羅雀門。無人驚我睡。睡足抖擻衣。閒步中庭地。食飽摩挲腹。心頭無一事。除卻玄晏翁。何人知此味。

寄庾侍郎

一雙華亭鶴。數片太湖石。巉巖蒼玉峯。矯矯青雲翮。是時歲云暮。淡薄煙景夕。庭霜封石稜。池雪印鶴迹。幽致竟誰別。閒靜聊自適。懷哉庾順之。好是今宵客。

寄崔少監

微微西風生。稍稍東方明。入秋神骨爽。琴曉絲桐清。彈爲古宮調。玉水寒冷冷。自覺絃指下。不是尋常聲。須臾羣動息。掩琴坐空庭。直至日出後。猶得心和平。

惜哉意未已。不使崔君聽。

醉題沈子明壁

不愛君池東十叢菊。不愛君池南萬竿竹。愛君簾下唱歌人。色似芙蓉聲似玉。我有陽關君未聞。若聞亦應愁殺君。

勸酒

勸君一杯君莫辭。勸君兩杯君莫疑。勸君三杯君始知。面上今日老昨日。心中醉時勝醒時。天地迢迢自長久。白兔赤烏相趁走。身後堆金挂北斗。不如生前一樽酒。君不見春明門外天欲明。喧喧歌哭半死生。遊人駐馬出不得。白輦素車爭路行。歸去來。頭已白。典錢將用買酒喫。

落花

留春春不住。春歸人寂寞。厭風風不定。風起花蕭索。既興風前歎。重命花下酌。勸君嘗綠醕。教人拾紅萼。桃飄火焰焰。梨墮雪漠漠。獨有病眼花。春風吹不落。

對鏡吟

白頭老人照鏡時。掩鏡沈吟吟舊詩。二十年前一莖白。如今變作滿頭絲。吟罷迴頭索杯酒。醉來屈指數親知。老於我者多窮賤。設使身存寒且飢。

少於我者半爲土。墓樹已抽三五枝。我今幸得見頭白。祿俸不薄官不卑。眼前有酒心無苦。只合歡娛不合悲。

耳順吟寄敦詩夢得

三十四十五慾牽。七十八十百病纏。五十六十卻不惡。恬淡清淨心安然。已過愛貪聲利後。猶在病羸昏耄前。未無筋力尋山水。尙有心情聽管絃。閒開新酒嘗數盞。醉憶舊詩吟一篇。敦詩夢得且相勸。不用嫌他耳順年。

別氈帳火爐

憶昨臘月天。北風三尺雪。年老不禁寒。夜長安可徹。賴有青氈帳。風前自張設。復此紅火爐。雪中相暖熱。如魚入淵水。似兔藏深穴。婉軟墊鱗蘇。溫燉凍肌活。方安陰慘夕。遽變陽和節。無奈時候遷。豈是恩情絕。毳簾逐日卷。香燎隨灰滅。離恨屬三春。佳期在十月。但令此身健。不作多時別。

六年春贈分司東都諸公

時爲河南尹

我爲同州牧。內愧無才術。忝擢恩已多。遭逢幸非一。偶當穀賤歲。適值民安日。郡縣獄空虛。鄉閭盜奔逸。其閒最幸者。朝客多分秩。行接鴛鴦羣。坐成芝蘭室。時聯拜表騎。閒動題詩筆。夜雪秉燭遊。春風攜榼出。花教鶯點檢。柳付風排比。

法酒澹清漿。含桃爛紅實。洛童調金管。盧女鏗瑤瑟。黛慘歌思深。腰凝舞拍密。每因同醉樂。自覺忘衰疾。始悟肘後方。不如杯中物。生涯隨日過。世事何時畢。老子若乖慵。希君數牽率。

九日代羅樊二妓招舒著作

齊梁格

羅敷斂雙袂。樊姬獻一杯。不見舒員外。秋菊爲誰開。

憶舊遊

寄劉蘇州

憶舊遊

舊遊安在哉。

舊遊之人半白首。

舊遊之地多蒼苔。

江南舊遊凡幾處。就中最憶吳江隈。長洲苑綠柳萬樹。齊雲樓春酒一杯。閨門曉嚴旗鼓出。皐橋夕開船舫迴。修蛾慢臉燈下醉。急管繁絃頭上催。六七年前狂爛熳。三千里外思徘徊。李娟張態一春夢。周五殷三歸夜臺。虎丘月色爲誰好。娃宮花枝應自開。賴得劉郎解吟詠。江山氣色合歸來。

答崔賓客晦叔十二月四日見寄

來篇云。共相呼喚醉歸來。

今歲日餘二十六。來歲年登六十二。尙不能憂眼下身。因何更算人閒事。居士忘筌默默坐。先生枕麴昏昏睡。早晚相歸從醉鄉。醉鄉去此無多地。

勸我酒

勸我酒。我不辭。請君歌。歌莫遲。歌聲長。辭亦切。此辭聽者堪愁絕。

洛陽女兒面似花。河南大尹頭如雪。

贈韋處士。六年夏大熱旱。驕陽連毒暑。動植皆枯槁。早日乾密雲。炎煙焦茂草。少壯猶困苦。況予病且老。既無白梅檀。何以除熱惱。華嚴經云。以白梅檀塗身。能除一切熱惱。而得清涼也。汗巾束頭鬢。羶食熏襟抱。

始覺韋山人。休糧散髮好。

除官赴闕畱贈微之。

去年十月半。君來過浙東。今年五月盡。我發向關中。兩鄉默默心相別。一水盈盈路不通。從此津人應省事。寂寥無復遞詩筒。

白樂天詩後集卷二

格詩

凡六十首

和微之詩二十三首并序

微之又以近作二十三首寄來。命僕繼和。其閒瘵絮四百字。車斜二十篇者流。皆韻劇辭。殫環奇怪譎。又題云。奉煩只此一度。乞不見辭。意欲定霸取威。置僕於窮地耳。大凡依次

用韻。韻同而意殊。約體爲文。文成而理勝。此足下素所長者。僕何有焉。今足下果用所長。過蒙見窘。然敵則氣作。急則計生。四十二章。麾掃竝畢。不知大敵以爲如何。夫鬪石破山。先觀鏖跡。發矢中的。兼聽弦聲。以足下來章。惟求相困。故老僕報語不覺大誇。況曩者唱酬。近來因繼已十六卷。凡千餘首矣。其爲敵也。當今不見。其爲多也。從古未聞。所謂天下英雄。唯使君與操耳。戲及此者。亦欲三千里外。一破愁顏。勿示他人。以取笑誚。樂天白。

和晨霞

此後在上都作

君歌仙氏真。我歌慈氏真。慈氏發真念。念此閻浮人。左命大迦葉。右召桓堤因。千萬化菩薩。百億諸鬼神。上自非想頂。下及風水輪。胎卵濕化類。蠢蠢難具陳。弘願在救拔。大悲忘辛勤。無論善不善。豈閒冤與親。扶開生盲眼。擺去煩惱塵。燭以智慧日。灑之甘露津。千界一時度。萬法無與隣。借問晨霞子。何如朝玉宸。

【二】和送劉道士遊天台

聞君夢遊仙。輕舉超世雰。握持尊皇節。統衛吏兵軍。靈旂星月象。天衣龍鳳紋。佩服交帶籙。諷吟藥珠文。闔宮縹緲閒。鈞樂依稀聞。齋心謁西母。瞑拜朝東君。煙霏子晉裾。霞爛麻姑裙。倏忽別真侶。悵望隨歸雲。人生同大夢。夢與覺誰分。況此夢中夢。悠哉何足云。假如金闕頂。設使銀河濱。既未出三界。猶應在五蘊。

飲嘔日月精。茹嚼沆瀣芬。尙是色香味。六塵之所熏。仙中有大仙。首出夢幻羣。慈光一照燭。奧法相細縑。不知萬齡暮。不見三光曛。一性自了了。萬緣徒紛紛。苦海不能漂。劫火不能焚。此是竺乾教。先生垂典墳。

【三】和栴沐寄道友

栴沐事朝謁。中門初動關。盛服去尙早。假寐須臾閒。鐘聲發東寺。夜色藏南山。停驂待五漏。人馬同時閒。高星祭金粟。落月沈玉環。出門向闕路。坦坦無阻艱。始出里北閉。稍轉市西闔。晨燭照朝服。紫爛復朱殷。由來朝廷士。一入多不還。因循擲白日。積漸凋朱顏。青雲已難致。碧落安能攀。但且知止足。尙可銷憂患。

【四】和祝蒼華

蒼華。髮神名。

日居復月諸。環迴照下土。使我玄雲髮。化爲素絲縷。稟質本羸劣。養生仍莽鹵。痛飲困連宵。悲吟飢過午。遂令頭上髮。種種無尺五。根稀比黍苗。梢細同釵股。豈是乏膏沐。非關栴風雨。最爲悲傷多。心焦衰落苦。餘者能有幾。落者不可數。秃似鵲填河。墮如烏解羽。蒼華何用祝。苦辭亦休吐。匹如剃頭僧。豈要巾冠主。

【五】和我年三首

我年五十七。榮名得幾許。甲乙三道科。蘇杭兩州主。才能本淺薄。心力虛勞苦。

何能隨衆人。終老於塵土。

【六】

我年五十七。歸去誠已遲。歷官十五政。數若珠纍纍。野萍始賓薦。場苗初繫維。因讀管蕭書。竊慕大有爲。及遭榮遇來。乃覺才力羸。黃紙詔頻草。朱輪車載脂。妻孥及僕使。皆免寒與飢。省躬私自愧。知我者微之。永懷山陰守。未遂嵩陽期。如何坐畱滯。頭白江之湄。

【七】

我年五十七。榮名得非少。報國竟何如。謀身猶未了。昔嘗速官謗。恩大而懲小。一黜鶴辭軒。七年魚在沼。將枯鱗再躍。經鍛翮重矯。白日上昭昭。青雲高渺渺。平生頗同病。老大宜相曉。紫綬足可榮。白頭不爲夭。夙懷慕箕穎。晚節期松篠。何當闕下來。同拜陳情表。

【八】和三月三十日四十韻

送春君何在。君在山陰署。憶我蘇杭時。春遊亦多處。爲君歌往事。豈敢辭勞慮。莫怪言語狂。須知酬答遽。江南臘月半。冰凍凝如瘡。寒景尙蒼茫。和風已吹噓。女墻城似竈。鴈齒橋如鋸。魚尾上滄淪。草芽生沮洳。律遲太蒨管。日暖羲和馭。

布澤木龍催。迎春土牛助。雨師習習灑。雲將飄飄翥。四野萬里晴。千山一時曙。
 杭土麗且康。蘇民富而庶。善惡有懲勸。剛柔無吐茹。雨衙少辭牒。四境稀書疏。
 俗以勞徠安。政因閒暇著。仙亭日登眺。虎丘時游豫。尋幽駐旌軒。選勝廻賓御。
 舟移溪鳥避。樂作林猿覩。池古莫耶沈。石奇羅刹踞。水苗泥易耨。畚粟灰難鋤。
 紫蕨抽出畦。白蓮埋在淤。萎花紅帶黯。濕葉黃含菸。鏡動波颭菱。雪迴風旋絮。
 手經攀桂馥。齒爲嘗梅楚。坐併船脚鼓。行多馬蹄趾。聖賢清濁醉。水陸鮮肥飮。
 魚鱸芥醬調。水葵鹽豉絮。雖微五袴詠。幸免兆人詛。但令樂不荒。何必遊無侶。
 吳苑僕尋罷。越城公尙據。舊遊幾客存。新宴誰人與。莫空文學酒。強下何曾筭。
 江上易優游。城中多毀譽。分應當自盡。事勿求人恕。我既無子孫。君仍畢婚娶。
 久爲雲雨別。終擬江湖去。范蠡有扁舟。陶潛有籃輿。兩心苦相憶。兩口遙相語。
 最恨七年春。春來各一處。

【九】和寄樂天

賢愚類相交。人情之大率。然自古今來。幾人號膠漆。近聞屈指數。元某與白乙。
 旁愛及弟兄。中權避家室。松筠與金石。未足喻堅密。在車如輪轅。在身如肘腋。
 又如風雲會。天使相召匹。不似勢利交。有名而無實。頃我在杭歲。值君之越日。

望愁來儀遲。宴惜流景疾。坐耀黃金帶。酌醪頰玉質。酣歌口不停。狂舞衣相拂。
 平生賞心事。施展十未一。會笑始啞啞。離嗟乃唧唧。餞筵纔收拾。征棹遽排比。
 後恨苦綿綿。前歡何卒卒。居人色慘澹。行子心紆鬱。風袂去時揮。雲帆望中失。
 宿醒和別思。目眩心忽忽。病魂黯然銷。老淚淒其出。別君只如昨。芳歲換六七。
 俱是官家身。後期難自必。

【十】和寄問劉白

時夢得與樂天方舟西上

正與劉夢得。醉笑大開口。適值此詩來。歡喜君知否。遂令高卷幕。兼遣重添酒。
 起望會稽雲。東南一回首。愛君金玉句。舉世誰人有。功用隨日新。資材本天授。
 吟哦不能散。自午將及酉。遂畱夢得眠。匡牀宿東牖。

【十一】和新樓北園偶集從孫公度周巡官韓秀才盧秀才范處士小

飲鄭侍御判官周劉二從事皆先歸

聞君新樓宴。下對北園花。主人既賢豪。賓客皆才華。初筵日未高。中飲景已斜。
 天地爲幕席。富貴如泥沙。嵇劉陶阮徒。不足置齒牙。臥甕鄙畢卓。落帽嗤孟嘉。
 芳草供枕藉。亂鶯助誼譁。醉鄉得道路。狂海無津涯。一歲春又盡。百年期不賒。
 同醉君勿辭。獨醒古所嗟。銷愁若沃雪。破悶如割瓜。稱觴起爲壽。此樂無以加。

歌聲凝貫珠。舞袖飄亂麻。相公謂四座。今日非自誇。有奴善吹笙。有婢彈琵琶。十指纖若笋。雙鬢驚如鵝。履寫起交雜。杯盤散紛拏。歸去勿擁遏。倒載逃難遮。明日宴東武。後日遊若耶。豈獨相公樂。謳歌千萬家。

【十二】和除夜作

君賦此詩夜。窮陰歲之餘。我和此詩日。微和春之初。老知顏狀改。病覺肢體虛。頭上毛髮短。口中牙齒疎。一落老病界。難逃生死墟。況此促促世。與君多索居。君在浙江東。榮駕方伯輿。我在魏闕下。謬乘大夫車。妻孥常各飽。奴婢亦盈廬。唯是利人事。比君全不如。我統十郎官。君領百吏胥。我掌四曹局。君管十鄉閭。君為父母君。大惠在資儲。我為刀筆吏。小惡乃誅鋤。君提七郡籍。我按三尺書。俱已佩金印。嘗同趨玉除。外寵信非薄。中懷何不據。恩光未報答。日月空居諸。磊落嘗許君。跼促應笑予。所以自知分。欲先歌歸歎。

【十三】和知非

因君知非問。詮較天下事。第一莫若禪。第二無如醉。禪能泯入我。醉可忘榮悴。與君次第言。為我少留意。儒教重禮法。道家養神氣。重禮足滋彰。養神多避忌。不如學禪定。中有甚深味。曠廓了如空。澄凝勝於睡。屏除默默念。銷盡悠悠思。

春無傷春心。秋無感秋淚。坐成真諦樂。如受空王賜。既得脫塵勞。兼應離慙愧。除禪其次醉。此說非無謂。一酌機即忘。三杯性咸遂。逐臣去室婦。降虜敗軍帥。思苦膏火煎。憂深局鎖祕。須憑百杯沃。莫惜千金費。便似罩中魚。脫飛生兩翅。勸君雖老大。逢酒莫迴避。不然即學禪。兩途同一致。

【十四】和望曉

休吟稽山曉。聽詠秦城旦。鳴鶴初有聲。宿鳥猶未散。丁丁漏向盡。鼕鼕鼓過半。南山青沈沈。東方白漫漫。街心若流水。城角如斷岸。星河稍隅落。宮闕方輪煥。朝車雷四合。騎火星一貫。赦奕冠蓋盛。熒煌朱紫爛。沙堤互墓池。市路遶龍斷。白日忽照耀。紅塵紛散亂。貴教過客避。榮任行人看。祥煙滿虛空。春色無邊畔。鷓鴣行候晷刻。龍尾登霄漢。臺殿暖宜攀。風光晴可翫。草鋪地茵褥。雲卷天幃幔。鶯雛佩綃綃。花遶衣粲粲。何言終日樂。獨起臨風歎。歎我同心人。一別春七換。相望山隔礙。欲去官羈絆。何日到江東。超然似張翰。

【十五】和李勢女

減一分太短。增一分太長。不朱面若花。不粉肌如霜。色為天下豔。心乃女中郎。自言重不幸。家破身未亡。人各有一死。此死職所當。忍將先人體。與主為疣瘡。

妾死主意快。從此兩無妨。願信赤心語。速即白刃光。南郡忽感激。卻立捨鋒鋌。撫背稱阿姉。歸我如歸鄉。竟以恩信待。豈止猜妬忘。由來机上肉。不足揮干將。南郡死已久。骨枯墓蒼蒼。願於墓上頭。立石鐫此章。勸誠天下婦。不令陰勝陽。

【十六】和酬鄭侍御東陽春悶放懷追越遊見寄

君得嘉魚置賓席。樂如南有嘉魚時。勁氣森爽竹竿竦。妍文煥爛芙蓉披。載筆在幕名已重。補袞於朝官尙卑。一緘疏入掩谷永。三都賦成排左思。自言拜辭主人後。離心蕩颺風前旗。東南門館別經歲。春眼悵望秋心悲。以上叙嘉魚昨日嘉魚來訪我。方駕同出何所之。樂遊原頭春尙早。百舌新語聲裊裊。日趁花忙向南坼。風催柳急從東吹。流年慚恍不饒我。美景鮮妍來爲誰。紅塵三條界阡陌。碧草千里鋪郊畿。斜雲展處羅文紙。惘然迴望天四垂。暮鐘遠近聲互動。暝鳥高下飛追隨。酒酣將歸未能去。悵然迴望天四垂。生何足養。嵇著論。途何足泣。楊漣洏。胡不花下伴春醉。滿酌綠酒聽黃鸝。嘉魚點頭時一歎。聽我此言不知疲。東西軒騎分逶迤。此詩勿遣閒人見。見恐與他爲笑資。白首舊寮知我者。憑君一詠向周師。

【十七】和自勸二首

稀稀疎疎遠籬竹。窄窄狹狹向陽屋。屋中有一曝背翁。委置形骸如土木。日暮半爐爇炭火。夜深一盞紗籠燭。不知有益及民無。二十年來食官祿。就暖移盤簷下食。防寒擁被帷中宿。秋官月俸八九萬。豈徒遣爾身溫足。勤操丹筆念黃沙。莫使飢寒囚滯獄。

【十八】

急景凋年急於水。念此攬衣中夜起。門無宿客共誰言。煖酒挑燈對妻子。自飲數杯妻一盞。餘酌分張與兒女。微酣靜坐未能眠。風霰蕭蕭打窗紙。自問有何才與術。入爲丞郎出刺史。爭知壽命短復長。豈得營營心不止。請看韋孔與錢崔。半月之閒四人死。

韋中書孔京兆錢尙書崔華州十五日閒相次而逝

【十九】和雨中花

真宰倒持生殺柄。閒物命長人短命。松枝上鶴著下龜。千年不死仍無病。人生不得似龜鶴。少去老來同旦暝。何異花開且暝閒。未落仍遭風雨橫。草得經年菜連月。唯花不與多時節。一年三百六十日。花能幾日供攀折。桃李無言難自訴。黃鶯解語憑君說。鶯雖爲說不分明。葉底枝頭謾饒舌。

【二十】和晨興因報問龜兒

冬且寒慘澹。雲日無晶輝。當此歲暮感。見君晨興詩。君詩亦多苦。苦在兄遠離。我苦不在遠。纏綿肝與脾。西院病孀婦。後牀孤姪兒。黃昏一慟後。夜半十起時。病眼兩行淚。衰鬢萬莖絲。咽絕五臟脈。瘦消百骸脂。雙目失一目。四肢斷兩肢。不如溘然逝。安用半活爲。誰謂茶蘖苦。茶蘖甘如飴。誰謂湯火熱。湯火冷如澌。前時君寄詩。憂念問阿龜。喉燥氣聲窒。經年無報辭。及視晨興句。未吟先涕垂。因茲漣洳際。一吐心中悲。茫茫四海閒。此苦唯君知。去我四千里。使我告訴誰。仰頭向青天。但見鴈南飛。憑鴈寄一語。爲我達微之。弦絕有續膠。樹斬可接枝。唯我中腸斷。應無連得期。

【二十一】和朝回與王鍊師遊南山下

藹藹春景餘。峩峩夏雲初。躑躅退朝騎。飄飄隨風裾。晨從四丞相。入拜白玉除。暮與一道士。出尋青谿居。吏隱本齊致。朝野孰云殊。道在有中適。機忘無外虞。但愧煙霄上。鸞鳳爲吾徒。又慙雲水閒。鷗鶴不我疎。坐傾數杯酒。臥枕一卷書。興酣頭兀兀。睡覺心于于。以此送日月。問師爲何如。

【二十二】和嘗新酒

空腹嘗新酒。偶成卯時醉。醉來擁褐裘。直至齋時睡。睡酣不語笑。真寢無夢寐。

殆欲忘形骸。詎知屬天地。醒餘和未散。起坐澹無事。舉臂一欠伸。引琴彈秋思。

【二十三】和順之琴者

陰陰花院月。耿耿蘭房燭。中有弄琴人。聲貌俱如玉。清冷石泉引。澹泞風松曲。遂使君子心。不愛凡絲竹。

感舊寫真

李放寫我真。寫來二十載。莫問真何如。畫亦銷光彩。朱顏與玄鬢。日夜改復改。無嗟貌遽非。且喜身猶在。

授太子賓客歸洛

自後東都作

南省去拂衣。東都來掩扉。病將老齊至。心與身同歸。白首外緣少。紅塵前事非。懷哉紫芝叟。千載心相依。

秋池二首

身閒無所爲。心閒無所思。況當故園夜。復此新秋池。岸闌鳥棲後。橋明月出時。菱風香散漫。桂露光參差。靜境多獨得。幽懷竟誰知。悠然心中語。自問來何遲。

【二】

朝衣薄且健。晚簟清仍滑。社近燕影稀。雨餘蟬聲歇。閒中得詩境。此境幽難說。

露荷珠自傾。風竹玉相戛。誰能一同宿。共翫新秋月。暑退早涼歸。池邊好時節。

中隱

大隱住朝市。小隱入丘樊。丘樊太冷落。朝市太囂譁。不如作中隱。隱在畱司官。似出復似處。非忙亦非閒。不勞心與力。又免飢與寒。終歲無公事。隨月有俸錢。君若好登臨。城南有秋山。君若愛遊蕩。城東有春園。君若欲一醉。時出赴賓筵。洛中多君子。可以恣歡言。君若欲高臥。但自深掩關。亦無車馬客。造次到門前。人生處一世。其道難兩全。賤即苦凍餒。貴則多憂患。唯此中隱士。致身吉且安。窮通與豐約。正在四者閒。

問秋光

殷卿領北鎮。崔尹開南幕。外事信爲榮。中懷未必樂。何如不才者。兀兀無所作。不引窗下琴。即舉池上酌。淡交唯對水。老伴無如鶴。自適頗從容。旁觀誠濩落。身心轉恬泰。煙景彌淡泊。迴首語秋光。東來應不錯。

引泉

一爲止足限。二爲衰疾牽。邴罷不因事。陶歸非待年。歸來嵩洛下。閉戶何翛然。靜掃林下地。閒疏池畔泉。伊流狹似帶。洛石大如拳。誰教明月下。爲我聲濺濺。

竟夕舟中坐。有時橋上眠。何用施屏障。水竹繞牀前。

知足吟

和崔十八未貧作

不種一隴田。倉中有餘粟。不採一株桑。箱中有餘服。官閒離憂責。身泰無羈束。中人百戶稅。賓客一年祿。樽中不乏酒。籬下仍多菊。是物皆有餘。非心無所欲。吟君未貧作。因歌知足曲。自問此時心。不足何時足。

酬集賢劉郎中對月見寄兼懷元浙東

月在洛陽天。天高淨如水。下有白頭人。摩衣中夜起。思遠鏡亭上。光深書殿裏。眇然三處心。相去各千里。

太湖石

遠望老嵯峨。近觀怪嶽峯。纔高八九尺。勢若千萬尋。嵌空華陽洞。重疊匡山岑。邈矣仙掌迴。呀然劒門深。形質冠今古。氣色通晴陰。未秋已瑟瑟。欲雨先沈沈。天姿信爲異。時用非所任。磨刀不如礪。擣帛不如砧。何乃主人意。重之如萬金。豈伊造物者。獨能知我心。

偶作二首

擾擾貪生人。幾何不天闕。遑遑愛名人。幾何能貴達。伊余信多幸。拖紫垂白髮。

身爲三品官。年已五十八。筋骸雖早衰。尙未苦羸憊。資產雖不豐。亦不甚貧竭。登山力猶在。遇酒興時發。無事日月長。不羈天地濶。安身有處所。適意無時節。解帶松下風。抱琴池上月。人閒所重者。相印將軍鉞。謀慮繫安危。威權主生殺。焦心一身苦。炙手旁人熱。未必方寸閒。得如吾快活。

【二】

日出起盥櫛。振衣入道場。寂然無他念。但對一爐香。日高始就食。食亦非膏粱。精粗隨所有。亦足飽充腸。日午脫巾簪。燕息窗下牀。清風颯然至。臥可致羲皇。日西引杖屨。散步遊林塘。或飲茶一盞。或吟詩一章。日入多不食。有時唯命觴。何以送閒夜。一曲秋霓裳。一日分五時。作息率有常。自喜老後健。不嫌閒中忙。是非一以貫。身世交相忘。若問此何許。此是無何鄉。

葺池上舊亭

池月夜淒涼。池風曉蕭颯。欲入池上冬。先葺池中閣。向暖窗戶開。迎寒簾幕合。苔封舊瓦木。水照新朱蠟。軟火深土爐。香醪小瓷榼。中有獨宿翁。一燈對一榻。

崔十八新池

愛君新小池。池色無人知。見底月明夜。無波風定時。忽看不似水。一泊稀琉璃。

翫止水

動者樂流水。靜者樂止水。利物不如流。鑿形不如止。淒清早霜降。淅瀝微風起。中面紅葉開。四隅綠萍委。廣狹八九丈。灣環有涯涘。淺深三四尺。洞徹無表裏。淨分鶴翹足。澄見魚掉尾。迎眸洗眼塵。隔曾蕩心滓。定將禪不別。明與誠相似。清能律貪夫。淡可交君子。豈唯空狎翫。亦取相倫擬。欲識靜者心。心源只如此。

聞崔十八宿予新昌弊宅。時予亦宿崔家依仁新亭。一宵偶同。兩興暗合。因而成詠。聊以寫懷。

陋巷掩弊廬。高居敞華屋。新昌十株松。依仁萬莖竹。松前月臺白。竹下風池綠。君向我齋眠。我在君亭宿。平生有微尚。彼此多幽獨。何必求主人。兩心聊自足。

日長

日長晝加餐。夜短朝餘睡。春來寢食閒。雖老猶有味。林塘得芳景。園曲生幽致。愛水多棹舟。惜花不掃地。幸無眼下病。且向樽前醉。身外何足言。人閒本無事。

三月三十日作

今朝三月盡。寂寞春事畢。黃鳥漸無聲。朱櫻新結實。臨風獨長歎。此歎意非一。半百過九年。豔陽殘一日。隨年減歡笑。逐日添衰疾。且遣花下歌。送此杯中物。

慵不能

架上非無書。眼慵不能看。匣中亦有琴。手慵不能彈。腰慵不能帶。頭慵不能冠。午後恣情寢。午時隨事餐。一餐終日飽。一寢至夜安。飢寒亦閒事。況乃不飢寒。

晨興

宿鳥動前林。晨光上東屋。銅爐添早香。紗籠滅殘燭。頭醒風稍愈。眼飽睡初足。起坐兀無思。叩齒三十六。何以解宿齋。一杯雲母粥。

朝課

平甃白石渠。靜掃青苔院。池上好風來。新荷大如扇。小亭中何有。素琴對黃卷。藥珠諷數篇。秋思彈一遍。從客朝課畢。方與客相見。

天竺寺七葉堂避暑

鬱鬱復鬱鬱。伏熱何時畢。行入七葉堂。煩暑隨步失。檐雨稍霏微。窗風正蕭瑟。清宵一覺睡。可以銷百疾。

香山寺石樓潭夜浴

炎光晝方熾。暑氣宵彌毒。搖扉風甚微。寒裳汗霰粟。起向月下。行來就潭中浴。平石為浴牀。窪石為浴斛。綃巾薄露頂。草屨輕乘足。清涼詠而歸。歸上石樓宿。

嗟髮落

朝亦嗟髮落。暮亦嗟髮落。落盡誠可嗟。盡來亦不惡。既不勞洗沐。又不煩梳掠。最宜濕暑天。頭輕無髻縛。脫置垢巾幘。解去塵纓絡。銀瓶貯寒泉。當頂傾一勺。有如醍醐灌。坐受清涼樂。因悟自在僧。亦資於剝削。

安穩眠

家雖日漸貧。猶未苦飢凍。身雖日漸老。幸無疾病痛。眼逢闇處合。心向閒時用。既得安穩眠。亦無顛倒夢。

池上夜境

晴空星月落池塘。澄鮮淨綠表裏光。露簾清瑩迎夜滑。風襟瀟灑先秋涼。無人驚處野禽下。新睡覺時幽草香。但問塵埃能去否。濯纓何必向滄浪。

書紳

仕有職役勞。農有畎畝勤。優哉分司叟。心力無苦辛。歲晚頭又白。自問何欣欣。新酒始開甕。舊穀猶滿困。吾嘗靜自思。往往夜達晨。何以送吾老。何以安吾貧。歲計莫如穀。飽則不干人。日計莫如醉。醉則兼忘身。誠知有道理。未敢勸交親。恐為人所哂。聊自書諸紳。

秋遊平泉贈韋處士閒禪師

秋景引閒步。山遊不知疲。杖藜捨輿馬。十里與僧期。昔嘗憂六十。四體不支持。今來已及此。猶未苦衰羸。予往年有詩云。三十氣太壯。胸中多是非。六十年太老。四體不支持。今故云。心興遇境發。身力因行知。尋雲到起處。愛泉聽滴時。南邨韋處士。西寺閒禪師。山頭與澗底。聞健且相隨。

遊坊口懸泉偶題石上

時爲河南尹

濟源山水好。老尹知之久。常日聽人言。今秋入吾手。孔山刀劍立。沁水龍蛇走。危磴上懸泉。澄灣轉坊口。虛明見深底。淨綠無纖垢。仙棹浪悠揚。塵纓風抖擻。巖寒松柏短。石古莓苔厚。錦座纓高低。翠屏張左右。雖無安石妓。不乏文舉酒。談笑逐身來。管絃隨事有。時逢杖錫客。或值垂綸叟。相與澹忘歸。自辰將及酉。公門欲返駕。溪路猶迴首。早晚重來遊。心期罷官後。

對火翫雪

平生所心愛。愛火兼憐雪。火是臘天春。雪爲陰夜月。鵝毛紛正墮。獸炭敲初折。盈尺白鹽寒。滿爐紅玉熟。稍宜杯酌動。漸引笙歌發。但識歡來由。不知醉時節。銀盤堆柳絮。羅袖搏瓊屑。共愁明日銷。便作經年別。

六年寒食。洛下宴遊。贈馮李二少尹。

豐年寒食節。美景洛陽城。三尹皆強健。七日盡晴明。東郊踞青草。南園攀紫荊。風拆海榴豔。露墜木蘭英。假開春未老。宴合日屢傾。珠翠混花影。管絃藏水聲。佳會不易得。良辰亦難并。聽吟歌暫輟。看舞杯徐行。米價賤如土。酒味濃於餚。此時不盡醉。但恐負平生。殷勤二曹長。各捧一銀觥。

苦熱中寄舒員外

何堪日衰病。復此時炎燠。厭對俗杯盤。倦聽凡絲竹。藤牀鋪晚雪。角枕截寒玉。安得清瘦人。新秋夜同宿。非君固不可。何夕枉高躅。

閒夕

一聲早蟬發。數點新螢度。蘭缸耿無煙。筠簟清有露。未歸後房寢。且下前軒步。斜月入低廊。涼風滿高樹。放懷常自適。遇境多成趣。何法使之然。心中無細故。

寄情

灼灼早春梅。東南枝最早。持來翫未足。花向手中老。芳香銷掌握。悵望生懷抱。豈無後開花。念此先開好。

舒員外遊香山寺。數日不歸。兼辱尺書。大誇勝事。時正值坐衙慮囚之際。走筆題長句以贈之。

香山石樓倚天開。

翠屏壁立波環迴。

黃菊繁時好客到。

碧雲合處佳人來。

酡顏一笑天桃綻。

清吟數聲寒玉哀。

軒騎逶遲棹容與。

畱連三日不能迴。

白頭老尹府中坐。

早衙纔退暮衙催。

庭前堦上何所有。

纍囚成貫案成堆。

豈無池塘長秋草。

亦有絲竹生塵埃。

今日清光昨夜月。

竟無人來勸一杯。

早冬遊王屋。自靈都抵陽臺上方。望天壇。偶吟成章。寄溫谷尊師中書李相公。

相公

霜降山水清。王屋十月時。

石泉碧漾漾。

巖樹紅離離。

朝爲靈都遊。

暮有陽臺期。

飄然世塵外。鸞鶴如可追。

忽念公程盡。

復慙身力衰。

天壇在天半。

欲上心遲遲。

嘗聞此遊者。隱客與損之。

各抱貴仙骨。

俱非泥垢姿。

二人相顧言。

彼此稱男兒。

若不爲松喬。卽須作皁蕪。

今果如其語。

光彩雙葳蕤。

一人佩金印。

一人翳玉芝。

我來高其事。詠歎偶成詩。

爲君題石上。

欲使故山知。

醉中重畱夢得

劉郎劉郎莫先起。

蘇臺蘇臺隔雲水。

酒盞來從一百分。

馬頭去便三千里。

白樂天詩後集卷三

格詩

凡五十八首

詠興五首并序

七年四月。予罷河南府。歸履道第。廬舍自給。衣儲自充。無欲無營。或歌或舞。頽然自適。蓋河洛閒一幸人也。遇興發詠。偶成五章。各以首句命爲題目。

【一】解印出公府

解印出公府。抖擻塵土衣。百吏放爾散。雙鶴隨我歸。歸來履道宅。下馬入柴扉。馬嘶返舊櫪。鶴舞還故池。雞犬何忻忻。鄰里亦依依。年顏老去日。生計勝前時。有帛禦冬寒。有穀防歲飢。飽於東方朔。樂於榮啓斯。人生且如此。此外吾不知。

【二】出府歸吾廬

出府歸吾廬。靜然安且逸。更無客干謁。時有僧問疾。家僮十餘人。櫪馬三四匹。慵發經旬臥。興來連日出。出遊愛何處。嵩碧伊瑟瑟。況有清和天。正當疎散日。身閒自爲貴。何必居榮秩。心足卽非貧。豈唯金滿室。吾觀權勢者。苦以身徇物。炙手外炎炎。履冰中慄慄。朝飢口忘味。夕惕心憂失。但有富貴名。而無富貴實。

【三】池上有小舟

池上有小舟。舟中有胡牀。牀前有新酒。獨酌還獨嘗。熏若春日氣。皎如秋水光。可洗機巧心。可蕩塵垢腸。岸曲舟行遲。一曲進一觴。未知幾曲醉。醉入無何鄉。貧緣潭島閒。水竹深青蒼。身閒心無事。白日爲我長。我若未忘世。雖閒心亦忙。世若未忘我。雖退身難藏。我今異於是。身世交相忘。

【四】四月池水滿

四月池水滿。龜游魚躍出。吾亦愛吾池。池邊開一室。人魚雖異族。其樂歸於一。且與爾爲徒。逍遙同過日。爾無羨滄海。蒲藻可委質。吾亦忘青雲。衡茅足容膝。況吾與爾輩。本非蛟龍匹。假如雲雨來。祇是池中物。

【五】小底亦有月

小庭亦有月。小院亦有花。可憐好風景。不解嫌貧家。菱角執笙簧。谷兒抹琵琶。紅綃信手舞。紫綃隨意歌。菱。谷。紫。紅。皆小賊。獲名也。村歌與社舞。客哂主人誇。但問樂不樂。豈在鐘鼓多。客告暮將歸。主稱日未斜。請客稍深酌。願見朱顏酡。客知主意厚。分數隨後加。堂上燭未秉。座中冠已峩。左顧短紅袖。右命小青蛾。長跪謝貴客。蓬門勞見過。客散有餘興。醉臥獨吟哦。幕天而席地。誰奈劉伶何。

秋涼閒臥

殘暑晝猶長。早涼秋尙嫩。露荷散清香。風竹含疎韻。幽閒竟日臥。衰病無人問。薄暮宅門前。槐花深一寸。

酬思黯相公見過弊居戲贈

軒蓋光照地。行人爲徘徊。呼傳君子出。乃是故人來。訪我入窮巷。引君登小臺。臺前多竹樹。池上無塵埃。貧家何所有。新酒三兩杯。欸曲語上馬。從容復遲迴。畱守不外宿。日斜宮漏催。但畱金刀贈。未接玉山頽。家醞不敢惜。待君來即開。村妓不辭出。恐君輾然哈。

再授賓客分司

優穩四皓官。清崇三品列。伊予再塵忝。內愧非才哲。俸錢七八萬。給受無虛月。分命在東司。又不勞朝謁。既資閒養疾。亦賴慵藏拙。賓友得從容。琴觴恣怡悅。乘籃城外去。繫馬花前歇。六遊金谷春。五看龍門雪。吾若默無語。安知吾快活。吾欲更盡言。復恐人豪奪。應爲時所笑。苦惜分司闕。但問適意無。豈論官冷熱。

把酒

把酒仰問天。古今誰不死。所貴未死閒。少憂多歡喜。窮通諒在天。憂喜卽由己。

是故達道人。去彼而取此。勿言未富貴。久忝居祿仕。借問宗族間。幾人拖金紫。勿憂漸衰老。且喜加年紀。試數班行中。幾人及暮齒。朝餐不過飽。五鼎徒爲爾。夕寢止求安。一衾而已矣。此外皆長物。於我雲相似。有子不畱金。何況兼無子。

首夏

林靜蚊未生。池靜蛙未鳴。景長天氣好。竟日和且清。春禽餘哢在。夏木新陰成。兀爾水邊坐。翛然橋上行。自問一何適。身閒官不輕。料錢隨月用。生計逐日營。食飽慙伯夷。酒足愧淵明。陶潛詩云。飲酒常不足。壽倍顏氏子。富百黔婁生。有一卽爲樂。況吾四者并。所以私自慰。雖老有心情。

代鶴

我本海上鶴。偶逢江南客。感君一顧恩。同來洛陽陌。洛陽寡族類。皎皎唯兩翼。貌是天與高。色非日浴白。主人誠可戀。其奈軒庭窄。飲啄雜雞羣。年深損標格。故鄉渺何處。雲水重重隔。誰念深籠中。七換摩天翮。

立秋夕有懷夢得

露簾荻竹青。風扇蒲葵輕。一與故人別。再見新蟬鳴。是夕涼颺起。閒境入幽情。迴燈見棲鶴。隔竹聞吹笙。夜茶一兩杓。秋吟三數聲。所思渺千里。雲水長洲城。

哭崔常侍晦叔

頑賤一拳石。精珍百鍊金。名價既相遠。交分何其深。中誠一以合。外物不能侵。逶迤二十年。與世同浮沈。晚有退閒約。白首歸雲林。垂老忽相失。悲哉口語心。春日嵩高陽。秋夜清洛陰。丘園共誰卜。山水共誰尋。風月共誰賞。詩篇共誰吟。花開共誰看。酒熟共誰斟。惠死莊杜口。鍾歿師廢琴。道理使之然。從古非獨今。吾道自此孤。我情安可任。唯將病眼淚。一灑秋風襟。

新秋曉興

濁暑忽已退。清宵未全長。晨缸耿殘焰。宿閣凝微香。喔喔雞下樹。輝輝日上梁。枕低茵席軟。臥穩身入牀。睡足景猶早。起初風乍涼。展張小屏障。收拾生衣裳。還有惆悵事。遲遲未能忘。拂鏡梳白髮。可憐冰照霜。

秋日與張賓客舒著作同遊龍門醉中狂歌凡二百三十八字

秋天高高秋光清。秋風嫋嫋秋蟲鳴。嵩峯餘霞錦綺卷。伊水細浪鱗甲生。洛陽閒客知無數。少出遊山多在城。商嶺老人自追逐。蓬丘逸士相逢迎。南出鼎門十八里。莊店遞迤橋道平。不寒不熱好時節。鞍馬穩快衣衫輕。竝轡踟躕下西岸。扣舷容與遠中汀。開懷曠達無所繫。觸目勝絕不可名。

荷衰欲黃荇猶綠。魚樂自躍鷗不驚。翠藻蔓長孔雀尾。彩船櫓急寒鴈聲。
 家醞一壺白玉液。野花數把黃金英。畫遊四看西日暮。夜話三及東方明。
 暫停杯觴輟吟詠。我有狂言君試聽。丈夫一生有二志。兼濟獨善難得并。
 不能救療生民病。即須先濯塵土纓。況吾頭白眼已暗。終日戚促何所成。
 不如展眉開口笑。龍門醉臥香山行。

履信池櫻桃島上醉後走筆送別舒員外兼寄宗正李卿考功崔郎中

櫻桃島前春。去春花萬枝。忽憶與宗卿閒飲日。又憶與考功狂醉時。
 歲晚無花空有葉。風吹滿地乾重疊。蹋葉悲秋復憶春。池邊樹下重殷勤。
 今朝一酌臨寒水。此地三回別故人。櫻桃花來春千萬朵。來春共誰花下坐。
 不論崔李上青雲。明日舒三亦拋我。

秋池獨泛

蕭疎秋竹籬。清淺秋風池。一隻短舫艇。一張斑鹿皮。皮上有野叟。手中持酒卮。
 半酣箕踞坐。自問身為誰。嚴子垂釣日。蘇門長嘯時。悠然意自得。意外何人知。

冬日早起閒詠

冰塘耀初旭。風竹飄餘霰。幽境雖目前。不因閒不見。晨起對爐香。道經尋兩卷。

晚坐拂琴塵。秋思彈一遍。此外更無事。開樽時自勸。何必東風來。一杯春上面。

歲暮

慘澹歲云暮。窮陰動經旬。霜風裂人面。冰雪摧車輪。而我當是時。獨不知苦辛。
 晨炊廩有米。夕爨厨有薪。夾帽長覆耳。重裘寬裹身。加之一杯酒。煦嫗如陽春。
 洛城士與庶。比屋多飢貧。何處爐有火。誰家甑無塵。如我飽煖者。百人無一人。
 安得不慙愧。放歌聊自陳。

南池早春有懷

朝遊北橋上。晚憩南塘畔。西日雪全銷。東風冰盡泮。從從魚尾掉。瞥瞥鵝毛換。
 泥暖草芽生。沙虛泉脈散。晴芳冒苔島。宿潤侵蒲岸。洛下日初長。江南春欲半。
 時光共拋擲。人事堪嗟歎。倚棹忽尋思。去年池上伴。

古意

脈脈復脈脈。美人千里隔。不見來幾時。瑤草三四碧。玉琴聲悄悄。鸞鏡塵霏霏。
 昔為連理枝。今作分飛翮。寄書多不達。加飯終無益。心腸不自寬。衣帶何由窄。

山遊示小妓

雙鬟垂未合。三十纔過半。本是綺羅人。今為山水伴。春泉共揮弄。好樹同攀翫。

笑容花底迷。酒思風前亂。紅凝舞袖急。黛慘歌聲緩。莫唱楊柳枝。無腸與君斷。

神照禪師同宿

八年三月晦。山梨花滿枝。龍門水西寺。夜與遠公期。晏坐自相對。密語誰得知。前後際斷處。一念不生時。

張常侍相訪

西亭晚寂寞。鶯散柳陰繁。水戶簾不卷。風牀席自翻。忽聞車馬客。來訪蓬蒿門。況是張常侍。安得不開樽。

早夏遊宴

雖慵興猶在。雖老心猶健。昨日山水遊。今朝花酒宴。山榴豔似火。玉藥飄如霰。榮落逐瞬遷。炎涼隨刻變。未收木綿褥。已動蒲葵扇。且喜物與人。年年得相見。

感白蓮花

白白芙蓉花。本生吳江濱。不與紅者雜。色類自區分。誰移爾至此。姑蘇白使君。初來苦顛顛。久乃芳氣氤。月月葉換葉。年年根生根。陳根與故葉。銷化成泥塵。化者日已遠。來者日復新。一為池中物。永別江南春。忽想西涼州。中有天寶民。埋沒漢父祖。孳生胡子孫。已忘鄉土戀。豈念君親恩。生人尚復爾。草木何足云。

詠所樂

獸樂在山谷。魚樂在陂池。蟲樂在深草。鳥樂在高枝。所樂雖不同。同歸適其宜。不以彼易此。況論是與非。而我何所樂。所樂在分司。分司有何樂。樂哉人不知。官優有祿料。職散無羈縻。懶與道相近。鈍將閒自隨。昨朝拜表廻。今晚行香歸。歸來北窗下。解巾脫塵衣。冷泉濯我頂。暖水濯四肢。體中幸無疾。臥任清風吹。心中又無事。坐任白日移。或開書一篇。或引酒一卮。但得如今日。終身無厭時。

思舊

閒日一思舊。舊遊如目前。再思今何在。零落歸下泉。退之服硫黃。一病訖不痊。微之鍊秋石。未老身溘然。杜子得丹訣。終日斷腥羶。崔君誇藥力。經冬不衣綿。或疾或暴天。悉不過中年。唯予不服食。老命反遲延。沉在小壯時。亦為嗜慾牽。但耽葷與血。不識汞與鉛。飢來吞熱物。渴來飲寒泉。詩役五臟神。酒汨三丹田。隨日合破壞。至今粗完全。齒牙未缺落。肢體尚輕便。已開第七秩。飽食仍安眠。且進杯中物。其餘皆付天。

寄盧少尹

老誨心不亂。莊戒形太勞。生命既能保。死籍亦可逃。嘉肴與旨酒。信是廢腸膏。

豔聲與麗色。真為伐性刀。補養在積功。如裘集衆毛。將欲致千里。不得差一毫。顏回何為者。簞瓢纔自給。肥醲不到口。年不登三十。張蒼何為者。染愛浩無際。妾媵填後房。竟壽百餘歲。蒼壽有何德。回夭有何辜。誰謂具聖體。不如肥瓠臠。遂使世俗心。多疑仙道書。寄問盧先生。此理當何如。心不亂。形太勞。至差一毫。皆出老莊及諸道書仙方禁誡。

池上清晨候皇甫郎中

曉景麗未熱。晨飈鮮且涼。池幽綠蘋合。霜潔白蓮香。深掃竹間逕。靜拂松下牀。玉柄鶴翎扇。銀鬕雲母漿。屏除無俗物。瞻望唯清光。何人擬相訪。羸女從蕭郎。

詠懷

我知世如幻。了無干世意。世知我無堪。亦無責我事。由茲兩相忘。因得長自遂。自遂意何如。閒官在閒地。閒地唯東都。東都少名利。閒官是賓客。賓客無牽累。嵇康日日懶。畢卓時時醉。酒肆夜深歸。僧房日高睡。形安不勞苦。神泰無憂畏。從官三十年。無如今氣味。鴻雖脫羅弋。鶴尚居祿位。唯此未忘懷。有時猶內愧。

北窗三友

今日北窗下。自問何所為。欣然得三友。三友者為誰。琴罷輒舉酒。酒罷輒吟詩。三友遞相引。循環無已時。一彈愜中心。一詠暢四肢。猶恐中有閒。以醉彌縫之。豈獨吾拙好。古人多若斯。嗜詩有淵明。嗜琴有啓期。嗜酒有伯倫。三人皆吾師。

或乏儋石儲。或穿帶索衣。絃歌復觴詠。樂道知所歸。三師去已遠。高風不可追。

三友游甚熟。無日不相隨。左擲白玉卮。右拂黃金徽。興酣不疊紙。走筆操狂詞。誰能持此詞。為我謝親知。縱未以為是。豈以我為非。

吟四雖雜言

酒酣後。歌歇時。請君添一酌。聽我吟四雖。年雖老。猶少於韋長史。命雖薄。猶勝於鄭長水。眼雖病。猶明於徐郎中。家雖貧。猶富於郭庶子。省躬審分何僥倖。值酒逢歌且歡喜。忘榮知足委天和。亦應得盡生生理。分司同官中。韋長史。年七十餘。郭庶子。求貧苦最甚。除郎中。晦。因。

疾喪明。余為河南尹時。見同年鄭俞始授長水縣令。因歎四子而成此篇也。

裴侍中晉公以集賢林亭即事詩二十六韻見贈。猥蒙徵和。才拙詞繁。輒廣為五百言以伸酬獻。

三江路千里。五湖天一涯。何如集賢第。中有平津池。池勝主見覺。景新人未知。竹森翠琅玕。水深洞琉璃。水竹以為質。質立而文隨。文之者何人。公來親指麾。疏鑿出人意。結構得地宜。虛襟一搜索。勝槩無遁遺。因下張沼沚。依高築階基。嵩峯見數片。伊水分一支。南溪修且直。長波碧逶迤。北館壯復麗。倒影紅參差。東島號晨光。杲曜留朝曦。西嶺名夕陽。杳曖留落暉。前有水心亭。動蕩架漣漪。

後有開闔堂。寒溫變天時。幽泉鏡泓澄。忽石山鼓危。吞葩雪漠漠。夏果珠離離。主人命方舟。宛在水中坻。親賓次第至。酒樂前後施。解纜始登汎。山遊仍水嬉。沿洄無滯礙。向背窮幽奇。瞥過遠橋下。飄旋深澗陲。管絃去縹緲。羅綺來霏微。棹風逐舞迴。梁塵隨歌飛。宴餘日云暮。醉客未放歸。高聲索彩牋。大笑催金卮。唱和筆走疾。問答杯行遲。一詠清兩耳。一酣暢四肢。主客忘貴賤。不知俱是誰。客有詩魔者。吟哦不知疲。乞公殘紙墨。一掃狂歌詞。維云社稷臣。赫赫文武姿。十授丞相印。五建大將旗。四朝致勛華。一身冠皐夔。去年才七十。決赴懸車期。公志不可奪。君恩亦難違。從容就中道。俛俛來保釐。貂蟬雖未脫。鸞鳳已不羈。歷徵今與古。獨步無等夷。陸賈功業少。二疏官秩卑。乘舟范蠡懼。辟穀留侯飢。豈若公今日。身安家國肥。羊祜在漢南。空畱峴香碑。柳惲在江南。祇賦汀洲詩。謝安入東山。但說攜蛾眉。山簡醉高陽。唯聞倒接羅。豈如公今日。餘力兼有之。願公壽如山。安樂長在茲。願我比蒲稗。永得相因依。

晚歸香山寺因詠所懷

我年日已老。我身日已閒。閒出都門望。但見水與山。關塞碧巖巖。伊流清潺潺。中有古精舍。軒戶無扃關。岸草歇可藉。逕蘿行可攀。朝隨浮雲出。夕與飛鳥還。

吾道本迂拙。世途多險艱。唯聞稽呂輩。尤悔生疎頑。巢悟入箕顛。皓知返商巔。豈唯樂肥遯。聊復祛憂患。吾亦從此去。終老伊嵩閒。

張常侍池涼夜閒譙贈諸公

竹橋新月上。水岸涼風至。對月五六人。管絃三兩事。畱連池上酌。款曲城外意。或嘯或謳吟。誰知此閒味。迴看市朝客。矻矻趨名利。朝忙少遊宴。夕困多眠睡。清涼屬吾徒。相逢勿辭醉。

和皇甫郎中秋曉同登天宮閣言懷六韻

碧天忽已高。白日猶未短。玲瓏曉樓閣。清脆秋絲管。張翰一杯酣。嵇康終日懶。塵中足憂累。雲外多疏散。病木斧斤遺。冥鴻羈縲斷。逍遙二三子。永願為閒伴。

送呂漳州

今朝一壺酒。言送漳州牧。半自要閒遊。愛花憐草綠。花前下鞍馬。草上攜絲竹。行客飲數杯。主人歌一曲。端居惜風景。屢出勞僮僕。獨醉似無名。借君作題目。

短歌行

世人求富貴。多為奉嗜欲。盛衰不自由。得失常相逐。問君少年日。苦學將千祿。負笈塵中遊。抱書雪前讀。布衾不周體。藜茹纔充腹。三十登宦途。五十被朝服。

奴溫已挾纊。馬肥初食粟。未敢議歡遊。尙爲名檢束。耳目聾暗後。堂上調絲竹。牙齒缺落時。盤中堆酒肉。彼來此已去。外餘中不足。少壯與榮華。相避如寒燠。青雲去地遠。白日經天速。從古無奈何。短歌聽一曲。

詠懷

高人樂丘園。中人慕官職。一事尙難成。兩途安可得。遑遑于世者。多苦時命塞。亦有愛閒人。又爲窮餓逼。我今幸雙遂。祿仕兼游息。未嘗羨榮華。不省勞心力。妻孥與婢僕。亦免愁衣食。所以吾一家。面無憂喜色。

府西亭納涼歸

避暑府西亭。晚歸有閒思。夏淺蟬未多。綠槐陰滿地。帶寬衫解領。馬穩人攏轡。面上有涼風。眼前無俗事。路經府門過。落日照官次。牽聯縲紲囚。奔走塵埃吏。低眉悄不語。誰復知茲意。憶得五年前。晚衙時氣味。

老熱

一飽百情足。一酣萬事休。何人不衰老。我老心無憂。仕者拘職役。農者勞田疇。何人不苦熱。我熱身自由。臥風北窗下。坐月南池頭。腦涼脫烏帽。足熱濯清流。慵發晝高枕。興來夜汎舟。何乃有餘適。祇緣無過求。或問諸親友。樂天是與不。

亦無別言語。多道大悠悠。悠悠君不知。此味深且幽。但恐君知後。亦來從我遊。

新秋喜涼因寄兵部楊侍郎

外強火未退。中銳金方戰。一夕風雨來。炎涼隨數變。徐徐炎景度。稍稍涼颺扇。枕簟忽淒清。巾裳亦輕健。老夫納秋候。心體殊安便。睡足一屈伸。搔首摩挲面。褰簾對池竹。幽寂如僧院。俯觀游魚群。仰數浮雲片。閒忙各有趣。彼此寧相見。昨日聞慕巢。召對延英殿。

懶放二首呈劉夢得吳方之

青衣報平旦。呼我起盥櫛。今早天氣寒。郎君應不出。又無賓客至。何以銷閒日。已向微陽前。暖酒開詩帙。

【二】

朝憐一牀日。暮愛一爐火。牀暖日高眠。爐溫夜深坐。雀羅門懶出。鶴髮頭慵裹。除卻劉與吳。何人來問我。

六十六

病知心力減。老覺光陰速。五十八歸來。今年六十六。鬢絲千萬白。池草八九綠。童稚盡成人。園林半喬木。看山倚高石。引水穿深竹。雖有潺湲聲。至今聽未足。

三適贈道友

褐綾袍厚暖。臥蓋行坐披。紫氍履寬穩。蹇步頗相宜。足適已忘履。身適已忘衣。況我心又適。兼忘是與非。三適今爲一。怡怡復熙熙。禪那不動處。混沌未鑿時。此固不可說。爲君強言之。

洛陽春贈劉李二賓客

水南冠蓋地。城東桃李園。雪消洛陽堰。春入永通門。淑景方靄靄。遊人稍喧喧。年豐酒漿賤。日晏歌吹繁。中有老朝客。華髮映朱軒。從容三兩人。藉草開一樽。樽前春可惜。身外事勿論。明日期何處。杏花遊趙邨。洛陽東有趙邨。杏花千餘樹。

寒食

人老何所樂。樂在歸鄉國。我歸故園來。九度逢寒食。故園在何處。池館東城側。四鄰梨花時。二月伊水色。豈獨好風土。仍多舊親戚。出去恣歡遊。歸來聊燕息。有官供祿俸。無事勞心力。但恐優穩多。微躬銷不得。

寄李蘇州兼示楊瓊

真娘墓頭春草碧。心奴鬢上秋霜白。爲問蘇臺酒席中。使君歌笑與誰同。就中猶有楊瓊在。堪上東山伴謝公。

和裴令公一日日一年年雜言見贈

一日日。作老翁。一年年。過春風。公心不以貴隔我。我散唯將閒伴公。我無才能忝高秩。合是人閒閒散物。公有功德在生民。何因得作自由身。前日魏王潭上宴連夜。今日午橋池頭遊拂晨。山客硯前吟待月。野人樽前醉送春。不敢與公閒中爭第一。亦應占得第二第三人。

奉和裴令公三月上巳日遊太原龍泉憶去歲禊洛見示之作

依來體雜言

去歲暮春上巳。共泛洛水中流。今歲暮春上巳。獨立香山下頭。風光閒寂寂。旌旆遠悠悠。丞相府。歸晉國。太行山。礙并州。鵬背負天龜曳尾。雲泥不可得同遊。

憶江南詞三首

江南好。風景舊曾諳。日出江花紅勝火。春來江水綠如藍。能不憶江南。

【一】

江南憶。最憶是杭州。山寺月中尋桂子。郡亭枕上看潮頭。何日更重遊。

【二】

江南憶。其次憶吳宮。吳酒一杯春竹葉。吳娃雙舞醉芙蓉。早晚復相逢。

汎小輪二首

水一塘。輪一隻。輪頭漾漾知風起。輪背蕭蕭聞雨滴。醉臥船中欲醒時。忽疑身是江南客。

【二】

船緩進。水平流。一莖竹篙別般尾。兩幅青幕覆船頭。亞竹亂藤多照岸。如從鳳口向湖洲。

白樂天詩後集卷四

格詩 凡八十 六首

題裴晉公女几山刻石詩後 并序

裴侍中晉公出討淮西時過女几山下刻石題詩末句云待平賊壘報天子莫指仙山示武夫果如所言剋期平賊由是淮蔡迄今底寧殆二十年人安生業夫嗟歎不足則詠歌之故居易作詩二百言繼題公之篇末欲使採詩者修史者後之往來觀者知公之功德本末前後也

何處畫功業。何處題詩篇。麒麟高閣上。女兒小山前。爾後多少時。四朝二十年。賊骨化為土。賊壘犁為田。一從賊壘平。陳蔡民晏然。驟軍成牛戶。鬼火變人煙。生子已嫁娶。種桑亦絲繭。皆云公之德。欲報無由緣。公今在何處。守都鎮三川。舊宅畱永樂。新居開集賢。公今在何官。被袞珥貂蟬。戰袍破猶在。髀肉生欲圓。襟懷轉蕭灑。氣力彌精堅。登山不拄杖。上馬能掉鞭。利澤浸入地。福降自昇天。昔號天下將。今稱地上仙。勿追赤松遊。勿拍洪崖肩。商山有遺老。可以奉周旋。

洛陽有愚叟

洛陽有愚叟。白黑無分別。浪跡雖似狂。謀身亦不拙。點檢盤中飯。非精亦非糲。點檢身上衣。無餘亦無闕。天時方得所。不寒復不熱。體氣正調和。不飢仍不渴。閒將酒壺出。醉向人家歇。野食或烹鮮。寓眠多擁褐。抱琴榮啓樂。荷鍤劉伶達。放眼看青山。任頭生白髮。不知天地內。更得幾年活。從此到終身。盡為閒日月。

飽食閒坐

紅粒陸渾稻。白鱗伊水魴。庖童呼我食。飯熟魚鮮香。箸箸適我口。匙匙充我腸。八珍與五鼎。無復心思量。捫腹起盃漱。下階振衣裳。遶庭行數匝。卻上檐下床。箕踞擁裘坐。半身向日陽。可憐飽暖味。誰肯來同嘗。是歲太和八。兵銷時漸康。

朝廷重經術。草澤搜賢良。堯舜求理切。夔龍啓沃忙。懷才抱智者。無不走遑遑。唯此不才叟。頑慵戀洛陽。飽食不出門。閒坐不下堂。子弟多寂寞。僮僕少精光。衣食雖充給。神意不揚揚。爲爾謀則短。吾爲謀甚長。

閒居自題

門前有流水。牆上多高樹。竹逕遶荷池。縈迴百餘步。波閒戲魚鼈。風靜下鷗鷺。寂無城市喧。渺有江湖趣。吾廬在其上。偃臥朝復暮。洛下安一居。山中亦慵去。時逢過客愛。問是誰家住。此是白家翁。閉門終老處。

覽鏡喜老

今朝覽明鏡。鬚鬢盡成絲。行年六十四。安得不衰羸。親屬惜我老。相顧興歎啓。而我獨微笑。此意何人知。笑罷仍命酒。掩鏡捋白髭。爾輩且安坐。從容聽我詞。生若不足戀。老亦何足悲。生若苟可戀。老卽生多時。不老卽須天。不天卽須衰。晚衰勝早天。此理決不疑。古人亦有言。浮生七十稀。我今欠六歲。多幸或庶幾。儻得及此限。何羨榮啓期。當喜不當歎。更傾酒一卮。

風雪中作

歲暮風動地。夜寒雪連天。老夫何處宿。煖帳溫爐前。兩重褐綺衾。一領花茸氈。

粥熟呼不起。日高安穩眠。是時心與身。了無閒事牽。以此度風雪。閒居來六年。忽思遠遊客。復想早朝士。蹋凍侵夜行。凌寒未明起。心爲身君父。身爲心臣子。不得身自由。皆爲心所使。我心既知足。我身自安止。方寸語形骸。我應不負爾。

對琴酒

西窗明且暖。晚坐卷書帷。琴匣拂開後。酒瓶添滿時。角樽白螺盞。玉軫黃金徽。未及彈與酌。相對已依依。泠泠秋泉韻。貯在龍鳳池。油油春雲心。一杯可致之。自古有琴酒。得此味者稀。祇應康與籍。及我三心知。

雪中晏起偶詠所懷兼呈張常侍韋庶子皇甫郎中

雜言

窮陰蒼蒼雪雰雰。雪深沒脛泥埋輪。東家典錢歸礙夜。南家貰米出凌晨。我獨何者無此弊。複帳重衾暖若春。怕寒放懶不肯動。日高睡足方頻伸。瓶中有酒爐有炭。甕中有飯庖有薪。奴溫婢飽身晏起。致茲快活良有因。上無皐陶伯益廊廟材。的不能匡君輔國活生民。下無巢父許由箕潁操。又不能食薇飲水自苦辛。君不見南山悠悠多白雲。又不見西京浩浩唯紅塵。紅塵鬧熱白雲冷。好於冷熱中閒安置身。三年微俸忝洛尹。兩任優穩爲商賓。非賢非愚非智慧。不貴不富不賤貧。冉冉老去過六十。騰騰閒來經七春。不知張韋與皇甫。

私喚我作何如人。

和裴侍中南園靜興見示

池館清且幽。高懷亦如此。有時簾動風。盡日橋照水。靜將鶴爲伴。閒與雲相似。何必學留侯。崎嶇覓松子。

春寒

今朝春氣寒。自問何所欲。酥煖薤白酒。乳和地黃粥。豈唯厭饑口。亦可調病腹。助酌有枯魚。佐餐兼旨蓄。省躬念前哲。醉飽多慚耻。君不聞靖節先生樽長空。廣文先生飯不足。

菩提寺上方晚望香山寺寄舒員外

晚登西寶刹。晴望東精舍。反照轉樓臺。輝輝似圖畫。冰浮水明滅。雪壓松偃亞。石閣僧上來。雲汀鴈飛下。西京闕於市。東洛閒如社。曾憶舊遊無。香山明月夜。

二月一日作贈韋七庶子

園杏紅萼拆。庭蘭紫芽出。不覺春已深。今朝二月一。去冬病瘡痛。將養遵醫術。今春入道場。清淨依僧律。嘗聞聖賢語。所慎齋與疾。遂使愛酒人。停杯一百日。明朝二月二。疾平齋復畢。應須挈一壺。尋花覓韋七。

犬鷺

晚來天氣好。散步中門前。門前何所有。偶視犬與鷺。鷺飽凌風飛。犬暖向日眠。腹舒穩貼地。翅凝高摩天。上無羅弋憂。下無羈鎖牽。見彼物遂性。我亦心適然。心適復何爲。一詠逍遙篇。此仍著於迹。尙未能忘言。

夢劉二十八因詩問之

昨夜夢夢得。初覺思踟躕。忽忘來汝郡。猶疑在吳都。吳都三千里。汝郡二百餘。非夢亦不見。近與遠何殊。尙能齊近遠。焉用論榮枯。但問寢與食。近日兩何如。病後能吟否。春來曾醉無。樓臺與風景。汝又何如蘇。相思一相報。勿復慵爲書。

閒吟

貧窮汲汲求衣食。富貴營營役心力。人生不富卽貧窮。光陰易過閒難得。我今幸在窮富閒。雖在朝廷不入山。看雪尋花翫風月。洛陽城裏七年閒。

西行

衣裘不單薄。車馬不羸弱。藹藹三月天。閒行亦不惡。壽安流水館。硤石青山郭。官道柳陰陰。行宮花漠漠。常聞俗閒語。有錢在處樂。我雖非富人。亦不苦寂寞。家僮解絃管。騎從攜杯杓。時向春風前。歇鞍開一酌。

東歸

翩翩平肩舁。中有醉老夫。膝上展詩卷。竿頭懸酒壺。食宿無定程。僕馬多緩驅。臨水歇半日。望山傾一盃。藉草坐鬼峩。攀花行踟躕。風將景共暖。體與心同舒。始悟有營者。居家如在途。方知無繫者。在道如安居。前夕宿三堂。今日游申湖。殘春三百里。送我歸東都。

途中作

早上肩輿。一杯平旦醉。晚憩下肩輿。一覺殘春睡。身不經營物。心不思量事。但恐綺與里。只如吾氣味。

小臺

新樹低如帳。小臺平似掌。六尺白藤牀。一莖青竹杖。風飄竹皮落。苔印鶴迹上。幽境與誰同。閒人自來往。

睡後茶興憶楊同州

昨晚飲太多。嵬峩連宵醉。今朝餐又飽。爛熯移時睡。睡足摩挲眼。眼前無一事。信脚遠池行。偶然得幽致。婆娑綠陰樹。斑駁青苔地。此處置繩牀。傍邊洗茶器。白瓷甌甚潔。紅爐炭方熾。沫下麴塵香。花浮魚眼沸。盛來有佳色。曠罷餘芳氣。

不見楊慕巢。誰人知此味。

題文集櫃

破柏作書櫃。櫃牢柏復堅。收貯誰家集。題云白樂天。我生業文字。自幼及老年。前後七十卷。小大三千篇。誠知終散失。未忍遽棄捐。自開自鎖閉。置在書帷前。身是鄧伯道。世無王仲宣。只應分付女。畱與外孫傳。

早熱二首

彤雲散不雨。赫日吁可畏。端坐猶揮汗。出門豈容易。忽思公府內。青衫折要吏。復想驛路中。紅塵走馬使。征夫更辛苦。逐客彌顛顛。日入尚趨程。宵分不遑寐。安知北窗叟。偃臥風颯至。簟拂碧龍鱗。扇搖白鶴翅。豈唯身所得。兼示心無事。誰言苦熱天。元有清涼地。

【二】

勃勃旱塵氣。炎炎赤日光。飛禽颺將墜。行人渴欲狂。壯者不耐飢。飢火燒其腸。肥者不禁熱。喘急汗如漿。此時方自悟。老瘦亦何妨。肉輕足健逸。髮少頭清涼。薄食不飢渴。端居省衣裳。數匙梁飯冷。一領綃衫香。持此聊過日。焉知畏景長。

偶作二首

戰馬春放歸。農牛冬歇息。何獨徇名人。終身役心力。來者殊未已。去者不知還。我今悟已晚。六十方退閒。猶勝不悟者。老死紅塵閒。

【二】

名無高與卑。未得多健羨。事無小與大。已得多厭賤。如此常自苦。反此或自安。此理知甚易。此道行甚難。勿信人虛語。君當事上看。

池上作 西溪南潭皆池中勝處也

西溪風生竹森森。南潭萍開水沈沈。叢翠萬竿湘岸色。空碧一泊松江心。

浦派縈迴誤遠近。橋島向背迷登臨。澄瀾方丈若萬頃。倒影咫尺如千尋。

泛然獨遊邈然坐。坐念行心思古今。菟裘不聞有泉沼。西河亦恐無雲林。

豈如白翁退老地。樹高竹密池塘深。華亭雙鶴白矯矯。太湖四石青岑岑。

眼前盡日更無客。膝上此時唯有琴。洛陽冠蓋自相索。誰肯來此同抽簪。

何處堪避暑

何處堪避暑。林閒背日樓。何處好追涼。池上隨風舟。日高飢始食。食竟飽還遊。

遊罷睡一覺。覺來茶一甌。眼明見青山。耳醒聞碧流。脫襪閒濯足。解巾快搔頭。

如此來幾時。已過六七秋。從心至百骸。無一不自由。拙退是其分。榮耀非所求。

雖被世閒笑。終無身外憂。此語君莫怪。靜思吾亦愁。如何三伏月。楊尹謫虔州。

詔下

昨日詔下去罪人。今日詔下得賢臣。進退者誰非我事。世閒寵辱常紛紛。

我心與世兩相忘。時事雖聞如不聞。但喜今年飽飯喫。洛陽禾稼如秋雲。

更傾一樽歌一曲。不獨忘世兼忘身。

七月一日作

七月一日天。秋生履道里。閒居見清景。高興從此始。林閒暑雨歇。池上涼風起。

橋竹碧鮮鮮。岸莎青靡靡。蒼然古盤石。清淺平流水。何言中門前。便是深山裏。

雙僮侍坐臥。一杖扶行止。飢聞麻粥香。渴覺雲湯美。平生所好物。今日多在此。

此外更何思。市朝心已矣。

開襟

開襟何處好。竹下池邊地。餘熱體猶煩。早涼風有味。黃菱槐藥結。紅破蓮芳墜。

無奈每年秋。先來入衰思。

自賓客遷太子少傅分司

頭上漸無髮。耳閒新有毫。形容逐日老。官秩隨年高。優饒又加俸。閒穩仍分曹。

飲食免藜藿。居處非蓬蒿。何言家尚貧。銀槎提綠醪。勿謂身未貴。金章照紫袍。誠合知止足。豈宜更貪饕。默然心自問。於國有何勞。

自在

杲杲冬日光。明暖真可愛。移榻向陽坐。擁裘仍解帶。小奴搥我足。小婢搔我背。自問我爲誰。胡然獨安泰。安泰良有以。與君論梗槩。心了事未了。飢寒迫於外。事了心未了。念慮煎於內。我今實多幸。事與心和會。內外及中閒。了然無一礙。所以日陽中。向君言自在。

詠史

九年十一月作

秦磨利刀斬李斯。齊燒沸鼎烹酈其。可憐黃綺入商洛。閒臥白雲歌紫芝。彼爲蕪醢机上盡。此作鸞鳳天外飛。去者逍遙來者死。乃知禍福非天爲。

因夢有悟

交友淪歿盡。悠悠勞夢思。平生所厚者。昨夜夢見之。夢中幾許事。枕上無多時。款曲數杯酒。從客一局碁。初見韋尚書。金紫何輝輝。中隅李侍郎。健笑言甚怡怡。終爲崔常侍。亮意色苦依依。一夕三改變。夢心不驚疑。此事人盡怪。此理誰得知。我粗知此理。聞於竺乾師。識行妄分別。智隱迷是非。若轉識爲智。菩提其庶幾。

春遊

上馬臨出門。出門復逡巡。回頭問妻子。應怪春遊頻。誠知春遊頻。其奈老大身。朱顏去復去。白髮新更新。請君屈十指。爲我數交親。大限年百歲。幾人及七旬。我今六十五。走若下阪輪。假使得七十。祇有五度春。逢春不遊樂。但恐是癡人。

題天竺南院贈開元旻清四上人

雜芳閒草合。繁綠巖樹新。山深景候晚。四月有餘春。竹寺過微雨。石逕無纖塵。白衣一居士。方袍四道人。地是佛國土。人非俗交親。城中山下別。相送亦殷勤。

哭師臯

南康丹旆引魂迴。洛陽籃輿送葬來。北邙原邊草樹畔。月苦煙愁夜過半。妻孥兄弟號一聲。十二人腸一時斷。往者何人送者誰。樂天哭別師臯時。平生分義向人盡。今日哀冤唯我知。我知何益徒垂淚。籃輿迴竿馬迴轡。何日重聞掃市歌。誰家收得琵琶妓。師臯醉後善歌掃市詞。又有小妓工琵琶。不知今落在何處。蕭蕭風樹白楊影。蒼蒼露草青蒿氣。更就墳邊哭一聲。與君此別終天地。

隱几贈客

宦情本淡薄。年貌又老醜。紫綬與金章。於予亦何有。有時獨隱几。蒼然無所偶。

臥枕一卷書。起嘗一杯酒。書將引昏睡。酒用扶衰朽。客到忽已酣。脫巾坐搖首。疎頑倚老病。容恕慙交友。忽思莊生言。亦擬鞭其後。

夏日作

葛衣疎且單。紗帽輕復寬。一衣與一帽。可以過炎天。止於便吾體。何必被羅紈。宿雨林笋嫩。晨露園葵鮮。烹葵炮嫩笋。可以備朝餐。止於適吾口。何必飮腥羶。飯訖盥漱已。捫腹方果然。婆娑庭前步。安穩窗下眠。外養物不費。內歸心不煩。不費用難盡。不煩神易安。庶幾無天閔。得以終天年。

晚涼偶詠

日下西墻西。風來北窗北。中有逐涼人。單牀獨棲息。飄蕭過雲雨。搖曳歸飛翼。新葉多好陰。初筠有佳色。幽深小池館。優穩閒官職。不愛勿復論。愛亦不易得。酬牛相公宮城早秋寓言見示兼呈夢得

七月中氣後。金與火交爭。一聞白雪唱。暑退清風生。碧樹未搖落。寒蟬始悲鳴。夜涼枕簟滑。秋燥衣巾輕。疏受老慵出。劉楨疾未平。何人伴公醉。新月上宮城。

小臺晚坐憶夢得

汲泉灑小臺。臺上無纖埃。解帶面西坐。輕襟隨風開。晚涼閒興動。憶同傾一杯。

月明候柴戶。藜杖何時來。

種桃歌

食桃種其核。一年核生芽。二年長枝葉。三年桃有花。憶昨五六歲。灼灼盛芬華。迨茲八九載。有減而無加。去春已稀少。今春漸無多。明年後年後。芳意當如何。命酒樹下飲。停杯拾餘葩。因桃忽自感。悲吒成狂歌。

狂言示諸姪

世欺不識字。我忝攻文筆。世欺不得官。我忝居班秩。人老多病苦。我今幸無疾。人老多憂累。我今婚嫁畢。心安不移轉。身泰無牽率。所以十年來。形神閒且逸。況當垂老歲。所要無多物。一裘煖過冬。一飯飽終日。勿言舍宅小。不過寢一室。何用鞍馬多。不能騎兩匹。如我優幸身。人中十有七。如我知足心。人中百無一。傍觀愚亦見。當已賢多失。不敢論他人。狂言示諸姪。

偶以拙詩數首寄呈裴少尹侍郎蒙以盛製四篇一時酬和重投長句美而謝之。

投君之文甚荒蕪。數篇價值一束芻。報我之章何璀璨。纍纍四貫驪龍珠。毛詩三百篇後得。文選六十卷中無。一麋麗龜絕報賽。五鹿連拄難支梧。高興獨因秋日盡。清吟多與好風俱。銀鈎金錯兩殊重。宜上屏風張座隅。

立秋 涼風忽至。炎暑稍消。卽事詠懷。寄汴州節度使李二十尚書。

嫋嫋檐樹動。好風西南來。紅缸霏微滅。碧幌飄飄開。披襟有餘涼。拂簟無纖埃。但喜煩暑退。不惜光陰催。河秋稍清淺。月午方徘徊。或行或坐臥。體適心悠哉。美人在浚都。旌旗繞樓臺。雖非滄溟阻。難見如蓬萊。蟬吟節又換。雁送書未迴。君位日寵重。我年日催頹。無因風月下。一舉平生杯。英華作一與共持杯。

開成二年夏聞新蟬贈夢得

十年來。常與夢得素居。同在洛下。每聞蟬多有寄答。今喜以此篇唱之。

十載與君別。常感新蟬鳴。今年共君聽。同在洛陽城。噪處知林靜。聞時覺景清。涼風忽嫋嫋。秋思先秋生。殘槿花邊立。老槐陰下行。雖無索居恨。還動長年情。且喜未聾耳。年年聞此聲。

題牛相公歸仁里宅新成小灘

平生見流水。見此轉畱連。況此朱門內。君家新引泉。伊流決一帶。洛石砌千拳。與君三伏月。滿耳作潺湲。深處碧磷磷。淺處清濺濺。碕岸束鳴咽。沙汀散淪漣。翻浪雪不盡。澄波空共鮮。兩崖灑瀆口。一泊瀟湘天。曾作天南客。漂流六七年。何山不倚杖。何水不停船。巴峽聲心裏。松江色眼前。今朝小灘上。能不思悠然。

春日閒居三首

陶云愛吾屋。吾亦愛吾屋。屋中有琴書。聊以慰幽獨。是時三月半。花落庭蕪綠。舍上晨鳩鳴。窗間春睡足。睡足起閒坐。景晏方櫛沐。今日非十齋。庖童饋魚肉。飢來恣餐歡。冷熱隨所欲。飽竟快搔爬。筋骸無檢束。豈徒暢肢體。兼欲遺耳目。便可傲松喬。何假杯中祿。

【二】

廣池春水平。羣魚恣游泳。新林綠陰成。衆鳥欣相鳴。時我亦瀟灑。適無累與病。魚鳥人則殊。同歸於遂性。緬思山梁雉。時哉感孔聖。聖人不得所。慨然歎時命。我今對鱗羽。取樂成謠詠。得所仍得時。吾生一何幸。

【三】

勞者不覺歌。歌其勞苦事。逸者不覺歌。歌其逸樂意。問我逸如何。閒居多興味。問我樂如何。閒官少憂累。又問俸厚薄。百千隨月至。又問年幾何。七十行欠二。所得皆過望。省躬良可媿。馬閒無羈絆。鶴老有祿位。設自爲化工。優饒只如是。安得不歌詠。默默受天賜。

小閣閒坐

閣前竹蕭蕭。閣下水潺潺。拂簟卷簾坐。清風生其閒。靜聞新蟬鳴。遠見飛鳥還。

但有巾挂壁。而無客叩關。二疏返故里。四老歸舊山。吾亦適所願。求閑而得閑。

遊平泉宴浥澗宿香山石樓贈座客

逸少集蘭亭。季倫宴金谷。金谷太繁華。蘭亭缺絲竹。何如今日會。浥澗平泉曲。杯酒與管絃。貧中隨分足。紫鮮林筍嫩。紅潤園桃熟。采摘助盤筵。芳滋盈口腹。閒吟暮雲碧。醉藉春草綠。舞妙豔流風。歌清叩寒玉。古詩惜晝短。勸我令秉燭。是夜勿言歸。相携石樓宿。

池上幽境

裊裊過水橋。微微入林路。幽境深誰知。老身閒獨步。行行何所愛。遇物自成趣。平滑青盤石。低密綠陰樹。石上一素琴。樹下雙草屨。此是榮先生。坐禪三樂處。

夏日閒放

時暑不出門。亦無賓客至。靜室深下簾。小庭新掃地。褰裳復岸幘。閒傲得自恣。朝景枕簟清。乘涼一覺睡。午餐何所有。魚肉一兩味。夏服亦無多。蕉紗三五事。資身既給足。長物徒煩費。若比簞瓢人。吾今太富貴。

和思黯居守獨飲偶醉見示六韻時夢得和篇先成頗為麗絕因添兩韻繼而美之

宮漏滴漸闌。城烏啼復歇。此時若不醉。爭奈千門月。主人中夜起。妓燭前羅列。歌袂默收聲。舞鬟低赴節。絃吟玉柱品。酒透金杯熱。朱顏忽已酡。清奏猶未闕。妍詞黯先唱。逸韻劉繼發。鏗然雙雅音。金石相磨戛。

和夢得洛中早春見贈七韻

衆皆賞春色。君獨憐春意。春意竟如何。老夫知此味。燭餘減夜漏。衾暖添朝睡。恬和臺上風。虛潤池邊地。開遲花養豔。語嬾鶯含思。似訝隔年齋。如勸迎春醉。何日同宴遊。心期二月二。

櫻桃花下有感而作

開成三年春季。美周賓客南池者。

藹藹美周宅。櫻繁春日斜。一爲洛下客。十見池上花。爛熳豈無意。爲君占年華。風光饒此樹。歌舞勝諸家。失盡白頭伴。長成紅粉娃。停杯兩相顧。堪喜亦堪嗟。

洗竹

布裘寒擁頸。氈履溫承足。獨立冰池前。久看洗霜竹。先除老且病。次去穢而曲。剪棄猶可憐。琅玕十餘束。青青復籊籊。頗異凡草木。依然若有情。迴頭語僮僕。小者截魚竿。大者編茅屋。勿作簞與箕。而令糞土辱。

新沐浴

形適外無恙。心恬內無憂。夜來新沐浴。肌髮舒且柔。寬裁夾烏帽。厚絮長白裘。裘溫裹我足。帽暖覆我頭。先進酒一杯。次舉粥一甌。半酣半飽時。四體春悠悠。是月歲陰暮。慘冽天地愁。白日冷無光。黃河凍不流。何處征戍行。何人羈旅遊。窮途絕糧客。寒獄無燈囚。勞生彼何苦。遂性我何優。撫心但自媿。孰知其所由。

三年除夜

晰晰燎火光。氤氳臘酒香。嗤嗤童穉戲。迢迢歲夜長。堂上書帳前。長幼合成行。以我年最長。次第來稱觴。七十期漸近。萬緣心已忘。不唯少歡樂。兼亦無悲傷。素屏應居士。青衣侍孟光。夫妻老相對。各坐一繩床。

自題小園

不鬪門館華。不鬪林園大。但鬪爲主人。一坐十餘載。迴看甲乙第。列在都城內。素垣夾朱門。藹藹遙相對。主人安在哉。富貴去不廻。池乃爲魚鑿。林乃爲禽栽。何如小園主。拄杖閒卽來。親賓有時會。琴酒連夜開。以此聊自足。不羨大池臺。

病中晏坐

有酒病不飲。有詩慵不吟。頭眩罷垂釣。手痺休援琴。竟日悄無事。所居閒且深。外安支離體。中養希夷心。窗戶納秋景。竹木澄夕陰。宴坐小池畔。清風時動襟。

戒藥

促促急景中。蠢蠢微塵裏。生涯有分限。愛戀無終已。早天羨中年。中年羨暮齒。暮齒又貪生。服食求不死。朝吞太陽精。夕吸秋石髓。微福反成災。藥誤者多矣。以之資嗜慾。又望延甲子。天人陰陽間。亦恐無此理。域中有真道。所說不如此。後身始身存。吾聞諸老氏。

贈夢得

前日君家飲。昨日王家宴。今日過我廬。三日三會面。當歌聊自放。對酒交相勸。爲我盡一杯。與君發三願。一願世清平。二願身強健。三願臨老期。數與君相見。

逸老

莊子云。勞我以生。逸我以老。息我以死也。

白日下駸駸。青天高浩浩。人生在其中。適時卽爲好。勞我以少壯。息我以衰老。順之多吉壽。違之或凶夭。我初五十八。息老雖非早。一閑十三年。所得亦不少。況加祿仕後。衣食常溫飽。又從風疾來。女嫁男婚了。曾中一無事。浩氣凝襟抱。飄若雲信風。樂於魚在藻。桑榆坐已暮。鐘漏行將曉。皤然七十翁。亦足稱壽考。筋骸本非實。一束芭蕉草。眷屬偶相依。一夕同棲鳥。去何有顧戀。住亦無憂惱。生死尙復然。其餘安足道。是故臨老心。冥然合玄造。

遇物感興因示子弟

聖擇狂夫言。俗信老人語。我有老狂詞。聽之吾語汝。吾觀器用中。劍銳鋒多傷。吾觀形骸內。骨勁齒先亡。寄言處世者。不可苦剛強。龜性愚且善。鳩心鈍無惡。人賤拾支牀。鶻欺擒煖脚。寄言立身者。不得全柔弱。彼固罹禍難。此未免憂患。于何保終吉。強弱剛柔閒。上遵周孔訓。旁鑒老莊言。不唯鞭其後。亦要軛其先。

首夏南池獨酌

春盡雜英歇。夏初芳草深。薰風自南至。吹我池上林。綠蘋散還合。鱖鯉跳復沈。新葉有佳色。殘鶯猶好音。依然謝家物。池酌對風琴。慙無康樂作。秉筆思沈吟。境勝才思劣。詩成不稱心。

官俸初罷親故見憂以詩諭之

七年爲少傅。品高俸不薄。乘軒已多慙。況是一病鶴。又及懸車歲。筋力轉衰弱。豈以貧是憂。尙爲名所縛。今春始病免。纓組初擺落。蜩甲有何知。雲心無所著。困中殘舊穀。可備歲飢惡。園中多新蔬。未至食藜藿。不求安師卜。不問陳生藥。但對丘中琴。時開池上酌。信風舟不繫。掉尾魚方樂。親友不我知。而憂我寂寞。

閒居偶吟招鄭庶子皇甫郎中

自哂此迂叟。少迂老更迂。家計不一問。園林聊自娛。竹間琴一張。池上酒一壺。更無俗物到。但與秋光俱。古石蒼錯落。新泉碧縈紆。焉用車馬客。卽此是吾徒。猶有所思人。各在城一隅。杳然愛不見。搔首方踟躕。玄晏風韻遠。子真雲貌孤。誠知厭朝市。何必憶江湖。能來小澗上。一聽潺湲無。

亭西牆下伊渠水中置石激流潺湲成韻頗有幽趣以詩記之

嵌巉嵩石峭。皎潔伊流清。立爲遠峰勢。激作寒玉聲。夾岸羅密樹。面灘開小亭。忽疑嚴子瀨。流入洛陽城。是時羣動息。風靜微月明。高枕夜悄悄。滿耳秋泠泠。終日臨大道。何人知此情。此情苟自愜。亦不要人聽。

閒題家池寄王屋張道士

有石白磷磷。有水清潺潺。有叟頭似雪。婆娑乎其閒。進不趨要路。退不入深山。深山太濶落。要路多險艱。不如家池上。樂逸無憂患。有食適吾口。有酒酤吾顏。恍惚遊醉鄉。希夷造玄關。五千言下悟。十二年來閒。富者我不顧。貴者我不攀。唯有天壇子。時來一往還。

李盧二中丞各創山居俱誇勝絕然去城稍遠來往頗勞敝居新泉實在宇下偶題十五韻聊戲二君

龍門蒼石壁。汜湖碧潭水。各在一山隅。迢迢幾十里。清鏡碧屏風。惜哉信爲美。愛而不得見。亦與無相似。聞君每來去。矻矻事行李。脂轄復裹糧。心力頗勞止。未如吾舍下。石與泉甚邇。鑿鑿復濺濺。晝夜流不已。洛石千萬拳。櫛波鋪錦綺。海珉一兩片。激瀨含宮徵。綠宜春濯足。淨可朝漱齒。繞砌紫鱗游。拂簾白鳥起。何言履道叟。便是滄浪子。君若趁歸程。請君先到此。願以潺湲聲。洗君塵土耳。

北窗竹石

一片瑟瑟石。數竿青青竹。向我如有情。依然看不足。況臨北窗下。復近西塘曲。筠風散餘清。苔雨含微綠。有妻亦衰老。無子方犢獨。莫掩夜窗扉。共渠相伴宿。

飲後戲示弟子

吾爲爾先生。爾爲吾弟子。孔門有道訓。復坐吾告爾。先生饌酒食。弟子服勞止。孝敬不在他。在茲而已矣。欲我少憂愁。欲我多歡喜。無如醞好酒。酒須多且旨。旨即賓可留。多即壘不恥。吾更有一言。爾宜聽入耳。人老多憂貧。人病多憂死。我今雖老病。所憂不在此。憂在半酣時。尊空座客起。

閒坐看書貽諸少年

雨砌長寒蕪。風庭落秋果。窗閒有閒叟。盡日看書坐。書中見往事。歷歷知福禍。

多取終厚亡。疾驅必先墮。勸君少干名。名爲錮身鎖。勵君少求利。利是焚身火。我心知已久。吾道無不可。所以雀羅門。不能寂寞我。

夢上山

時足疾未平。

夜夢上嵩山。獨携藜杖出。千巖與萬壑。遊覽皆周畢。夢中足不病。健似少年日。既悟神返初。依然舊形質。始知形神內。形病神無疾。形神兩是幻。夢悟俱非實。晝行雖蹇澁。夜步頗安逸。晝夜既平分。其閒何得失。

對酒閑吟贈同老者

人生七十稀。我年幸過之。遠行將盡路。春夢欲覺時。家事口不問。世名心不思。老既不足歎。病亦不能治。扶持仰婢僕。將養信妻兒。飢飽進退食。寒暄加減衣。聲妓放鄭衛。裘馬脫輕肥。百事盡除去。尙餘酒與詩。興來吟一篇。吟罷酒一卮。不獨適情性。兼用扶衰羸。雲液灑六腑。陽和生四肢。於中我自樂。此外吾不知。寄問同老者。舍此將安歸。莫學蓬心叟。胸中殘是非。

晚起閒行

皤然一老子。擁裘仍隱几。坐穩夜忘眠。臥安朝不起。起來無可作。閉目時叩齒。靜對銅爐香。暖漱銀餅水。午齋何儉潔。餅與蔬而已。西寺講楞伽。閒行一隨喜。

香山居士寫真詩并序

元和五年予爲左拾遺翰林學士奉詔寫真於集賢殿御書院時年三十七會昌二年罷太子少傅爲白衣居士又寫真於香山寺藏經堂時年七十一前後相望殆將三紀觀今照昔慨然自歎者久之形容非一世事幾變因題六十字以寫所懷

昔作少學士。圖形入集賢。今爲老居士。寫貌寄香山。鶴鬣變玄髮。雞膚換朱顏。前形與後貌。相去三十年。勿歎韶華子。俄成幡叟仙。請看東海水。亦變作桑田。

二年三月五日齋畢開素當食偶吟贈妻弘農郡君

睡足肢體暢。晨起開中堂。初旭泛簾幕。微風拂衣裳。二嫂扶盥櫛。雙童昇簾牀。庭東有茂樹。其下多陰涼。前月事齋戒。昨日散道場。以我久蔬素。加籩仍異糧。魴鱗白如雪。蒸炙加桂薑。稻飯紅似花。調沃新酪漿。佐以脯醢味。閒之椒薤芳。老憐口尙美。病喜鼻聞香。嬌駸三四孫。索哺繞我傍。山妻未舉案。饑叟已先嘗。憶同牢。初。家貧共糟糠。今食且如此。何必烹豬羊。況觀姻族閒。夫妻半存亡。偕老不易得。白頭何足傷。食罷酒一杯。醉飽吟又狂。緬想梁高士。樂道喜文章。徒誇五噫作。不解贈孟光。

不出門

彌月不出門。永日無來賓。食飽更拂牀。睡覺一頓伸。輕篔白鳥羽。新篔青箭筠。方寸方丈室。空然兩無塵。披衣腰不帶。散髮頭不巾。袒跣北窗下。葛天之遺民。一日亦自足。況得以終身。不知天壤內。自我爲何人。

感舊并序

故李侍郎杓直長慶元年春薨元相公微之太和六年秋薨崔侍郎晦叔太和七年夏薨劉尚書夢得會昌二年秋薨四君子予之執友也三十年閒凋零共盡唯予衰病至今獨存因詠悲懷題爲感舊

晦叔墳荒草已陳。夢得墓溼土猶新。微之捐館將一紀。杓直歸丘二十春。城中雖有故第宅。庭燕園廢生荆榛。篋中亦有舊書札。紙穿字蠹成灰塵。平生定交取人窄。屈指相知唯五人。四人先去我在後。一枝蒲柳衰殘身。豈無晚歲新相識。相識面親心不親。人生莫羨苦長命。命長感舊多悲辛。

送毛仙翁

江州司馬時作

仙翁已得道。混迹尋巖泉。肌膚冰雪瑩。衣服雲霞鮮。紺髮絲竝綴。韶容花共妍。方瞳點玄漆。高步凌非煙。幾見桑變海。莫知龜鶴年。所憩九清外。所遊五岳巔。軒昊舊爲侶。松喬難比肩。每嗟人世入。役役如狂顛。孰能脫羈鞅。盡遭名利牽。

貌隨歲律換。神逐光陰遷。惟余負憂譴。顛顛溢江壖。衰鬢忽霜白。愁腸如火煎。
 羈旅坐多感。徘徊私自憐。晴眺五老峰。玉洞多神仙。何當憫湮厄。授道安虛屣。
 我師惠然來。論道窮重玄。浩蕩八溟闊。志泰心超然。形骸既無束。得喪亦都捐。
 豈識椿菌異。那知鵬鷃懸。丹華既相付。促景定當延。玄功曷可報。感極惟勤拳。
 霓旌不肯駐。又歸武夷川。語罷倏然別。孤鶴升遙天。賦詩敘明德。永續步虛篇。

達哉樂天行

達哉達哉白樂天。分司東都十三年。七旬纔滿冠已挂。半祿未及車先懸。
 或伴遊客春行樂。或隨山僧夜坐禪。二年忘卻問家事。門庭多草厨少煙。
 庖童朝告鹽米盡。侍婢暮訴衣裳穿。妻孥不悅甥姪悶。而我醉臥方陶然。
 起來與爾畫生計。薄產處置有後先。先賣南坊十畝園。次賣東郭五頃田。
 然後兼賣所居宅。鬻鬻獲緡二三千。半與爾充衣食費。半與吾供酒肉錢。
 吾今已年七十一。眼昏鬚白頭風眩。但恐此錢用不盡。即先朝露歸夜泉。
 未歸且住亦不惡。飢餐樂飲安穩眠。死生無可無不可。達哉達哉白樂天。
 能無媿

十兩新綿褐。

披行暖似春。

一團香絮枕。

倚坐穩於人。

婢僕遣他嘗藥酒。

兒孫與我拂衣巾。

迴看左右能無媿。

養活枯殘廢退身。

白樂天詩後集卷五

律詩

凡八十首

小歲日對酒噓錢湖州所寄詩

獨酌無多興。閒吟有所思。一杯新歲酒。兩句故人詩。楊柳初黃日。髭鬚半新時。
 蹉跎春氣味。彼此老心知。

錢塘湖春行

孤山寺北賈亭西。水面初平雲脚低。幾處早鶯爭暖樹。誰家詩燕啄春泥。
 亂花漸欲迷人眼。淺草纔能沒馬蹄。最愛湖東行不足。綠楊陰裡白沙堤。

題靈隱寺紅辛夷花戲酬光上人

紫粉筆含尖火焰。紅臙脂染小蓮花。芳情香思知多少。惱得山僧悔出家。
 重向火

火銷灰復死。疎棄已經旬。豈是人情薄。其如天氣春。風寒忽再起。手冷重相親。

卻就紅爐坐。心如逢故人。

候仙亭同諸客醉作。

謝安山下空攜妓。柳暉洲邊只賦詩。

爭及湖亭今日會。

嘲花詠水贈蛾眉。

城上

城上鼙鼓。朝衙復晚衙。為君慵不出。

落盡遠城花。

早行林下

披衣未冠櫛。晨起入前林。宿露殘花氣。朝光新葉陰。傍松人迹少。隔竹鳥聲深。

閒倚小橋立。傾頭時一唸。

送李校書趁寒食歸義興山居。

大見騰騰詩酒客。不憂生計似君稀。

到舍將何作寒食。

滿船唯載樹陰歸。

題孤山寺山石榴花示諸僧衆。

山榴花似結紅巾。容豔新妍占斷春。

色相故開行道地。

香塵擬觸坐禪人。

瞿曇弟子君知否。恐是天魔女化身。

獨行

聞誦黃庭經在口。閒攜青竹杖隨身。

晚花新筍堪為伴。

獨入林行不要人。

二月五日花下作

二月五日花如雪。五十二人頭似霜。

聞有酒時須笑樂。

不關身事莫思量。

羲和趁日沈西海。鬼伯驅人葬北邙。

只有且來花下醉。

從人笑道老顛狂。

戲題木蘭花

紫房日照臙脂柝。素豔風吹膩粉開。

怪得獨饒脂粉態。

木蘭曾作女郎來。

清明日觀妓舞聽客詩

看舞顏如玉。聽詩韻似金。綺羅從許笑。

絃管不妨吟。可惜春風老。無嫌酒盞深。

辭花送寒食。併在此時心。

西湖晚歸回望孤山寺贈諸客

柳湖松島蓮花寺。晚動歸橈出道場。

廬橘子低山雨重。

棕櫚葉戰水風涼。

煙波澹蕩搖空碧。樓殿參差倚夕陽。

到岸請君回首望。

蓬萊宮在海中央。

湖中自照

重重照影看容鬢。不見朱顏見白絲。

失卻少年無覓處。

泥他湖水欲何為。

贈蘇鍊師

兩鬢蒼然心浩然。松窗深處藥爐前。

攜將道士通宵語。

忘卻花時盡日眠。

明鏡傾開長在匣。素琴欲弄半無絃。猶嫌莊子多詞句。只讀逍遙六七篇。

杭州春望

望海樓明照曙霞。護江隄白蹋晴沙。濤聲夜入伍員廟。柳色春藏蘇小家。
紅袖織綾誇柿蒂。青旗沽酒趁梨花。誰開湖寺西南路。草綠裾腰一道斜。

飲散夜歸贈諸客

鞍驚夜紛紛。香街起暗塵。回鞭招飲妓。分火送歸人。風月應堪惜。杯觴莫厭頻。
明朝三月盡。忍不送殘春。

湖亭晚歸

盡日湖亭臥。心閒事亦稀。起因殘醉醒。坐待晚涼歸。松雨飄藤帽。江風透葛衣。
柳堤行不厭。沙軟絮霏霏。

東樓南望八韻

不厭東南望。江樓對海門。風濤生有信。天水合無痕。鷁帶雲帆動。鷗和雪浪翻。
魚鹽聚爲市。煙火起成邨。日脚金波碎。峯頭鈿點繁。送秋千里鴈。報暝一聲猿。
已豁煩襟悶。仍開病眼昏。郡中登眺處。無勝此東軒。

醉中酬殷協律

泗水城邊一分散。浙江樓上重遊陪。揮鞭二十年前別。命駕三千里外來。
醉袖放狂相向舞。愁眉和笑一時開。畱君夜住非無分。且盡青娥紅燭臺。

孤山寺遇雨

拂波雲色重。洒葉雨聲繁。水鷺雙飛起。風荷一向翻。空濛連北岸。蕭颯入東軒。
或擬湖中宿。畱船在寺門。

樟亭雙櫻樹

南館西軒兩樹櫻。春條長足夏陰成。素華朱實今雖盡。碧葉風來別有情。

湖上夜飲

郭外迎人月。湖邊醒酒風。誰畱使君飲。紅燭在舟中。

贈沙鷗

老逼教垂白。官科遣著緋。形骸雖有累。方寸卻無機。遇酒多先醉。逢山愛晚歸。
沙鷗不知我。猶避隼旗飛。

餘杭形勝

餘杭形勝四方無。州傍青山縣枕湖。遠郭荷花三十里。拂城松樹一千株。
夢兒亭古傳名謝。教妓樓新道姓蘇。獨有使君年太老。風光不稱白髭鬚。

江樓夕望招客

海天東望夕茫茫。山勢川形濶復長。
燈火萬家城四畔。星河一道水中央。
風吹古木晴天雨。月照平沙夏夜霜。
能就江樓銷暑否。比君茅舍校清涼。

新秋病起

一葉落梧桐。年光半又空。秋多上階日。
涼足入懷風。病瘦形如鶴。愁焦鬢似蓬。
損心詩思裏。伐性酒狂中。華蓋何曾惜。
金丹不致功。猶須自慙愧。得作白頭翁。

木芙蓉花下招客飲

晚涼思飲兩三杯。召得江頭酒客來。
莫怕秋無伴醉物。水蓮花盡木蓮開。

悲歌

白頭新洗鏡新磨。老逼身來不奈何。
耳裏頻聞故人死。眼前唯覺少年多。
塞鴻遇暖猶回翅。江水因潮亦反波。
獨有衰顏留不得。醉來無計但悲歌。

江樓晚眺景物鮮奇吟翫成篇寄水部張籍員外

澹煙疎雨閒斜陽。江色鮮明海氣涼。
蜃散雲收破樓閣。虹殘水照斷橋梁。
風翻白浪花千片。鴈點青天字一行。
好著丹青圖寫取。題詩寄與水曹郎。

夜招周協律兼答所贈

滿眼雖多客。開眉復向誰。少年非我伴。
秋夜與君期。落魄俱耽酒。殷勤共愛詩。
相憐別有意。彼此老無兒。

重酬周判官

秋愛冷吟春愛醉。詩家眷屬酒家仙。
若教早被浮名繫。可得閒遊三十年。

飲後夜醒

黃昏飲散歸來臥。夜半人扶強起行。
枕上酒客和睡醒。樓前海月伴潮生。
將歸梁燕還重宿。欲滅窗燈卻復明。
直至曉來猶妄想。耳中如有管絃聲。

代賣薪女贈諸妓

亂蓬爲鬢布爲巾。曉蹋寒山自負薪。
一種錢塘江畔女。著紅騎馬是何人。

奉和李大夫題新詩二首各六韻

因嚴亭

箕穎人窮獨。蓬壺路阻難。何如兼吏隱。
復得事躋攀。巖樹羅階下。江雲貯棟閒。
似移天目石。疑入武丘山。清景徒堪賞。
皇恩肯放閒。遙知興未足。即被詔徵還。

忘筌亭

翠巘公門對。朱軒野逕連。只開新戶牖。
不改舊風煙。虛室閒生白。高情澹入玄。

酒容同座勸。詩借屬城傳。自笑滄江畔。遙思絳帳前。亭臺隨處有。爭取比忘筵。

予以長慶二年冬十月到杭州。明年秋九月始與范陽盧賈汝南周元範。

蘭陵蕭悅清河崔求東萊劉方輿同遊恩德寺之泉洞竹石籍甚久矣。及

茲目擊果愜心期。因自嗟云。到郡周歲。方來入寺。半日復去。俯視朱綬。仰

睇白雲。有愧於心。遂畱絕句。

雲水埋藏恩德洞。簪裾束縛使君身。暫來不宿歸州去。應被山呼作俗人。

早冬

十月江南天氣好。可憐冬景似春華。霜輕未殺萋萋草。日暖初乾漠漠沙。

老柘葉黃如嫩樹。寒櫻枝白是狂花。此時卻羨閒人醉。五馬無由入酒家。

共知欲老流年急。且喜新正假日頻。鬪健此時相勸醉。偷閒何處共尋春。

脚隨周叟行猶疾。頭比蕭翁白未勻。歲酒先拈辭不得。被君推作少年人。

與諸客攜酒尋去年梅花有感

馬上同攜今日杯。湖邊共覓去春梅。年年只是人空老。處處何曾花不開。

詩思又牽吟咏發。酒酣閒喚管絃來。樽前百事皆依舊。點檢惟無薛秀才。

去年與薛景文同賞。今年長逝。

醉送李協律赴湖南辟命。因寄沈八中丞

富陽山底樟亭畔。立馬停舟飛酒盃。曾共中丞情繾綣。暫畱協律語踟躕。

紫微星北承恩去。青草湖南稱意無。不羨君官羨君幕。幕中收得阮元瑜。

內道場永謹上人就郡見訪。善說維摩經。臨別請詩。因以此贈

五夏登壇內殿師。水爲心地玉爲儀。正傳金粟如來偈。何用錢塘太守詩。

苦海出來應有路。靈山別後可無期。他生莫忘今朝會。虛白亭中法樂時。

見李蘇州示男阿武詩。自感成詠

遙羨青雲裏。祥鸞正引雛。自憐滄海畔。老蚌不生珠。

正月十五日夜月

歲熟人心樂。朝遊復夜遊。春風來海上。明月在江頭。燈火家家市。笙歌處處樓。

無妨思帝里。不合厭杭州。

題州北路傍老柳樹

皮枯緣受風霜久。條短爲經攀折頻。但見半衰當此路。不知初種是何人。

雪花零碎逐年減。煙葉稀疎隨分新。莫道老株芳意少。逢春猶勝不逢春。

題清頭陀

頭陀獨宿寺西峰。

百尺禪菴半夜鐘。

煙月蒼蒼風瑟瑟。

更無雜樹對山松。

自歎二首

形羸自覺朝餐減。

睡少偏知夜漏長。

實事漸消虛事在。

銀魚金帶透腰光。

【二】

二毛曉落梳頭懶。

兩眼春昏點藥頻。

唯有閒行猶得在。

心情未到不如人。

湖上醉中代諸妓寄嚴郎中

笙歌杯酒正歡娛。

忽憶仙郎望帝都。

借問連宵直南省。

何如盡日醉西湖。

蛾眉別久心知否。

雞舌含多口厭無。

還有些些惆悵事。

春來山路見蘼蕪。

自詠

悶發每吟詩引興。

興來兼酌酒開顏。

欲逢暇日先招客。

正對衙時亦望山。

勾檢簿書多鹵莽。

隄防官吏少機關。

誰能頭白勞心力。

人道無才也是閒。

晚興

草淺馬翩翩。

新晴薄暮天。

柳條春拂面。

衫袖醉垂鞭。

等閒消一日。

不覺過三年。

立語花隄上。

行吟水寺前。

早興

晨光出照屋梁明。

初打開門鼓一聲。

犬上階眠知地濕。

鳥臨窗語報天晴。

半銷宿酒頭仍重。

新脫冬衣體乍輕。

睡覺心空思想盡。

近來鄉夢不多成。

竹樓宿

小書樓下千竿竹。

深火爐前一盞燈。

此處與誰相伴宿。

燒丹道士坐禪僧。

湖上招客送春汎舟

欲送殘春招酒伴。

客中誰最有風情。

兩瓶箬下新開得。

一曲霓裳初教成。

排比管絃行翠袖。

指麾船舫點紅旌。

慢牽好向湖心去。

恰似菱花鏡上行。

戲醉客

莫言魯國書生懦。

莫把杭州刺史欺。

醉客請君開眼望。

綠楊風下有紅旗。

紫陽花

招賢寺有山花一樹。無人知名。色紫氣香。芳麗可愛。頗類仙物。因以紫陽花名之。

何年植向仙壇上。

早晚移栽到梵家。

雖在人閒人不識。

與君名作紫陽花。

祭社宵興燈前偶作

城頭傳鼓角。

燈下整衣冠。

夜鏡藏鬚白。

秋泉漱齒寒。

更待年終後。

支持歸計看。

閒臥

盡日前軒臥。神閒境亦空。有山當枕上。無事到心中。簾卷侵牀日。屏遮入座風。望春春未到。應在海門東。

新春江次

浦乾潮未應。堤濕凍初銷。紛片妝梅朵。金絲刷柳條。鴨頭新綠水。雁齒小紅橋。莫怪珂聲碎。春來五馬驕。

春題湖上

湖上春來似畫圖。亂峰圍繞水平鋪。松排山面千重翠。月點波心一顆珠。碧澹線頭抽早稻。青羅裙帶展新蒲。未能拋得杭州去。一半勾留是此湖。

失鶴

失為庭前雪。飛因海上風。九霄應得侶。三夜不歸籠。聲斷碧雲外。影沈明月中。郡齋從此後。誰伴白頭翁。

自歎

宴遊寢食漸無味。杯酒管絃徒繞身。賓客歡娛僮僕飽。始知官職為他人。

同諸客攜酒早看櫻桃花

曉報櫻桃發。春攜酒客過。綠飴粘盞杓。紅雪壓枝柯。天色晴明少。人生事故多。

停杯替花語。不醉擬如何。

柳絮

三月盡時頭白日。與春老別更依依。憑鶯為向楊花道。絆惹春風莫放歸。

早飲湖州酒寄崔使君

一榼扶頭酒。泓澄瀉玉壺。十分蘸甲酌。潑灑滿銀盃。捧出華光動。嘗看氣味殊。手中稀琥珀。舌上冷醍醐。瓶裏有時盡。江邊無處沽。不知崔太守。更有寄來無。

病中書事

三載臥山城。閒知節物情。鶯多過春語。蟬不待秋鳴。氣嗽因寒發。風痰欲雨生。病身無所用。唯解卜陰晴。

與微之唱和來去常以竹筒貯詩陳協律美而成編因以此答

揀得琅玕截短筒。緘題章句寫心曾。隨風每喜飛如鳥。渡水常憂化作龍。

粉節堅如太守信。霜筠冷稱大夫容。煩君讚詠心知愧。魚目驪珠同一封。

醉戲諸妓

席上爭飛使君酒。歌中多唱舍人詩。不知明日休官後。逐我東山去是誰。

北院

北院人稀到。東窗地最偏。竹煙行竈上。石壁臥房前。性拙身多暇。心慵事少緣。還如病居士。唯置一牀眠。

酬周協律

五十錢塘守。應為送老官。濫蒙辭客愛。猶作近臣看。鑿落愁須飲。琵琶悶遣彈。白頭雖強醉。不似少年歡。

題石上人

騰騰兀兀在人閒。貴賤賢愚盡往還。羶膩筵中唯飲酒。歌鐘會處獨思山。存神不許三尸住。混俗無妨兩鬢斑。除卻餘杭白太守。何人更解愛君閒。

詩解

新篇日日成。不是愛聲名。舊句時時改。無妨悅性情。但令長守郡。不覺卻歸城。祇擬江湖上。吟哦過一生。

潮

早潮纔落晚潮來。一月周流六十回。不獨光陰朝復暮。杭州老去被潮催。

聞歌妓唱嚴郎中詩。因以絕句寄之

嚴前為郡守

已畱舊政布中和。又付新詞與豔歌。但是人家有遺愛。就中蘇小感恩多。

柘枝妓

平鋪一合錦筵開。連擊三聲畫鼓催。紅蠟燭移桃葉起。紫羅衫動柘枝來。帶垂鈿胯花腰重。帽轉金鈴雪面迴。看即曲終畱不住。雲飄雨送向陽臺。

急樂世辭

一作急世樂

正抽碧線繡紅羅。忽聽黃鶯斂翠蛾。秋思冬愁春悵望。大都不稱意時多。

天竺寺送堅上人歸廬山

錫杖登高寺。香爐憶舊峰。偶來舟不繫。忽去鳥無蹤。豈要畱離偈。寧勞動別容。與師俱是夢。夢裏暫相逢。

畱題郡齋

吟山歌水嘲風月。便是三年官滿時。春為醉眠多閉閣。秋因晴望暫褰帷。更無一事移風俗。唯化州民解詠詩。

別州民

耆老遮歸路。壺漿滿別筵。甘棠無一樹。那得淚潸然。稅重多貧戶。農饑足旱田。唯畱一湖水。與汝救凶年。

今年增築錢塘湖隄。貯水以防天旱。故云。

畱題天竺靈隱兩寺

伯樂天詩後集卷五

在郡六百日。入山十二回。宿因月桂落。天竺嘗有月中桂子落。靈隱多海石榴花也。黃紙除書到。

青宮詔命催。僧徒多悵望。賓從亦徘徊。寺閣煙埋竹。林香雨落梅。別橋憐白石。

辭洞戀青苔。石橋在天竺。明洞在靈隱。漸出松閒路。猶飛馬上杯。誰教冷泉水。送我下山來。

西湖畱別

征途行色慘風煙。祖帳離聲咽管絃。翠黛不須畱五馬。皇恩只許住三年。

綠藤陰下鋪歌席。紅藕花中泊妓船。處處回頭盡堪戀。就中難別是湖邊。

重題別東樓

東樓勝事我偏知。氣象多隨昏旦移。湖卷衣裳白重疊。山張屏障綠參差。

海仙樓塔晴方出。江女笙簫夜始吹。春雨星攢尋蟹火。秋風霞颭弄濤旗。

餘杭風俗。每寒食雨後夜涼。家家持蠶。蠶動。盈萬人。每歲八月迎濤弄水者。悉舉旗。馬。太守三年嘲不盡。郡齋空作百篇詩。宴宜雲髻新梳後。曲愛霓裳未拍時。

別周軍事

主人頭白官仍冷。去後憐君是底人。試謁會稽元相去。不妨相見卻殷勤。

白樂天詩後集卷六

律詩 凡六十首

元微之除浙東觀察使喜得杭越隣州先贈長句

稽山鏡水歡遊地。犀帶金章榮貴身。官職比君雖校小。封疆與我且為隣。

郡樓對翫千峯月。江界平分兩岸春。杭越風光詩酒主。相看更合與何人。

答微之上船後畱別

燭下樽前一分手。舟中岸上兩迴頭。歸來虛白堂中夢。合眼先應到越州。

答微之西陵驛見寄

煙波盡處一點白。應是西陵古驛臺。知在臺邊望不見。暮潮空送渡船迴。

答微之誇越州州宅

賀上人回得報書。大誇州宅似仙居。厭看馮翊風沙久。喜見蘭亭煙景初。

日出旌旗生氣色。月明樓閣在空虛。知君暗數江南郡。除卻餘杭盡不如。

微之重誇州居其落句有西州羅刹之謔因嘲茲石聊以寄懷

君問西州城下事。醉中疊紙為君書。嵌空石面標羅刹。壓捺潮頭敵子胥。神鬼會鞭猶不動。波濤雖打欲何如。誰知太守心相似。抵滯堅頑兩有餘。

張十八員外以新詩二十五首見寄。郡樓月下吟翫通夕。因題卷後封寄微之。

秦城南省清秋夜。江郡東樓明月時。去我三千六百里。得君二十五篇詩。陽奉曲調高難和。淡水交情老始知。坐到天明吟未足。重封轉寄與微之。

酬微之微之題云。郡務稍簡。因得整集舊詩。并連乙綴册。削封章諫草。繁委箱笥。僅踰百軸。偶成自歎。

滿帙填箱唱和詩。少年為戲老成悲。聲聲麗曲敲寒玉。句句妍辭綴色絲。吟翫獨當明月夜。傷嗟同是白頭時。由來才命相磨折。天遣無兒欲怨誰。

微之整集舊詩及文筆為百軸。以七言長句寄樂天。樂天次韻酬之。餘思未盡。加

為六韻

海內聲華併在身。篋中文字絕無倫。遙知獨對封章草。忽憶同為獻納臣。走筆往來盈卷軸。除官遞互掌絲綸。制從長慶辭高古。詩到元和體變新。各有文姬才稚齒。俱無通子繼餘塵。琴書何必求王粲。與女猶勝與外人。

答微之詠懷見寄

閣中同直前春事。船裏相逢昨日情。分袂二年勞夢寐。並牀三宿話平生。

紫微北畔辭宮闕。滄海西頭對郡城。聚散窮通何足道。醉來一曲放歌行。

酬微之誇鏡湖

我嗟身老歲方徂。君更官高興轉孤。軍門郡閣曾閒否。禹穴耶溪得到無。酒盞省陪波卷白。骰盤思共彩呼盧。一泓鏡水誰能羨。自有曾中萬頃湖。

雪中即事寄微之

連夜江雲黃慘澹。平明山雪白模糊。銀河沙漲三千里。梅嶺花排一萬株。北市風生飄散麩。東樓日出照凝酥。誰家高士關門戶。何處行人失道途。舞鶴庭前毛稍定。擣衣砧上練新鋪。戲團稚女呵紅手。愁坐衰翁對白鬚。壓瘴一州除疾苦。呈豐萬井盡歡娛。潤含玉德懷君子。寒助霜威憶大夫。莫道煙波一水隔。何妨氣候兩鄉殊。越中地暖多成雨。還有瑤臺瓊樹無。

醉封詩筒寄微之

一生休戚與窮通。處處相隨事事同。未死又隣滄海郡。無兒俱作白頭翁。展眉只仰三杯後。代面唯憑五字中。為向兩州郵吏道。莫辭來去遞詩筒。

除夜寄微之

鬢毛不覺白毵毵。一事無成百不堪。共惜盛時辭闕下。同嗟除夜在江南。

家山泉石尋常憶。

世路風波子細誦。

老校於君合六退。

明年半百又加三。

早春西湖閒遊。悵然興懷。憶與微之同賞。因思在越官重事殷。鏡湖之遊或恐未暇。偶成十八韻寄微之。

上馬復呼賓。湖邊景氣新。管絃三數事。騎從十餘人。立換登山屐。行攜漉酒巾。逢花看當妓。遇草坐爲茵。西日籠黃柳。東風蕩白蘋。小橋裝鴈齒。輕浪蹙魚鱗。畫舫牽徐轉。銀船酌慢巡。野情遺世累。醉態任天真。彼此年將老。平生分最親。高天從所願。遠地得爲鄰。雲樹分三驛。煙波限一津。翻嗟寸步隔。卻厭尺書頻。浙右稱雄鎮。山陰委重臣。貴垂長紫綬。榮駕大朱輪。出動刀槍隊。歸生道路塵。鴈驚弓易散。鷗驚鼓難馴。百吏瞻相面。千夫捧擁身。自然閒興少。應負鏡湖春。

答微之見寄

時在那樓對雪

可憐風景浙東西。

先數餘杭次會稽。

禹廟未勝天竺寺。

錢湖不羨若耶溪。

擺塵野鶴春毛暖。

拍水沙鷗濕翅低。

更對雪樓君愛否。

紅欄碧甃點銀泥。

得湖州崔十八使君書喜與杭越隣郡因成長句代賀兼寄微之

三郡何因此結緣。

貞元科第忝同年。

故情歡喜開書後。

舊事思量在眼前。

越國封疆吞碧海。

杭城樓閣入青煙。

吳興卑小君應屈。

爲是蓬萊最後仙。

早春憶微之

昏昏老與病相和。

感物思君歎復歌。

聲早雞先知夜短。

色濃柳最占春多。

沙頭雨染斑斑草。

水面風驅瑟瑟波。

可道眼前光景惡。

其如難見故人何。

重寄別微之

憑仗江波寄一辭。

不須惆悵報微之。

猶勝往歲峽中別。

灑灑堆邊招手時。

看常州柘枝贈賈使君

按此下自杭州歸洛詩

莫惜新衣舞柘枝。

也從塵汗汗霑垂。

料君卽卻歸朝去。

不見銀泥衫故時。

汴河路有感

三十年前路。孤舟重往還。

繞身新眷屬。

舉目舊鄉關。

事去唯留水。人非但見山。

啼襟與愁鬢。此日兩成斑。

埭橋舊業

別業埭城北。拋來二十春。

改移新逕路。

變換舊邨隣。

有稅田疇薄。無官弟姪貧。

田園何用問。強半屬他人。

茅城驛

汴河無景思。秋日又淒淒。

地薄桑麻瘦。

邨貧屋舍低。

早苗多閒草。濁水半和泥。

最是蕭條處。茅城驛向西。

河陰夜泊憶微之。

憶君我正泊行舟。望我君應上郡樓。

萬里月明同此夜。

黃河東面海西頭。

杭州廻舫

自別錢塘山水後。不多飲酒懶吟詩。

欲將此意憑廻棹。

與報西湖風月知。

途中題山泉

決決涌岩穴。濺濺山洞門。向東應入海。

從此不歸源。

似葉飄辭樹。

如雲斷別根。

吾身亦如此。何日返鄉園。

欲到東洛得楊使書。因此報

向公心切向財疎。淮上休官洛下居。

三郡政能從獨步。

十年生計復何如。

使君灘上久分手。別駕渡頭先得書。

且喜平安又相見。

其餘外事盡空虛。

洛下寓居

秋館清涼日。書因解悶看。夜牕幽獨處。

琴不爲人彈。

遊宴慵多廢。

趨朝老漸難。

禪僧教斷酒。道士勸休官。渭曲莊猶在。

錢塘俸尙殘。

如能便歸去。

亦不至飢寒。

味道

叩齒晨興秋院靜。

焚香冥坐晚牕深。

七篇真誥論仙事。

一卷檀經說佛心。

此日盡知前境妄。

多生曾被外塵侵。

自嫌習性猶殘處。

愛詠閒詩好聽琴。

好聽琴

本性好絲桐。塵機聞卽空。一聲來耳裏。

萬事離心中。

清暢堪銷疾。

恬和好養蒙。

尤宜聽三樂。安慰白頭翁。

愛詠詩

辭章諷詠成千首。心行歸依向一乘。

坐依繩牀閒自念。

前生應是一詩僧。

酬皇甫庶子見寄

掌綸不稱君應笑。典郡無能我自知。

別詔忽驚新命出。

同寮偶與夙心期。

春坊瀟瀟優閒地。秋鬢蒼浪老大時。

獨占二疏應未可。

龍樓見擬覓分司。

臥疾

閒官臥疾絕經過。居處蕭條近洛河。

水北水南秋月夜。

管絃聲少杵聲多。

遠師

東宮白庶子。南寺遠禪師。何處遙相見。心無一事時。

問遠師

童羶停夜食。吟詠散秋懷。笑問東林老。詩應不破齋。

小院酒醒

酒醒閒獨步。小院夜深涼。一領新秋簟。三閒明月廊。未收殘盞杓。初換熱衣裳。好是幽眠處。松陰六尺牀。

贈侯三郎中

老愛東都好寄身。足泉多竹少埃塵。年豐最喜唯貧客。秋冷先知是瘦人。幸有琴書堪作伴。苦無田宅可爲隣。洛中縱未長居得。且與田蘇遊過春。

求分司東都寄牛相公十韻

忽忽心如夢。星星髮似絲。縱貧長有酒。雖老未拋詩。儉薄身都慣。竦頑性頗宜。飯粗餐亦飽。被暖起常遲。萬里歸何得。三年伴是誰。華亭鶴不去。天竺石相隨。王尹貫將馬。田家賣與池。開門閒坐日。遶水獨行時。懶慢交游許。衰羸相府知。官寮幸無事。可惜不分司。

酬楊八

君以曠懷宜靜境。我因蹇步稱閒官。閉門足病非高士。勞作雲心鶴眼看。

履道新居二十韻

履道坊西角。官河曲北頭。林園四隣好。風景一家秋。門閉深沈樹。池通淺沮溝。拔青松直上。鋪碧水平流。籬菊黃金合。臆筠綠玉稠。疑連紫陽洞。似到白蘋洲。僧至多同宿。賓來輒少留。豈無詩引興。兼有酒銷憂。移榻臨平岸。攜茶上小舟。果穿聞鳥啄。萍破見魚遊。地與塵相遠。人將境共幽。汎潭菱點鏡。沈浦月生鉤。厨曉煙孤起。庭寒雨半收。老飢初暖粥。瘦冷早披裘。洛下招新隱。秦中忘舊遊。辭章畱鳳閣。班籍寄龍樓。病慙官曹靜。閒慙俸祿優。琴書中有得。衣食外何求。濟世才無取。謀身智不周。應須共心語。萬事一時休。

九日思杭州舊遊寄周判官及諸客

忽憶郡南山頂上。昔時同醉是今辰。笙歌委曲聲延耳。金翠動搖光照身。風景不隨宮相去。歡娛應逐使君新。江山賓客皆如舊。唯是當筵換主人。

秋晚

煙景澹濛濛。池邊微有風。覺寒菴近壁。知暝鶴歸籠。長貌隨年改。衰情與物同。夜來霜厚薄。梨葉半低紅。

分司

散秩畱司殊有味。最宜病拙不才身。行香拜表爲公事。碧洛青嵩當主人。

已出閒遊多到夜。卻歸慵臥又經旬。錢塘五馬雷三匹。還擬騎遊攪擾春。

河南王尹初到。以詩代書先問之。

別來王閣老。三歲似須臾。鬢上斑多少。杯前興有無。官從分緊慢。情莫問榮枯。

許入朱門否。籃輿一病夫。

池西亭

朱欄映晚樹。金魄落秋池。還似錢塘夜。西樓月出時。

臨池閒臥

小竹圍庭匝。平池與砌連。閒多臨水坐。老愛向陽眠。營役拋身外。幽奇送枕前。

誰家臥牀脚。解繫釣魚船。

吾廬

吾廬不獨貯妻兒。自覺年侵身力衰。眼下營求容足地。心中準擬挂冠時。

新昌小院松當戶。履道幽居竹遶池。莫道兩都空有宅。林泉風月是家資。

題新居寄宣州崔相公

所居南隣。即崔家池。

門庭有水巷無塵。好稱閒官作主人。冷似雀羅雖少客。寬於蝸舍足容身。

疏通竹徑將迎月。掃掠莎臺欲待春。濟世料君歸未得。南園北曲謾爲隣。

憶杭州梅花。因敘舊遊寄蕭協律

三年閒悶在餘杭。曾爲梅花醉幾場。伍相廟邊繁似雪。孤山園裏麗如粧。

蹋隨遊騎心長惜。折贈佳人手亦香。賞自初開直至落。歡因小飲便成狂。

薛劉相次埋新壘。沈謝雙飛出故鄉。歌伴酒徒零散盡。唯殘頭白老蕭郎。

病中辱張常侍題集賢院詩。因以繼和

天祿閣門開。甘泉侍從回。圖書皆帝籍。寮友盡仙才。騎省通中掖。龍樓隔上臺。

獨憐病宮相。詩寄洛陽來。

早春晚歸

晚歸騎馬過天津。沙白橋紅返照新。草色連延多隙地。鼓聲閒緩少忙人。

還如南國饒溝水。不似西京足路塵。金谷風光依舊在。無人管領石家春。

贈楊使君

曾嗟放逐同巴峽。且喜歸還會洛陽。時命到來須作用。功名未立莫思量。

銀銜叱撥欺風雪。金屑琵琶費酒漿。更待城東桃李發。共君沈醉兩三場。

贈皇甫庶子

何因散地共徘徊。人道君才我不才。騎少馬蹄生易蹶。用稀印鑲澀難開。

妻知年老添衣絮。

婢報天寒撥酒醅。

更愧小胥諮拜表。

單衫衝雪夜深來。

池上竹下作

穿籬透舍碧透迤。

十畝閒居半是池。

食飽窗閒新睡後。

脚輕林下獨行時。

水能性淡爲吾友。

竹解心虛卽我師。

何必悠悠人世上。

勞心費目覓親知。

閒出覓春戲贈諸郎官。

年來數出覓風光。

亦不全閒亦不忙。

放輕體安騎穩馬。

隔袍身暖照晴陽。

迎春日日添詩思。

送老時時放酒狂。

除卻鬢鬚白一色。

其餘未伏少年郎。

別春爐

暖閣春初入。

溫爐興稍闌。

晚風猶冷在。

夜火且畱看。

誰能共天語。

長遣四時寒。

獨宿相依久。

多情欲別難。

夢行簡

天氣妍和水色鮮。

閒吟獨步小橋邊。

池塘草綠無佳句。

虛臥春窗夢阿憐。

題新居呈王尹兼簡府中三掾

弊宅須重葺。

貧家乏羨財。

橋憑川守造。

樹倩府僚栽。

仍期更攜酒。

倚檻看花來。

雲和

非琴非瑟亦非箏。

撥柱推絃調未成。

欲散白頭千萬恨。

只消紅袖兩三聲。

春老

欲隨年少強遊春。

自覺風光不屬身。

歌舞屏風花障上。

幾時曾畫白頭人。

春雪過皇甫家

晚來簾與雪中回。

喜遇君家門正開。

唯要主人青眼待。

琴詩談笑自將來。

崔侍御以孩子三日示其所生詩見示因以二絕和之

洞房門上挂桑弧。

香水盆中浴鳳雛。

還似初生三日魄。

嫦娥滿月卽成珠。

【一】

愛惜肯將同寶玉。

喜歡應勝得王侯。

弄璋詩句多才思。

愁殺無兒老鄧攸。

與皇甫庶子同遊城東

閒遊何必多徒侶。

相勸時時舉一杯。

博望苑中無職役。

建春門外足池臺。

綠油剪葉蒲新長。

紅蠟粘枝杏欲開。

白馬朱衣兩宮相。

可憐天氣出城來。

洛城東花下作

記得舊詩章。

花多數洛陽。

及逢枝似雪。

已是鬢成霜。

向後光陰促。從前事意忙。無因重年少。何計駐時芳。欲送愁離面。須傾酒入腸。

白頭無藉在。醉倒亦何妨。

晚春寄微之并崔湖州

洛陽陌上少交親。履道城邊欲暮春。

崔在吳興元在越。

出門騎馬覓何人。

城東閒行因題尉遲司業水閣

閒遶洛陽城。無人知姓名。病乘籃輿出。老著茜衫行。處處花相引。時時酒一傾。

借君溪閣上。醉詠兩三聲。

寄皇甫七

孟夏愛吾廬。陶潛語不虛。花樽飄落酒。風案展開書。隣女偷新果。家僮漉小魚。

不知皇甫七。池上興何如。

訪皇甫七

上馬行數里。逢花傾一杯。更無停泊處。還是覓君來。

白樂天詩後集卷七

律詩

凡一百一首

除蘇州刺史別洛城東花

亂雪千花落。新絲兩鬢生。老除吳郡守。春別洛陽城。江上今重去。城東更一行。

別花何用伴。勸酒有殘鶯。

奉和汴州令狐令公二十二韻

同用淹字

客有東征者。	夷門一落帆。	二年方得到。	五日未為淹。	在浚旌重葺。	遊梁館更添。
心因好善樂。	貌為禮賢謙。	俗阜知敦勸。	民安見察廉。	仁風扇道路。	陰雨膏閭閻。
文律操將柄。	兵機釣得鈴。	碧幢油葉葉。	紅旆火稽稽。	景象春加麗。	威容曉助嚴。
槍森赤豹尾。	纛吐黑龍髯。	門靜塵初斂。	城昏日半銜。	選幽開後院。	占勝坐前檐。
平展絲題毯。	高褰錦額簾。	雷槌柘枝鼓。	雪擺胡騰衫。	髮滑歌釵墜。	粧光舞汗霑。
回燈花簇簇。	過酒玉纖纖。	饌盛盤心殫。	醅濃盞底粘。	陸珍熊掌爛。	海味蟹螯鹹。
福履千夫祝。	形儀四座瞻。	羊公長在峴。	傅說莫歸巖。	眷愛人人遍。	風情事事兼。

猶嫌客不醉。同賦夜厭厭。

船夜援琴

鳥棲魚不動。月照夜江深。身外都無事。舟中只有琴。七絃為益友。兩耳是知音。心靜即聲淡。其閒無古今。

答劉和州禹錫

換印雖頻命未通。歷陽湖上又秋風。不教才展休明代。為罰詩爭造化功。我亦思歸田舍下。君應厭臥郡齋中。好相收拾為閒伴。年齒官班約略同。

渡淮

淮水東南闊。無風渡亦難。孤煙生乍直。遠樹望多圓。春浪棹聲急。夕陽帆影殘。清流宜映月。今夜重吟看。

赴蘇州至常州答賈舍人

杭城隔歲轉蘇臺。還擁前時五馬回。厭見簿書先眼合。喜逢杯酒暫眉開。未酬恩寵年空去。欲立功名命不來。一別承明三領郡。甘從人道是粗才。

去歲罷杭州。今春領吳郡。慙無善政。聊寫鄙懷。兼寄三相公。

為問三丞相。如何秉國鈞。那將最劇郡。付與苦慵人。豈有吟詩客。堪為持節臣。

不才空飽暖。無惠及飢貧。昨臥南城月。今行北境春。鉛刀磨欲盡。銀印換何頻。

杭老遮車轍。吳童掃路塵。虛迎復虛送。慙見兩州民。

宣武令狐相公以詩寄贈。傳播吳中。聊奉短章。用伸酬謝。

新詩傳詠忽紛紛。楚老吳娃耳徧聞。盡解呼為好才子。不知官是上將軍。

辭人命薄多無位。戰將功高少有文。謝朓篇章韓信鉞。一生雙得不如君。

自詠

形容瘦薄詩情苦。豈是人閒有相人。只合一生眠白屋。何因三度擁朱輪。

金章未佩雖非貴。銀槎常攜亦不貧。唯是無兒頭早白。被天磨折恰平均。

吟前篇因寄微之

君顏貴茂不清羸。君句雄華不苦悲。何事遣君還似我。髭鬚早白亦無兒。

紫薇花

紫薇花對紫薇翁。名目雖同貌不同。獨占芳菲當夏景。不將顏色託春風。

潯陽官舍雙高樹。興善僧庭一大叢。何似蘇州安置處。花堂欄下月明中。

自到郡齋。僅經旬日。方專公務。未及宴遊。偷閒走筆題二十四韻。兼寄常

州賈舍人。湖州崔郎中。仍呈吳中諸客。

渭北離鄉客。江南守土臣。涉途初改月。入境已經旬。甲郡標天下。環封極海濱。版圖十萬戶。兵籍五千人。自顧才能少。何堪寵命頻。冒榮慙印綬。虛獎負絲綸。候病須通脈。防流要塞津。救煩無若靜。補拙莫如勤。削使科條簡。攤令賦役均。以茲爲報效。安敢不躬親。襦袴提於手。韋弦佩在紳。敢辭稱俗吏。且願活疲民。常未徵黃霸。湖猶借寇恂。愧無鐫脚政。徒添犬牙隣。制誥誇黃絹。詩篇占白蘋。銅符拋不得。瓊樹見無因。警寐鐘傳夜。催衙鼓報晨。唯知對胥吏。未暇接親賓。色變雲迎夏。聲殘鳥過春。麥風非逐扇。梅雨異隨輪。武寺山如故。王樓月自新。池塘閒長草。絲竹廢生塵。暑遣燒神酎。晴教曬舞茵。待還公事了。亦擬樂吾身。

題籠鶴

經旬不飲酒。踰月未聞歌。豈是風情少。其如塵事多。虎丘慙客問。娃館妬人過。莫笑籠中鶴。相看去幾何。

答客問杭州

爲我踟躕停酒盞。與君約略說杭州。山名天竺堆青黛。湖號錢塘瀉綠油。大屋檐多裝鴈齒。小航船亦畫龍頭。所嗟水路無三百。官繫何因得再遊。

登閶門閒望

閶門四望鬱蒼蒼。始覺州雄土俗強。十萬夫家供課稅。五千子弟守封疆。闔閭城碧鋪秋草。烏鵲橋紅帶夕陽。處處樓前飄管吹。家家門外泊舟航。雲埋虎寺山藏色。月耀娃宮水放光。曾賞錢塘兼茂苑。今來未敢苦誇張。

代諸妓贈送周判官

妓筵今夜別姑蘇。客棹明朝向鏡湖。莫汎扁舟尋范蠡。且隨五馬覓羅敷。蘭亭月破能迴否。娃館秋涼卻到無。好與使君爲老伴。歸來休染白髭鬚。

秋寄微之十二韻

娃館松江北。稽城浙水東。屈君爲長吏。伴我作衰翁。旌旆知非遠。煙雲望不通。忙多對酒榼。興少閱詩筒。淡白秋來日。疎涼雨後風。餘霞數片綺。新月一張弓。影滿衰桐樹。香凋晚蕙叢。飢啼春穀鳥。寒怨絡絲蟲。覽鏡頭雖白。聽歌耳未聾。老愁從此遣。醉笑與誰同。清旦方堆案。黃昏始退公。可憐朝暮景。銷在兩衙中。

池上早秋

荷芰綠參差。新秋水滿池。早涼生北檻。殘照下東籬。露飽蟬聲懶。風乾柳意衰。過潘二十歲。何必更愁悲。

郡西亭偶詠

常愛西亭面北林。公私塵事不能侵。共閒作伴無如鶴。與老相宜只有琴。莫遣是非分作界。須教吏隱合爲心。但要修行功用深。

故衫

闇淡緋衫稱老身。半披半曳出朱門。袖中吳郡新詩本。襟上杭州舊酒痕。殘色過梅看向盡。故香因洗嗅猶存。曾經爛熳三年著。欲棄空箱似少恩。

郡中夜聽李山人彈三樂

風琴秋拂匣。月戶夜開關。榮啓先生樂。姑蘇太守閒。傳聲千古後。得意一時閒。卻怪鍾期耳。唯聽水與山。

東城桂三首并序

樂府解題作桂華曲

蘇之東城古吳都城也。今爲樵牧之場。有桂一株。生乎城下。惜其不得地。因賦三絕句以唁之。

子墮本從天竺寺。根盤今在闔閩城。當時應逐南風落。落向人閒取次生。

【二】

霜雪壓多雖不死。荆榛長疾欲相埋。常憂落在樵人手。賣作蘇州一束柴。

【三】

遙知天上桂花孤。試問嫦娥更要無。月宮幸有閒田地。何不中央種兩株。

聞行簡恩賜章服喜成長句寄之

吾年五十加朝散。爾亦今年賜服章。齒髮恰同知命歲。官銜俱是客曹郎。榮傳錦帳花聯萼。彩動綾袍鴈趁行。大抵著緋宜老大。莫嫌秋鬢數莖霜。

喚笙歌

露墜萎花槿。風吹敗葉荷。老心歡樂少。秋眼感傷多。芳歲今如此。衰翁可奈何。猶應不如醉。試遣喚笙歌。

對酒吟

一拋學士筆。三佩使君符。未換銀青綬。唯添雪白鬚。公門衙退掩。妓席客來鋪。履烏從相近。謳吟任所須。金銜嘶五馬。鈿帶舞雙姝。不得當年有。猶勝到老無。合聲歌漢月。齊手拍吳歎。今夜還先醉。應煩紅袖扶。

偶飲

三盞醺醺四體融。妓亭簷下夕陽中。千聲方響鼓相續。一曲雲和夏未終。今日心情如往日。秋風氣味似春風。唯憎小吏樽前報。道去衙時水五筒。

早發赴洞庭舟中作

白樂天詩後集卷七

閨門曙色欲蒼蒼。星月高低宿水光。
棹舉影搖燈燭動。舟移聲拽管絃長。
漸看海樹紅生日。遙見包山白帶霜。
出郭已行十五里。唯消一曲慢霓裳。

宿湖中

水天向晚碧沈沈。樹影霞光重疊深。
浸月冷波千頃練。苞霜新橘萬株金。
幸無案牘何妨醉。縱有笙歌不廢吟。
十隻畫船何處宿。洞庭山脚太湖心。

揀貢橘書情

洞庭貢橘揀宜精。太守勤王請自行。
珠顆形容隨日長。瓊漿氣味得霜成。
登山敢惜駑駘力。望闕難伸螻蟻情。
疎賤無由親跪獻。願憑朱實表丹誠。

夜泛陽隲入明月灣即事寄崔湖州

湖山處處好淹留。最愛東灣北陽頭。
掩映橘林千點火。泓澄潭水一盆油。
龍頭畫舸銜明月。鵲脚紅旛蘸碧流。
為報茶山崔太守。與君各是一家遊。

泛太湖書事寄微之

煙渚雲帆處處通。飄然舟似入虛空。
玉杯淺酌巡初匝。金管徐吹曲未終。
黃夾纈林寒有葉。碧琉璃水淨無風。
避旗飛鷺翻翻白。驚鼓跳魚潑刺紅。
湖雪壓多松偃蹇。巖泉滴久石玲瓏。
書為故事畱湖上。吟作新詩寄浙東。

軍府威容從道盛

江山氣色定知同。

報君一事君應羨。

五宿澄波皓月中。

題新館

曾為白社羈遊子。今作朱門醉飽身。
十萬戶州尤覺貴。二千石祿敢言貧。
重裘每念單衣士。兼味常思旅食人。
新館寒來多少客。欲回歌酒暖風塵。

西樓喜雪命宴

宿雲黃慘澹。曉雪白飄颻。散麩遮槐市。
堆花壓柳橋。四郊鋪縞素。萬室甃瓊瑤。
銀榼攜桑落。金爐上麗譙。光迎舞妓動。
寒近醉人銷。歌樂雖盈耳。慙無五袴謠。

新栽梅

池邊新種七株梅。欲到花時點檢來。
莫怕長洲桃李妬。今年好為使君開。

酬劉和州戲贈

錢塘山水接蘇臺。兩地褰帷愧不才。
政事素無爭學得。風情舊有且將來。
雙蛾解珮啼相送。五馬鳴珂笑卻回。
不似劉郎無景行。長拋春恨在天台。

戲和賈常州醉中二絕句

聞道毗陵詩酒興。近來積漸學姑蘇。
罨頭新令從偷去。刮骨清吟得似無。

【二】

越調管吹畱客曲。吳吟詩送煖寒杯。

娃宮無限風流事。

好遣孫心暫學來。

歲暮寄微之三首

微之別久能無歎。知退書稀豈免愁。

甲子百年過半後。

光陰一歲欲終頭。

池冰曉合膠船底。樓雪晴銷露瓦溝。

自覺歡情隨日減。

蘇州心不及杭州。

【二】

榮進雖頻退亦頻。與君才命不調勻。

若不九重中掌事。

即須千里外拋身。

紫垣南北廳曾對。滄海東西郡又隣。

雖欠結廬嵩洛下。

一時歸去作閒人。

【三】

白頭歲暮苦相思。除卻悲吟無可爲。

枕上從妨一夜睡。

燈前讀盡十年詩。

龍鍾校正騎驢日。顛顛通江司馬時。

若竝如今是全活。

紆朱拖紫且開眉。

歲日家宴戲示弟姪等兼呈張侍御二十八丈殷判官二十三兄

弟妹妻孥小姪甥。嬌癡弄我助歡情。

歲盡後推藍尾酒。

春盤先勸膠牙餠。

形骸潦倒雖堪歎。骨肉團圓亦可榮。

猶有誇張少年處。

笑呼張丈喚殷兄。

正月三日閒行

黃鸝巷口鶯初語。烏鶻河頭冰欲銷。

綠浪東西南北水。

紅欄三百九十橋。

鴛鴦蕩漾雙雙翅。

楊柳交加萬萬條。

借問春風來早晚。

只從前日到今朝。

夜歸

逐勝移朝宴。畱歡放晚衙。賓僚多謝客。

騎從半吳娃。

到處銷春景。歸時及月華。

城陰一道直。燭焰兩行斜。東吹先催柳。

南霜不殺花。

皁橋夜酤酒。燈火是誰家。

自歎

豈獨年相迫。兼爲病所侵。春來痰氣動。

老去嗽聲深。

眠暗猶操筆。頭斑未挂簪。

因循過日月。真是俗人心。

郡中閒獨寄微之及崔湖州

少年賓旅非吾輩。晚歲簪纓束我身。

酒散更無同宿客。

詩成長作獨吟人。

蘋洲會面知何日。鏡水離心又一春。

兩處也應相憶在。

官高年長少情親。

小舫

小舫一艘新造了。輕裝梁柱庫安篷。

深坊靜岸遊應遍。

淺水低橋去盡通。

黃柳影籠隨棹月。白蘋香起打頭風。

慢牽欲傍櫻桃泊。

借問誰家花最紅。

馬墜強出贈同座

足傷遭馬墜。腰重倩人擡。祇合臆閒臥。何因花下來。坐依桃葉妓。行呷地黄杯。

強出非他意。東風落盡梅。

夜聞賈常州崔湖州茶山境會想羨歡宴因寄此詩

遙聞境會茶山夜。珠翠歌鐘俱遶身。盤下中分兩州界。燈前合作一家春。

青娥遞舞應爭妙。紫箏齊響各關新。自歎花時北窗下。蒲黃酒對病眠人。時馬駘損腰。正勸蒲黃酒。

酬微之開拆新樓初畢相報未聯見戲之作

海山鬱鬱石稜稜。新谿高居正好登。南臨瞻部三千界。東對蓬宮十二層。

報我樓成秋望月。把君詩讀夜回燈。無妨卻有他心眼。粧點亭臺即不能。

病中多雨逢寒食

水國多陰常懶出。老夫饒病愛閒眠。三句臥度鶯花月。一半春銷風雨天。

薄暮何人吹鬢髮。新晴幾處縛鞦韆。綵繩芳樹長如舊。唯是年年換少年。

清明夜

好風隴月清明夜。碧砌紅軒刺史家。獨遶迴廊行復歇。遙聽絃管暗看花。

蘇州柳

金谷園中黃嫋娜。曲江亭畔碧婆娑。老來處處遊行徧。不似蘇州柳最多。

絮撲白頭條拂面。使君無計奈春何。

三月二十八日贈周判官

一春惆悵殘三日。醉問周郎憶得無。柳絮送人鶯勸酒。去年今日別東都。

偶作

紅杏初生葉。青梅已綴枝。闌珊花落後。寂寞酒醒時。坐悶低眉久。行慵舉足遲。

少年君莫怪。頭白自應知。

重答劉和州

分無佳麗敵西施。敢有文章替左司。隨分笙歌聊自樂。等閒篇詠被人知。

花邊妓引尋香徑。月下僧留宿劔池。可惜當時好風景。吳王應不解吟詩。

奉送三兄

少年曾管二千兵。晝聽笙歌夜斫營。自反丘園頭盡白。每逢旗鼓眼猶明。

杭州暮醉連牀臥。吳郡春遊竝馬行。自愧阿連官職慢。只教兄作使君兄。

城上夜宴

畱春不住登城望。惜夜相將秉燭遊。風月萬家河兩岸。笙歌一曲郡西樓。

詩聽越客吟何苦。酒被吳娃勸不休。從道人生都是夢。夢中歡笑亦勝愁。

重題小舫贈周從事兼戲微之

細篷青篾織魚鱗。小眼紅腮襯麴塵。闊狹纔容從事座。高低恰稱使君身。舞筵須揀腰輕女。仙棹難勝骨重人。不似鏡湖廉使出。高檣大艫鬧驚春。

吳櫻桃

含桃最說出東吳。香色鮮穠氣味殊。洽洽舉頭千萬顆。婆婆拂面兩三株。烏偷飛處啣將火。人摘爭時蹋破珠。可惜風吹兼雨打。明朝後日即應無。

春盡勸客酒

林下春將盡。池邊日半斜。櫻桃落砌顛。夜合隔簾花。嘗酒留閑客。行茶使小娃。殘杯勸不飲。畱醉向誰家。

仲夏齋居偶題八韻寄微之及崔湖州

腥血與葷蔬。停來一月餘。肌膚雖瘦損。方寸任清虛。體適通宵坐。頭慵隔日梳。眼前無俗物。身外即僧居。水榭風來遠。松廊雨過初。褰簾放巢燕。投食施池魚。久別閒遊伴。頻勞問疾書。不知湖與越。吏隱與何如。

官宅

紅紫共紛紛。祇承老使君。移舟木蘭棹。行酒石榴裙。水色窗窗見。花香院院聞。戀他官舍住。雙鬢白如雲。

六月三日夜聞蟬

荷香清露墜。柳動好風生。微月初三夜。新蟬第一聲。乍聞愁北客。靜聽憶東京。我有竹林宅。別來蟬再鳴。不知池上月。誰撥小般行。

蓮石

青石一兩片。白蓮三四枝。寄將東洛去。心與物相隨。石倚風前樹。蓮栽月下池。遙知安置處。豫想發榮時。領郡來何遠。還鄉去已遲。莫言千里別。歲晚有心期。

眼病二首

散亂空中千片雪。蒙籠物上一重紗。縱逢晴景如看霧。不是春天亦見花。僧說客塵來眼界。醫言風眩在肝家。兩頭治療何曾瘥。藥力微茫佛力賒。

【二】

眼藏損傷來已久。病根牢固去應難。醫師盡勸先停酒。道侶多教早罷官。案上謾鋪龍樹論。盒中虛撚決明丸。人閒方藥應無益。爭得金篦試刮看。

題東武丘寺六韻

香刹看非遠。祇園入始深。龍蟠松矯矯。玉立竹森森。怪石千僧坐。靈池一劍沈。海當亭兩面。山在寺中心。酒熟憑花勸。詩成倩鳥吟。寄言軒冕客。此地好抽簪。

夜遊西武丘寺八韻

不厭西丘寺。閒來卽一過。舟船轉雲島。樓閣出煙蘿。路入青松影。門臨白月波。魚跳驚秉燭。猿覩怪鳴珂。搖曳雙紅旆。娉婷十翠娥。香花助羅綺。鐘梵避笙歌。領郡時將久。遊山數幾何。一年十二度。非少亦非多。

詠懷

蘇杭自昔稱名郡。牧守當今當好官。兩地江山蹋得遍。五年風月詠將殘。幾時酒盞曾拋卻。何處花枝不把看。白髮滿頭歸得也。詩情酒興漸闌珊。

重詠

日覺雙眸暗。年驚兩鬢蒼。病應無處避。老更不宜忙。徇俗心情少。休官道理長。今秋歸去定。何必重思量。

百日假滿

心中久有歸田計。身上都無濟世才。長告初從百日滿。故鄉元約一年回。馬辭轅下頭高舉。鶴出籠中翅大開。但拂衣行莫回顧。的無官職趁人來。

九日寄微之

眼暗頭風事事妨。遶籬新菊爲誰黃。閒遊日久心慵倦。痛飲年深肺損傷。

吳郡兩回逢九月。

越州四度見重陽。

怕飛杯酒多分數。

厭聽笙歌舊曲章。

蟋蟀聲寒初過雨。

茱萸色淺未經霜。

去秋共數登高會。

又被今年減一場。

題報恩寺

好是清涼地。都無繫絆身。晚晴宜野寺。秋景屬閒人。淨石堪敷座。寒泉可濯巾。自慙容鬢上。猶帶郡庭塵。

晚起

臥聽瑟瑟銜鼓聲。起遲睡足長心情。華簪脫後頭雖白。案堆拋來眼校明。閒上籃輿乘輿出。醉回花舫信風行。明朝更濯塵纓去。聞道松江水最清。

自思益寺次楞伽寺作

朝從思益峯遊後。晚到楞伽寺歇時。照水姿容雖已老。上山筋力未全衰。行逢禪客多相問。坐倚漁舟一自思。猶去懸車十五載。休官非早亦非遲。

松江亭攜樂觀漁宴宿

震澤平蕪岸。松江落葉波。在官常夢想。爲客始經過。水面排罾網。船頭簇綺羅。朝盤鱸江鯉。夜燭舞青娥。鴈斷知風急。潮平見月多。繁絲與促管。不解和漁歌。

宿靈巖寺上院

高高白月上青林。客去僧歸獨夜深。革血屏除唯對酒。歌鐘放散只留琴。更無俗物當人眼。但有泉聲洗我心。最愛曉亭東望好。太湖煙水綠沈沈。

酬別周從事二首

腰痛拜迎人客倦。眼昏勾押簿書難。辭官歸去緣衰病。莫作陶潛范蠡看。

【二】

洛下田園久拋擲。吳中歌酒莫留連。嵩陽雲樹伊川月。已校歸遲四五年。

武丘寺路

去年重開寺路。桃李蓮荷。約種數千株。

自開山寺路。水陸往來頻。銀勒牽驕馬。花船載麗人。菱荷生欲遍。桃李種仍新。好住湖堤上。長留一道春。

齊雲樓晚望。偶題十韻。兼呈馮侍御周殷二協律。樓在蘇州。

潦倒宦情盛。蕭條芳歲闌。欲辭南國去。重上北城看。複疊江山壯。平鋪井邑寬。人稠過楊府。坊鬧半長安。插霧峰頭沒。穿霞日脚殘。水光紅漾漾。樹色綠漫漫。約略畱遺愛。殷勤念舊歡。病拋官職易。老別友朋難。九月全無熱。西風亦未寒。齊雲樓北面。半日凭欄干。

河亭晴望 八九月

風轉雲頭斂。煙銷水面開。晴虹橋影出。秋鴈櫓聲來。郡靜官初罷。鄉遙信未廻。明朝是重九。誰勸菊花杯。

畱別微之

千時久與本心違。悟道深知前事非。猶厭勞形辭郡印。那將趁伴著朝衣。五千言裏教知足。三百篇中勸式微。少室雲邊伊水畔。比君校老合先歸。

自喜

自喜天教我少緣。家徒行計兩翩翩。身兼妻子都三口。鶴與琴書共一船。僮僕減來無冗食。資糧算外有餘錢。攜將貯作丘中費。猶免飢寒得數年。

武丘寺路宴畱別諸妓

銀泥裙映錦障泥。畫舸停橈馬簇蹄。清管曲終鸚鵡語。紅旗影動駮嘶嘶。漸消醉色朱顏淺。欲語離情翠黛低。莫忘使君吟咏處。女墳湖北虎丘西。

江上對酒二首

酒助疎頑性。琴資緩慢情。有慵將送老。無智可勞生。忽忽忘機坐。悵悵任運行。家鄉安處是。那獨在神京。

【二】

久貯滄浪意。初辭桎梏身。昏昏常帶酒。默默不應人。坐穩便箕踞。眠多愛欠伸。客來存禮數。始著白綸巾。

望亭驛酬別周判官

何事出長洲。連宵飲不休。醒應難作別。歡漸少於愁。燈火穿邨市。笙歌上驛樓。何言五十里。已不屬蘇州。

見小姪龜兒詠燈詩并臘娘製衣因寄行簡

已知臘子能裁服。復報龜兒解詠燈。巧婦才人常薄命。莫教男女苦多能。

酒筵上答張居士

但要前塵滅。無妨外相同。雖過酒肆上。不離道場中。絃管聲非實。花鈿色是空。何人知此義。唯有淨名翁。

鸚鵡

隴西鸚鵡到江東。養得經年嘴漸紅。常恐思歸先剪翅。每因餒食暫開籠。人憐巧語情雖重。鳥憶高飛意不同。應似朱門歌舞妓。深藏牢閉後房中。

聽琵琶妓彈略略

腕軟撥頭輕。新教略略成。四絃千遍語。一曲萬重情。法向師邊得。能從意上生。

莫欺江外手。別是一家聲。

寫新詩寄微之偶題卷後

寫了吟看滿卷愁。淺紅牋紙小銀鈎。未容寄與微之去。已被人傳到越州。

吳宮辭

淡紅花帳淺檀蛾。睡臉初開似劈波。坐對珠籠閒理由。琵琶鸚鵡語相和。

寶曆二年八月三十日夜夢後作

塵纓忽解誠堪喜。世網重來未可知。莫忘全吳館中夢。嶺南泥雨步行時。

與夢得同登棲靈塔

半月悠悠在廣陵。何樓何塔不同登。共憐筋力猶堪在。上到棲靈第九層。

夢蘇州水閣寄馮侍御

揚州驛裏夢蘇州。夢到花橋水閣頭。覺後不知馮侍御。此中昨夜共誰遊。

喜罷郡

五年兩郡亦堪嗟。偷出遊山走看花。自此光陰爲己有。從前日月屬官家。

樽前免被催迎使。枕上休聞報坐衙。睡到午時歡到夜。回看官職時泥沙。

答次休上人

來篇云。聞有餘霞千萬首。何妨一句乞閒人。

白樂天詩後集卷七

姓白使君無麗句。

名休座主有新文。

禪心不合生分別。

莫愛餘霞嫌碧雲。

白樂天詩後集卷八

律詩

凡一首

感悟妄緣題如上人壁

自從爲駭童。直至作衰翁。所好隨年異。爲忙終日同。弄沙成佛塔。鏤玉謁王宮。彼此皆兒戲。須臾卽色空。有營非了義。無著是真宗。兼恐勤修道。猶應在妄中。

思子臺有感二首

凡題思子臺者皆罪江充予觀禍胎不獨在此偶以二絕句辨之

曾家機上聞投杼

尹氏園中見撥蜂

但以恩情生隙罅

何人不解作江充

【二】

聞生魍魅蠹生蟲

何異讒生疑阻中

但使武皇心似燭

江充不敢作江充

賦得邊城角

邊角兩三枝。霜天隴上兒。望鄉相竝立。向月一時吹。戰馬頭皆舉。征人手盡垂。嗚鳴三奏罷。城上展旌旗。

憶洛中所居

忽憶東都宅。春來事宛然。雪銷行徑裏。水上臥房前。厭綠栽黃竹。嫌紅種白蓮。醉教鶯送酒。閒遣鶴看船。幸是林園主。慙爲食祿牽。宦情薄似紙。鄉思急於弦。豈合姑蘇守。歸休更待年。

想歸田園

戀他朝市求何事。想取丘園樂此身。千首惡詩吟過日。一壺好酒醉消春。歸鄉年亦非全老。罷郡家仍未苦貧。快活不知如我者。人間能有幾多人。

琴茶

兀兀寄形羣動內。陶陶任性一生閒。自拋官後春多醉。不讀書來老更閒。琴裏知聞唯淥水。茶中故舊是蒙山。窮通行止長相伴。誰道吾今無往還。

贈楚州郭使君

淮水東南第一州。山圍雉堞月當樓。黃金印綬懸腰底。白雪歌詩落筆頭。笑看兒童騎竹馬。醉攜賓客上仙舟。當家美事堆身上。何啻林宗與細侯。

和郭使君題枸杞

山陽太守政嚴明。吏靜人安無犬驚。不知靈藥根成狗。怪得時聞吠夜聲。

初到洛下閒遊

漢庭重少身宜退。洛下閒居迹可逃。趁伴入朝應老醜。尋春放醉尚粗豪。詩攜綵紙新裝卷。酒典緋花舊賜袍。曾在東方千騎上。至今躑躅馬頭高。

醉贈劉二十八使君

爲我引杯添酒飲。與君把箸擊盤歌。詩稱國手徒爲爾。命壓人頭不奈何。舉眼風光長寂寞。滿朝官職獨蹉跎。亦知合被才名折。二十三年折太多。

太湖石

煙翠三秋色。波濤萬古痕。削成青玉片。截斷碧雲根。風氣通巖穴。苔文護洞門。三峯具體小。應是華山孫。

過敷水

垂鞭欲渡羅敷水。處分鳴騶且緩驅。秦氏雙蛾久冥漠。蘇臺五馬尙踟蹰。村童店女仰頭笑。今日使君真是愚。

南院

林院無情緒。經春不一開。楊花飛作穗。榆莢落成堆。壯氣從中減。流年逐後催。只應如過客。病去老迎來。

閒詠

步月憐清景。眠松愛綠陰。早年詩思苦。晚歲道情深。夜學禪多坐。秋牽興暫吟。悠然兩事外。無處更畱心。

初授祕監拜賜金紫閒吟小酌偶寫所懷

紫袍新祕監。白首舊書生。鬢雪人閒壽。腰金世上榮。子孫無可念。產業不能營。酒引眼前興。詩畱身後名。閒傾三數酌。醉詠十餘聲。便是羲皇代。先從心太平。

新昌閒居招楊郎中兄弟

紗巾角枕病眠翁。忙少閒多誰與同。但有雙松當砌下。更無一事到心中。金章紫綬看如夢。卓蓋朱輪別似空。暑月貧家何所有。客來唯贈北窗風。

祕省後廳

槐花雨潤新秋地。桐葉風翻欲夜天。盡日後廳無一事。白頭老監枕書眠。松齋偶興

置心思慮外。滅跡是非閒。約俸爲生計。隨官換往還。耳煩聞曉角。眼醒見秋山。賴此松簷下。朝回半日閒。

和楊郎中賀楊僕射致仕後楊侍郎門生合宴席上作

業重關西繼大名。恩深闕下遂高情。祥鱣降伴趨庭鯉。賀燕飛和出谷鶯。范蠡舟中無子弟。疏家席上欠門生。可憐玉樹連桃李。從古無如此會榮。

松下琴贈客

松寂風初定。琴清夜欲闌。偶因羣動息。試撥一聲看。寡鶴當微怨。秋泉應指寒。慙君此傾聽。本不爲君彈。

秋齋

晨起秋齋冷。蕭條稱病容。清風兩牕竹。白露一庭松。阮藉謀身拙。嵇康向事慵。生涯別有處。浩氣在心胸。

塗山寺獨遊

野徑行無伴。僧房宿有期。塗山來去熟。唯是馬蹄知。

登觀音臺望城

百千家似圍棋局。十二街如種菜畦。遙認微微入朝火。一條星宿五門西。

登寶應臺北望

臨高始見入寰小。對遠方知色界空。回首卻歸朝市去。一稊米落太倉中。

酬裴相公題興化小池見招長句

爲愛小塘招散客。不嫌老監與新詩。山翁倒載無妨學。范蠡扁舟未要追。蓬斷偶飄桃李徑。鷗鷺誤拂鳳凰池。敢辭課拙酬高韻。一勺爭禁萬頃陂。

閒行

五十年來思慮熟。忙人應未勝閒人。林園傲逸真成貴。衣食單疎不是貧。專掌圖書無過地。遍尋山水自由身。儻年七十猶強健。尙得閒行十五春。

閒出

兀兀出門何處去。新昌街晚樹陰斜。馬蹄知意緣行熟。不向楊家卽庾家。

與僧智如夜話

懶鈍尤知命。幽棲漸得朋。門閒無謁客。室靜有禪僧。爐向初冬火。籠停半夜燈。憂勞緣智巧。自喜百無能。

憶廬山舊隱及洛下新居

形骸僂俛班行內。骨肉勾留俸祿中。無奈攀緣隨手長。亦知恩愛到頭空。草堂久閉廬山下。竹院新拋洛水東。自是未能歸去得。世閒誰要白鬚翁。

暝寒

急景流如箭。淒風利似刀。暝催雞翅斂。寒束樹枝高。縮水濃和酒。加綿厚絮袍。

可憐冬計畢。煖臥醉陶陶。

偶眠

放杯書案上。枕臂火爐前。老少尋思事。慵多取次眠。妻教卸烏帽。婢與展青氈。便是屏風樣。何勞畫古賢。

華城西北雉堞最高。崔相公首創樓臺。錢左丞繼種花果。合為勝境。題在雅篇。歲暮獨遊。悵然成詠。時華州未除刺史

高居稱君子。瀟洒四無隣。

況是寒天客。樓空無主人。丞相棟梁久。使君桃李新。凝情看麗句。駐步想清塵。

奉使塗中戲贈張常侍

早風吹土滿長衢。驛騎星軺盡疾驅。共笑籃輿亦稱使。日馳一驛向東都。

有小白馬乘馭多時。奉使東行至稠桑驛。溢然而斃。足可驚傷。不能忘情。題二十韻。

能驟復能馳。翩翩白馬兒。毛寒一團雪。鬃薄萬條絲。卓蓋春行日。驪駒曉促時。

雙旌前獨步。五馬內偏騎。芳草承蹄葉。垂楊拂頂枝。誇將迎好客。惜不換妖姬。

慢鞍遊蕭寺。閒驅醉習池。睡來乘作夢。興發倚成詩。鞭為馴難下。鞍緣穩不離。

北歸還共到。東使亦相隨。赭白何曾變。玄黃豈得知。嘶風覺聲急。蹋雪怪行遲。

昨夜猶葛屨。今朝尚繫維。臥槽應不起。顧主遂長辭。塵滅駸駸迹。霜留皎皎姿。

度關形未改。過隙影難追。念倍燕求駿。情深項別騅。銀收鈎臆帶。金卸絡頭羈。

何處理奇骨。誰家覓弊帷。稠桑驛門外。吟罷涕雙垂。

題噴玉泉

泉在壽安山下。高百餘尺。直瀉潭中。

泉噴聲如玉。潭澄色似空。練垂青嶂上。珠寫綠盆中。溜滴三秋雨。寒生六月風。

何時此岩下。來作濯纓翁。

酬皇甫賓客

閒官兼慢使。著處易停輪。況欲逢新歲。仍初見故人。冒寒尋到洛。待煖始歸秦。

亦擬同攜手。城東略看春。

種白蓮

吳中白藕洛中栽。莫戀江南花懶開。萬里攜歸爾知否。紅蕉朱槿不將來。

答蘇庶子

偶作關東使。重陪洛下遊。病來從斷酒。老去可禁愁。款曲偏青眼。蹉跎各白頭。

蓬山閒氣味。依約似龍樓。

答尉遲少監水閣重宴

人情依舊歲華新。今日重招往日賓。雞黍重回千里駕。林園暗換四年春。
水軒平寫琉璃鏡。草岸斜鋪翡翠茵。聞道經營費心力。忍教成後屬他人。時主人欲賣林亭。

和劉郎中傷鄂姬

不獨君嗟我亦嗟。西風北雪殺南花。不知月夜魂歸處。鸚鵡洲頭第幾家。姬。鄂人也。

贈東隣王十三

攜手池邊月。開襟竹下風。驅愁知酒力。破睡見茶功。居處東西接。年顏老少同。

能來為伴否。伊上作漁翁。

早春同劉郎中寄宣武令狐相公

梁園不到一年強。遙想清吟對綠觴。更有何人能飲酌。新添幾卷好篇章。

馬頭拂柳時回轡。豹尾穿花暫亞槍。誰引相公開口笑。不逢白監與劉郎。

寄太原李相公

聞道北都今一變。政和軍樂萬人安。綺羅二八圍賓榻。組練三千夾將壇。

蟬鬢應誇丞相少。貂裘不覺太原寒。世閒大有虛榮貴。百歲無君一日歡。

雪中寄令狐相公兼呈夢得

兔園春雪梁王會。想對金罍詠玉塵。今日相如身在此。不知客右坐何人。

出使在途所騎馬死。改乘肩輿。將歸長安。偶詠旅懷。寄太原李相公。

驛路崎嶇泥雪寒。欲登籃輦一長歎。風光不見桃花騎。塵土空留杏葉鞍。

喪乘獨歸殊不易。脫驂相贈豈為難。并州好馬應無數。不怕旌旄試覓看。

有雙鶴畱在洛中。忽見劉郎中依然鳴顧。劉因為鶴歎二篇寄予。予以二絕句答之。

辭鄉遠隔華亭水。逐我來棲緱嶺雲。慙愧稻梁長不飽。未曾回眼向雞羣。

【二】

荒草院中池水畔。銜恩不去又經春。見君驚喜雙回顧。應為吟聲似主人。

宿寶使君莊水亭

使君何在在江東。池柳初黃杏欲紅。有興即來閒便宿。不知誰是主人翁。

龍門下作

龍門澗下濯塵纓。擬作閒人過此生。筋力不將諸處用。登山臨水詠詩行。

姚侍御見過戲贈

晚起春寒慵裹頭。客來池上偶同遊。東臺御史多提舉。莫按金章繫布裘。

履道春居

微雨洒園林。新晴好一尋。低風洗池面。斜日拆花心。暝助嵐陰重。春添水色深。

不如陶省事。猶抱有絃琴。

題洛中第宅

水木誰家宅。門高占地寬。懸魚挂青甃。行馬護朱欄。春樹籠煙煖。秋庭鎖月寒。松膠粘琥珀。筠粉撲琅玕。試問池臺主。多爲將相官。終身不會到。唯展宅圖看。

寄殷協律

多敘江南舊遊

五歲優游同過日。一朝消散似浮雲。琴詩酒伴皆拋我。雪月花時最懷君。幾度聽雞歌白日。亦曾騎馬詠紅裙。吳娘暮雨蕭蕭曲。自別江南更不聞。

洛下諸客就宅相送。偶題西亭

几榻臨池坐。軒車冒雪過。交親致杯酒。僮僕解笙歌。流歲行將晚。浮榮得幾多。林泉應問我。不注意如何。

答林泉

好住舊林泉。回頭一悵然。漸知吾潦倒。深愧爾畱連。欲作棲雲計。須營種黍錢。更容求一郡。不得亦歸田。

將發洛中。杜令狐相公手札兼辱二篇寵行。以長句答之

尺素忽驚來梓澤。雙金不惜送蓬山。八行落泊飛雲雨。五字鎗鏃動珮環。

玉韻乍聽堪醒酒。

銀鉤細讀當披顏。

收藏便作終身寶。

何啻三年懷袖閒。

臨都驛答夢得六言二首

揚子津頭月下。臨都驛裏燈前。昨日老於前日。去年春似今年。

【一】

謝守歸爲祕監。馮公老作郎官。前事不須問著。新詩且更吟看。

喜錢左丞再除華州以詩伸賀

左轄輟中臺。門東委上才。彤襜經宿到。絳帳及春開。民望懇難奪。天心慈易回。那知不隔歲。重借寇恂來。

和錢華州題少華清光絕句

高情雅韻三峰守。主領清光管白雲。自笑亦曾爲刺史。蘇州肥膩不如君。

送陝府王大夫

金馬門前回劔珮。鐵牛城下擁旌旗。他時萬一爲交代。畱取甘棠三兩枝。

代迎春花招劉郎中

幸與松筠相近栽。不隨桃李一時開。杏園豈敢妨君去。未有花時且看來。

翫迎春花贈楊郎中

金英翠萼帶春寒。

黃色花中有幾般。

憑君語向遊人道。

莫作蔓菁花眼看。

閒出

身外無羈束。心中少是非。被花畱便住。逢酒醉方歸。人事行時少。官曹入日稀。春寒遊正好。穩馬薄綿衣。

座上贈盧判官

把酒承花花落頻。花香酒味相和春。莫言不是江南會。虛白亭中舊主人。

曲江有感

曲江西岸又春風。萬樹花前一老翁。遇酒逢花還且醉。若論惆悵事何窮。

杏園花下贈劉郎中

怪君把酒偏惆悵。曾是貞元花下人。自別花來多少事。東風二十四回春。

花前有感兼呈崔相公劉郎中

落花如雪鬢如霜。醉把花看益自傷。少日爲名多檢束。長年無興可顛狂。

四時輪轉春常少。百刻支分夜苦長。何事同生壬子歲。老於崔相及劉郎。

微之就拜尚書居易續除刑部因書賀意兼詠離懷

我爲憲部入南宮。君作尚書鎮浙東。老去一時成白首。別來七度換春風。

管纓假合虛名在。筋力銷磨實事空。地遠官高親故老。些些談笑與誰同。

喜與韋左丞同入南省因敘舊以贈之

早年同遇陶鈞主。利鈍精粗共在鎔。憲宗朝與韋同入翰林金劒淬來長透匣。鉛刀磨盡不成鋒。

差肩北省慙非據。接武南宮幸再容。跛鼈雖遲騏驥疾。何妨中路亦相逢。

伊州

老去將何散老愁。新教小玉唱伊州。亦應不得多年聽。未教成時已白頭。

早朝

鼓動出新昌。雞鳴赴建章。翩翩穩鞍馬。楚楚健衣裳。宮漏傳殘夜。城陰送早涼。月堤槐露氣。風燭樺煙香。雙闕龍相對。千官鴈一行。漢庭方尙少。慙歎鬢如霜。

答裴相公乞鶴

一作酬裴相公乞子雙鶴警露聲音好。冲天相貌殊。終宜向遼廓。不稱在泥塗。白首勞爲伴。朱門幸見呼。

不知疎野性。解愛鳳池無。

晚從省歸

朝回北闕值清晨。晚出南宮送暮春。入去丞郎非散秩。歸來詩酒是閒人。猶思泉石多成夢。尙歎簪裾未離身。終是不如山下去。心頭眼底兩無塵。

北窗閒坐

虛窗兩叢竹。靜室一爐香。門外紅塵合。城中白日忙。無煩尋道士。不要學仙方。自有延年術。心閒歲月長。

酬嚴給事

開玉藥花下有
遊仙絕句

羸女偷乘鳳去時。洞中潛歇弄瓊枝。不緣啼鳥春饒舌。青瑣仙郎可得知。

京路

西來爲看秦山雪。東去緣尋洛苑春。來去騰騰兩京路。閒行除我更無人。

華州西

每逢人靜慵多歇。不計程行困即眠。上得籃輿未能去。春風敷水店門前。

從陝至東京

從陝至東京。山低路漸平。風光四百里。車馬十三程。花共垂鞭看。杯多竝轡傾。笙歌與談笑。隨分自將行。

送春

銀花鑿落從君勸。金屑琵琶爲我彈。不獨送春兼送老。更嘗一酌更聽看。

宿杜曲花下

覓得花千樹。攜來酒一壺。懶歸兼擬宿。未醉豈勞扶。但惜春將晚。寧愁日漸晡。籃輿爲臥舍。漆盞是行廚。斑竹盛茶櫃。紅泥罨飯爐。眼前無所闕。身外更何須。小面琵琶婢。蒼頭鬻築奴。從君飽富貴。曾作此遊無。

逢舊

久別偶相逢。俱疑是夢中。即今歡樂事。放盞又成空。

繡婦歎

連枝花樣繡羅襦。本擬新年餉小姑。自覺逢春饒悵望。誰能每日趁工夫。針頭不解愁眉結。線縷難穿淚臉珠。雖凭繡牀都不繡。同牀繡伴得知無。

春詞

低花樹映小粧樓。春入眉心兩點愁。斜倚欄干背鸚鵡。思量何事不回頭。

恨詞

翠黛眉低斂。紅珠淚暗銷。從來恨人意。不省似今朝。

山石榴花十二韻

曄曄復煌煌。花中無比方。豔天宜小院。條短稱低廊。本是山頭物。今爲砌下芳。千叢相向背。萬朵互低昂。照灼連朱檻。玲瓏映粉牆。風來添意態。日出助晶光。

漸綻胭脂夢。猶含琴軫房。離披亂剪綵。斑駁未勻妝。絳燄燈千炷。紅裙妓一行。此時逢國色。何處覓天香。恐合栽金闕。思將獻玉皇。好差青鳥使。封作百花王。

送敏中歸幽寧幕

六十衰翁兒女悲。旁人應笑爾應知。弟兄垂老相逢日。杯酒臨歡欲散時。前路加餐須努力。今宵盡醉莫推辭。司徒知我難為別。直過秋歸未訝遲。

宴散

小宴追涼散。平橋步月回。笙歌歸院落。燈火下樓臺。殘暑蟬催盡。新秋雁帶來。將何迎睡興。臨臥舉殘杯。

人定

人定月朧明。香銷枕簟清。翠屏遮燭影。紅袖下簾聲。坐久吟方罷。眠初夢未成。誰家教鸚鵡。故故語相驚。

池上

嫋嫋涼風動。淒淒寒露零。蘭衰花始白。荷破葉猶青。獨立棲沙鶴。雙飛照水螢。若為寥落境。仍值酒初醒。

池窗

池晚蓮芳謝。窗秋竹意深。更無人作伴。唯對一張琴。

花酒

香醅淺酌浮如蟻。雲鬢新梳薄似蟬。為報洛城花酒道。莫辭送老二三年。

題崔常侍濟源莊

谷口誰家住。雲扃鎖竹泉。主人何處去。蘿薜換貂蟬。籍在金閨內。班排玉扆前。誠知憶山水。歸得是何年。

認春戲呈馮少尹李郎中陳主簿

認得春風先到處。西園南面水東頭。柳初變後條猶重。花未開前枝已稠。暗助醉歡尋綠酒。潛添睡興著紅樓。知君未別陽和意。直待春深始擬遊。

魏堤有懷

魏王堤下水。聲似使君灘。惆悵回頭聽。踟躕立馬看。蕩風波眼急。翻雪浪心寒。憶得瞿塘事。重吟行路難。

柘枝詞

柳暗長廊合。花深小院開。蒼頭鋪錦褥。皓腕捧銀杯。繡帽珠稠綴。香衫袖窄裁。將軍挂毬杖。看按柘枝來。

代夢得吟

後來變化三分貴。同輩凋零大半無。世上爭先從盡汝。人閒鬪在不如吾。
竿頭已到應難久。局勢雖遲未必輸。不見山苗與林葉。迎春先綠亦先枯。

寄答周協律

來詩多敘蘇州舊遊

故人敍舊寄新篇。惆悵江南到眼前。暗想樓臺萬餘里。不聞歌吹一周年。
橋頭誰更看新月。池畔猶應泊舊船。最憶後亭杯酒散。紅屏風掩綠窗眠。

白樂天詩後集卷九

律詩

凡一百七首

大和戊申歲大有年。詔賜百寮出城觀稼。謹書盛事以俟采詩。

清晨承詔命。豐歲閱田閭。膏雨抽苗足。涼風吐穗初。早禾黃錯落。晚稻綠扶疎。
好入詩家詠。宜令史館書。散爲萬姓食。堆作九年儲。莫道如雲稼。今秋雲不如。

贈悼懷太子輓歌辭二首

奉詔撰進

竹馬書薨歲。銅龍表葬時。永言窀穸事。全用少陽儀。壽夭由天命。哀榮出聖慈。

恭聞褒贈詔。軫念在與夷。

【一】

剪葉藩封早。承華冊命尊。笙歌辭洛苑。風雪蔽梁園。鹵簿凌霜宿。銘旌向月翻。
宮寮不逮事。哭送出都門。

雨中招張司業宿

過夏衣香潤。迎秋簟色鮮。斜支花石枕。臥詠藥珠篇。泥濘非遊日。陰沈好睡天。
能來同宿否。聽雨對牀眠。

和集賢劉學士早朝作

吟君昨日早朝詩。金御爐前喚仗時。煙吐白龍頭宛轉。扇開青雉尾參差。
暫留春殿多稱屈。合入綸闈即可知。從此摩霄去非晚。鬢閒未有一莖絲。

送陝州王司馬建赴任

建善詩者

陝州司馬去何如。養靜資貧兩有餘。公事閒忙同少尹。料錢多少敵尙書。
祇攜美酒爲行伴。唯作新詩趣下車。自有鐵牛無詠者。料君投刃必應虛。

對琴待月

竹院新晴夜。松牕未臥時。共琴爲老伴。與月有秋期。玉軫臨風久。金波出霧遲。

幽音待清景。唯是我心知。

楊家南亭

小亭門向月斜開。滿地涼風滿地苔。此院好彈秋思處。終須一夜抱琴來。

早寒

黃葉聚墻角。青苔圍柱根。被經霜後薄。鏡遇雨來昏。半卷寒簷幕。斜開暖閣門。迎冬兼送老。只仰酒盈樽。

齋月靜居

病來心靜一無思。老去身閒百不爲。忽忽眼塵猶愛睡。些些口業尙誇詩。葷腥每斷齋居月。香火常親宴坐時。萬慮消停百神泰。唯應寂寞殺三尸。

宿裴相公興化池亭

兼蒙借船
妨遊汎

林亭一出宿風塵。忘卻平津是要津。松閣時看山色近。石渠秋放水聲新。孫弘閣闢無閒客。傅說舟忙不借人。何似掄才濟川外。別開池館待交親。

和劉郎中望終南山秋雪

遍覽古今集。都無秋雪詩。陽春先唱後。陰嶺未消時。草訝霜凝重。松疑鶴散遲。清光莫獨占。亦對白雲司。

廣府胡尙書頻寄詩。因答絕句

尙書清白臨南海。雖飲貪泉心不同。唯向詩中得珠玉。時時寄到帝鄉來。

送鶴與裴相臨別贈詩

司空愛爾爾須知。不信聽吟乞鶴詩。羽翮勢高寧惜別。稻粱恩厚莫愁飢。夜棲少共雞爭樹。曉浴先饒鳳占池。穩上青雲勿回顧。的應勝在白家時。

令狐相公拜尙書後有喜從鎮歸朝之作。劉郎中先和。因以繼之

車騎新從梁苑回。履聲珮響入中臺。鳳池望在終重去。龍節功成且納來。金勒最宜乘雪出。玉觴何必待花開。尙書首唱郎中和。不計官資只計才。

送河南尹馮學士赴任

石渠金谷中間路。軒騎翩翩十日程。清洛飲冰添苦節。碧嵩看雪助高情。謾誇河北操旄鉞。莫羨江西擁旆旌。何似府寮京令外。別教三十六峰迎。

讀鄆公傳

高臥深居不見人。功名抖擻似灰塵。唯留一部清商樂。月下風前伴老身。

烏夜啼

城上歸時晚。庭前宿處危。月明無葉樹。霜滑有風枝。啼澀飢喉咽。飛低凍翅垂。

畫堂鸚鵡鳥。冷暖不相知。

鏡換杯

欲將珠匣青銅鏡。

換取金樽白玉卮。

鏡裏老來無避處。

樽前愁至有消時。

茶能散悶爲功淺。

萱縱忘憂得力遲。

不似杜康神用速。

十分一盞便開眉。

冬夜聞蟲

蟲聲冬思苦於秋。

不解愁人聞亦愁。

我是老翁聽不畏。

少年莫聽白君頭。

雙鸚鵡

綠衣整頓雙棲起。

紅嘴分明對話時。

始覺琵琶絃莽鹵。

方知吉了舌參差。

鄭牛識字吾常歎。

諺云。鄭玄家牛觸墻成八字。

丁鶴能歌爾亦知。

若稱白家鸚鵡鳥。

籠中兼合解吟詩。

贈朱道士

儀容白皙上仙郎。

方寸清虛內道場。

兩翼化生因服藥。

三尸餓死爲休糧。

醮壇向北宵占斗。

寢室東開早納陽。

盡日窗閒更無事。

唯燒一炷降香。

昨以拙詩十首寄西川杜相公。相公亦以新作十首惠然報示。首數雖等。

工拙不倫。重以一章用伸答謝。

詩家律手在成都。

權輿尋常將相殊。

剪裁五言兼用鉞。

陶鈞六義別開爐。

驚人卷軸須知有。

隨事文章不道無。

篇數雖同光價異。

十魚目換十驪珠。

和汴州令狐相公新於郡內栽竹百竿。拆壁開軒。且夕對翫。偶題七言五韻。

梁園修竹舊傳名。

園廢年深竹不生。

千畝荒涼尋未得。

百竿青翠種新成。

墻開乍見重添興。

臆靜時聞別有情。

煙葉蒙籠侵夜色。

風枝蕭颯欲秋聲。

更登樓望尤堪重。

千萬人家無一莖。

汴州人家並無竹。

重答汝州李六使君見和憶吳中舊游五首

爲憶娃宮與虎邱。

翫君新作不能休。

蜀牋寫出篇篇好。

吳調吟時句句愁。

洛下林園終共住。

江南風月會重游。

由來事過多堪惜。

何況蘇州勝汝州。

見殷堯藩侍御憶江南詩三十首。詩中多敘蘇杭盛事。余嘗典二郡。因繼和之。

江南名郡數蘇杭。

寫在殷家三十章。

君是旅人猶苦憶。

我爲刺史更難忘。

境牽吟詠真詩國。

興入笙歌好醉鄉。

爲念舊遊終一去。

扁舟直擬到滄浪。

聞新蟬贈劉二十八

蟬發一聲時。

槐花帶兩枝。

只應催我老。

兼遣報君知。

無過一杯酒。

相勸數開眉。

贈王山人

玉芝觀裏王居士。服氣飡霞善養身。夜後不聞龜喘息。秋來唯長鶴精神。容顏盡怪長如故。名姓多疑不是真。貴重榮華輕壽命。知君悶見世閒人。

和劉郎中學士題集賢閣

朱閣青山高庫齊。與君才子作詩題。傍聞大內笙歌近。下視諸司屋舍低。萬卷圖書天祿上。一條風景月華西。欲知丞相優賢意。百步新廊不踢泥。

觀幻

有起皆因滅。無睽不暫同。從歡終作感。轉苦又成空。次第花生眼。須臾燭過風。更無尋覓處。鳥跡印空中。

病假中龐少尹攜魚酒相過

宦情牢落年將暮。病假聯綿日漸深。被老相催雖白首。與春無分未甘心。閒停茶碗從容語。醉把花枝取次吟。勞動故人龐閣老。提魚攜酒遠相尋。

聽田順兒歌

夏玉敲冰聲未停。嫌雲不遏入青冥。爭得黃金滿衫袖。一時拋與斷年聽。

聽曹剛琵琶兼示重蓮

撥撥絃絃意不同。胡啼番語兩玲瓏。誰能截得曹剛手。插向重蓮衣袖中。

酬令狐相公春日尋花見寄六韻

病臥帝王州。花時不得遊。老應隨日至。春肯為人留。粉壞杏將謝。火繁桃尙稠。白飄僧院地。紅落酒家樓。空裏雪相似。晚來月不休。吟君悵望句。如到曲江頭。

和劉郎中曲江春望見示

芳景多遊客。衰翁獨在家。肺傷妨飲酒。眼痛忌看花。寺路隨江曲。宮牆夾樹斜。羨君猶壯健。不枉度年華。

送東都留守令狐尚書赴任

翠華黃屋未東巡。碧洛青嵩付大臣。地稱高情多水竹。山宜閒望少風塵。龍門卽擬爲遊客。金谷先憑作主人。歌酒家家花處處。莫空管領上陽春。

自題新昌居止因招楊郎中小飲

地偏坊遠巷仍斜。最近東頭是白家。宿雨長齊隣舍柳。晴光照出夾城花。春風小榼三升酒。寒食深爐一碗茶。能到南園同醉否。笙歌隨分有些些。

南園試小樂

小園斑駁花初發。新樂錚鏦教欲成。紅萼紫房皆手植。蒼頭碧玉盡家生。高調管色吹銀字。慢拽歌詞唱渭城。不飲一杯聽一曲。將何安慰老心情。

和微之春日投簡陽明洞天五十韻

青陽行已半。白日坐將徂。越國強仍大。稽城高且孤。利饒鹽煮海。名勝水澄湖。
 牛斗天垂象。台明地展圖。天台四明二山。瓊奇填市井。佳麗溢闔閭。句踐遺風霸。西施舊俗姝。
 船頭龍夭矯。橋脚獸睢盱。鄉味珍蟳蚶。時鮮貴鷓鴣。語言諸夏異。衣服一方殊。
 擣練蛾眉婢。鳴榔蛙角奴。江清敵伊洛。山翠勝荆巫。華表雙棲鶴。聯檣幾點烏。
 煙波分渡口。雲樹接城隅。澗遠松如畫。洲平水似鋪。綠科秧早稻。紫筍折新蘆。
 暖蹋泥中藕。香尋石上蒲。雨來萌盡達。雷後蟄全蘇。柳眼黃絲類。花房絳蠟珠。
 林風新竹折。野燒老桑枯。帶鞞長枝蕙。錢穿短貫榆。暄和生野菜。卑濕長街蕪。
 女浣紗相伴。兒烹鯉一呼。山魈啼穉子。林狖挂山都。產業論蠶蟻。孳生計鴨雛。
 泉巖雪飄灑。苔壁錦漫糊。堰限舟航路。堤通車馬途。耶溪岸回合。禹廟徑盤紆。
 洞穴何因鑿。星槎誰與刳。石凹仙藥臼。峰峭佛香爐。去爲投金簡。來因挈玉壺。
 貴仍招客宿。健未要人扶。聞望賢丞相。儀形美丈夫。前驅駐旌旆。偏坐列笙竽。
 刺史旗翻隼。尙書履曳鳧。學禪超後有。觀妙造虛無。髻裏傳僧寶。環中得道樞。
 登樓詩八詠。置硯賦三都。捧擁羅將綺。趨踰紫與朱。廟謨藏稷卨。兵略貯孫吳。
 令下三軍整。風高四海趨。千家得慈母。六郡事嚴姑。重士過三哺。輕財抵一銖。

送觥歌宛轉。嘲妓笑盧胡。佐飲時炮鼈。燭醒數膾鱸。醉鄉雖咫尺。樂事亦須臾。
 若不中賢聖。何由外智愚。伊予一生志。我爾百年軀。江上三千里。城中十二衢。
 出多無伴侶。歸只對妻孥。白首青山約。抽身去得無。

酬鄭侍御多雨春空過詩三十韻

次用本韻

南雨來多滯。東風動即狂。月行離畢急。龍走召雲忙。鬼轉雷車響。蛇騰電策光。
 浸淫天似漏。沮洳地成瘡。慘憺陰煙白。空濛宿霧黃。闇遮千里目。悶結九回腸。
 寂寞羈臣館。深沈思婦房。鏡昏鸞滅影。衣潤麝消香。蘭溼難纫珮。花凋易落妝。
 霏黃鶯翅重。滋綠草心長。紫陌皆泥濘。黃汗共森茫。恐霖成怪沴。望霽劇禳張。
 楚柳腰肢彈。湘筠涕淚滂。晝昏疑是夜。陰盛勝於陽。居士巾皆墊。行人蓋盡張。
 跳蛙還屢出。移蟻欲深藏。端坐交游廢。閒行去步妨。愁生垂白叟。惱殺蹋青娘。
 變海常須慮。爲魚慎勿忘。此時方共懼。何處可相將。已望東溟禱。仍封北戶禳。
 卻思逢早魃。誰喜見商羊。預怕爲蠶病。先憂作麥傷。惠應施浹洽。政豈假揄揚。
 祀典修成秩。農書振滿床。丹誠期懇苦。白日會昭彰。賑廩關飢戶。苦城備壞墻。
 且當營歲事。寧暇惜年芳。德勝令災弭。人安在吏良。尙書心若此。不枉繫金章。

和春深二十首

何處春深好。春深富貴家。馬爲中路鳥。妓作後庭花。羅綺驅論隊。金銀用斷車。眼前何所苦。唯苦日西斜。

【二】

何處春深好。春深貧賤家。荒涼三徑草。冷落四隣花。奴困歸傭力。妻愁出貨車。途窮平路險。舉足劇褒斜。

【三】

何處春深好。春深執政家。鳳池添硯水。雞樹落花。詔借當衢宅。恩容上殿車。延英開對久。門與日西斜。

【四】

何處春深好。春深方鎮家。通犀排帶跨。瑞鶴勘袍花。飛絮衝毬馬。垂楊拂妓車。戎裝拜春設。左握寶刀斜。

【五】

何處春深好。春深刺史家。陰繁棠布葉。岐秀麥分花。五匹鳴珂馬。雙輪畫戟車。和風引行樂。葉葉隼旗斜。

【六】

何處春深好。春深學士家。鳳書裁五色。馬鬣剪三花。蠟炬開明火。銀臺賜物車。相逢不敢揖。彼此帽低斜。

【七】

何處春深好。春深女學家。慣看溫室樹。飽識浴堂花。御印提隨仗。香牋把下車。宋家宮樣髻。一片綠雲斜。

【八】

何處春深好。春深御史家。絮縈驄馬尾。蝶繞繡衣花。破柱行持斧。埋輪立駐車。入班遙認得。魚貫一行斜。

【九】

何處春深好。春深遷客家。一杯寒食酒。萬里故園花。炎瘴蒸如火。光陰走似車。爲憂鵬鳥至。只恐日光斜。

【十】

何處春深好。春深經業家。唯求太常第。不管曲江花。折桂名慙郗。收螢志慕車。官場泥補處。最怕寸陰斜。

【十一】

何處春深好。春深隱士家。野衣裁薜葉。山飯晒松花。蘭索紉幽珮。蒲輪駐軟車。林閒箕踞坐。白眼向人斜。

【十二】

何處春深好。春深漁父家。松灣隨擢月。桃浦落船花。投餌移輕楫。牽輪轉小車。蕭蕭蘆葉裏。風起釣絲斜。

【十三】

何處春深好。春深潮戶家。濤翻三月雪。浪噴四時花。曳練馳千馬。驚雷走萬車。餘波落何處。江轉富陽斜。

【十四】

何處春深好。春深痛飲家。十分杯裏物。五色眼前花。舖歡眠糟甕。流涎見麴車。中山一沈醉。千度日西斜。

【十五】

何處春深好。春深上巳家。蘭亭席上酒。曲洛岸邊花。弄水遊童棹。湔裾小婦車。齊橈爭渡處。一匹錦標斜。

【十六】

何處春深好。春深寒食家。冷醢饌雞子。宛轉綵毵花。碧草追游騎。紅塵拜掃車。鞦韆細腰女。搖曳逐風斜。

【十七】

何處春深好。春深博奕家。一先爭破眼。六聚鬪成花。鼓應投壺馬。兵衝象戲車。彈碁局上事。最妙是長斜。

【十八】

何處春深好。春深嫁女家。紫排襦上雉。黃貼鬢邊花。轉燭初移障。鳴環欲上車。青衣傳氎褥。錦繡一條斜。

【十九】

何處春深好。春深娶婦家。兩行籠裏燭。一樹扇閒花。賓拜登華席。親迎障幃車。催妝詩未了。星斗漸傾斜。

【二十】

何處春深好。春深妓女家。眉欺楊柳葉。裾妬石榴花。蘭麝薰行被。金銅釘坐車。杭州蘇小小。人道最天斜。

詠家醞十韻